

## **SISIGA BUKA IHARUANA**

### *Solomon ena Ĝuriĝuri*

<sup>1</sup> Solomon, David natuna, ese sibona ena siahу e haginia auka ena basileia lalonai. Iehova, ena Dirava, na ia ida, bona e habadaia herea.

<sup>2</sup> Solomon ese Israel taudia iboudiai e hereva henidia, datha bona sinahu lohiadia, hahemaoro taudia, bona hegunalai taudia Israel idoinai lalonai ai, edia iduhu kwaradia.

<sup>3</sup> Bena Solomon bona hebou taudia iboudiai ia ida na atai gabuna ela, Gibeon ai; badina be Dirava ena hebou kalagana, Iehova ena hesiai tauna Mose ese tano ĝaĝaena ai e karaia ĝauna, na unuseni ai.

<sup>4</sup> (A David ese Dirava ena maua helāgana na Kiriat-iearimi amo vada e mailaia; David ese e heĝaeĝaelaia gabuna ai, Ierusalem ai, vada e atoa; badina be ia ese kalagana auta vada e haginia Ierusalem ai.)

<sup>5</sup> Auri-laboralabora ihaboulaina patana. Besalele, Uri Huru natuna, ese e karaia ĝauna, na unuseni ai, Iehova ena kalaga helāgana vairanai. Bena Solomon bona hebou taudia iboudiai ese lehove e tahua.

<sup>6</sup> Bena Solomon na hari auri-laboralabora ihaboulaina patana e dae henia Iehova vairanai, hari hebou kalagana gabuna ai, bona ĝole-oho boubou ĝaudia datha-ta e hahelaĝadia ia latanai.

<sup>7</sup> Una hanuaboi ai Dirava ese Solomon e hahedinarai henia, e hereva henia, eto, A hereva, dahaka baina henimu.

<sup>8</sup> Bena Solomon ese Dirava e haere henia, eto, Oi ese tamagu David o bogaia hisi bada, bona pavapava ai vada o halaogu ia gabuna ai.

<sup>9</sup> Dirava Iehova e, emu gwauhamata tamagu David o henia na harihari ba hamomokania; badina be bese badana ta, tano gahuna na heto, edia pavapava ai vada o halaogu.

<sup>10</sup> Harihari aonega bona lalo-parara ba henigu, ini taunimanima vairadai baina raka lasi bona baina raka vareai; badina be emu orea badahereana binai daika ese baine lohiaia diba?

<sup>11</sup> Bena Dirava ese Solomon e haere henia, eto, Badina be emu lalo-hadai na iniheto, bona kohu eiava taḡa eiava imatauraimu so gwaurai, bona inaimu edia mauri so revadia, oibe, mauri daudaua danu so gwauraia, a aonega bona lalo-parara vada o gwaurai emu, egu orea taudia, pavapavadia ai vada na halaomu oreana, na ba lohiadia helaoreana,

<sup>12</sup> una dainai aonega bona lalo-parara do bavabi. Lau ese danu taḡa bona kohu bona imatauraimu baina henimu; pavapava ta, e gunalaimu tauna ta eiava murimu ai baine lohia tauna ta, na oi ida basie heḡereḡere.

<sup>13</sup> Taunabunai, Solomon na atai gabuna Gibeon ai, hebou kalagana vairana amo, e diho, Ierusalem ela. Bena ia ese Israel e lohiaia.

### *Solomon ena taḡa*

<sup>14</sup> Solomon ese kariota bona hosi-gui taudia na e haboudia. Ena kariota na daha-ta sinahu-hani, bona ena hosi-gui taudia na gerebu-ta daha-

rua,\* kariota hanuadia lalodiae bona Ierusalem ai, hanua pavapavana dekenai, e hanohodia.

<sup>15</sup> Hanua pavapavana ese *silver* bona *gold* na ġau pipikidia ai e halaodia Ierusalem ai, nadi na heheto; bona sida audia na e hahohodia, Sefela sukeaudia na heheto.

<sup>16</sup> Solomon ena hosi na Aigupto bona Kue amo e abidia; hanua pavapavana ena hoihoi taudia ese Kue amo e abidia, mai davadia.

<sup>17</sup> Kariota ta na Aigupto amo e abia, davana na *silver*<sup>†</sup> sekeledia sinahutauratoi; bona hosi ta davana na *silver* sekeledia sinahu-ta imahui. Bena idia ese ma e hoiholaidia lou, Hiti taudia edia pavapava iboudiae bona Suria pavapavadia ediae.

## 2

### *Solomon bona Hurama*

<sup>1</sup> Solomon ena lalo-hadai na dubu auta baine haginia, Iehova ladana ena, bona pavapava rumana auta, ia sibona ena.

<sup>2</sup> Bena Solomon ese tatau gerebu-hitu\* e haġaukaradia, kohu bae hua, bona gerebutaurahani, ororo kahadia ai nadi bae ġei, bona daha-toi sinahu-tauratoi na bae heita tao.

<sup>3</sup> Bena Solomon ese hereva e siaia, Hurama, Turo pavapavana, enai, eto, Sida audia na tamagu David dekena o siaidie, ena noho rumana baine haginia totona; ia o kara henia heġereġerena lau danu unu ba kara henigu toma.

\* **1:14** Gerebu-ta dhaħrua = 12,000.      † **1:17** *Silver* sekeledia sinahu-tauratoi na readia \$200 heġereġerena, ita eda moni ai. **Silver** sekeledia sinahu-ta imahui na readia \$50 heġereġerena.      \* **2:2** Gerebu-hitu = 70,000. Gerebu-taurahani = 80,000

<sup>4</sup> A itaia, lau na harihari dubu auta baina haginia, Iehova, egu Dirava, ladana ena, bona baina hahelaḡaia iena, muramura mai bonadia namodia ia vairanai bae gabudia bona flaoa helaḡana bae heniloulou bona daba bona adorahi ġole-oho bouboudia na dina helaḡadia ai bona hua matamatadia negadia ai bona Iehova, emai Dirava, ena aria dinadia ai bae hahelaḡadia totona, Israel taravana vada e atua ela bona hanaihanai heġereġerena.

<sup>5</sup> Bainā haginia dubuna na baine bada, badina be emai Dirava ese dirava iboudiai e hereadiamu.

<sup>6</sup> A daika ese iena ruma auta baine haginia diba? Badina be guba, oibe guba atai-dorivadorivana, na se heġereġere iena noho gabuna ai bainela. Lau be daika, iena ruma auta baina haginia? Lasi, muramura mai bonana ia vairanai bae gabua gabuna mo.

<sup>7</sup> Taunabunai, mani emu kara tau ta ba siaia mai, *gold* bona *silver* bona *bronze*† bona auri bona dabua mia-kakadią bona kakakakadia bona vaiuridia īgaukaralaidia bona ġau ikorodia mai dibana tauna; ia ese ġaukara idibaka taudia lau dekegu ai Iuda ai bona Ierusalem ai, tamagu David ese e abidia hidī taudia, na baine bamodia.

<sup>8</sup> Sida bona beroso‡ bona boto audia danu Lebanon amo ba siaidia mai, badina be lau dibagu oiemu hesiai taudia na Lebanon audia iutudia mai dibadia. Lauegu hesiai taudia na oiemu hesiai taudia ida

<sup>9</sup> au momo herea bae abi heġaeġae egū, badina be baina haginia dubuna na baine bada bona hoata

---

† 2:7 “Bronze” na auri labora-laborana ta. ‡ 2:8 “Beroso” na au ta ladana, Heberu gado ai.

mase ġauna.

<sup>10</sup> Emu hesiai taudia, au-utu taudia, na davadia baina hen: e kwadi uitina koro gerebu-rua, bali koro gerebu-rua, vine ranuna bata gerebu-rua, bona dehoro bata gerebu-rua. §

<sup>11</sup> Bena Hurama, Turo pavapavana, ese ena haere na revareva amo e siaia lao, Solomon dekenai; eto, Iehova ese ena orea taudia e ura hendiāmu dainai, ia ese edia pavapava ai vada e halao mu.

<sup>12</sup> Hurama ma eto, Iehova, Israel Diravana, guba bona tanobada ikaradia Diravana, bae hanamo a; ia ese King David na natuna ta vada e henia, aonega tauna, mai ena diba-maoro bona mai ena lalo-parara. Ia ese dubu auta baine haginia, Iehova ena, bona pavapava rumana auta, ia sibona ena.

<sup>13</sup> Taunabunai lau ese ġau kara idibakana bona lalo-parara tauna ta vada na siaia vasi. Ia ladana na Huram-abi;

<sup>14</sup> ia na Dan iduhuna hahinen a natuna, a tamana na Turo tauna. *Gold* bona *silver* bona *bronze*, bona auri bona nadi bona au, bona dabua mia-kakadia bona vaiuridia bona kakakakadia bona aukadia, iġau karalaidia na mai dibana, bona ġau idau-idau ikorodia danu; bona ba henia ġau karadia dahaka dahaka baine karadia diba. Ia na oiemu ġau kara idibaka taudia, egu lohia oi tamamu David ena ġau kara idibaka taudia, ida bae ġau kara hebou.

§ **2:10** “Koro” na Heberu taudia edia hahetohō ġauna badana ta; 10 efa = 1 koro. “Bata” na Heheru taudia edia ranu ihahetohona ġauna ta. Bata gerebu-rua = 740,000 litres sisivana.

<sup>15</sup> Taunabunai, hari uit bona bali bona vine ranuna bona dehoro, egu lohia ese vada e herevalai īaudia, na vada baine siaidia, ena hesiai taudia dekediai.

<sup>16</sup> Bena ai ese dahaka dahaka o uramu audia na Lebanon ai baia utu; bena keridia baia rai, davara amo baia toidia vasi ela bona lopa; bena unu amo ba daelaidia Ierusalem ai.

<sup>17</sup> Bena Solomon ese idau bese taudia Israel tanona ai e nohova na e hagaudia, tamana David ese e karaia heğereğeren; iboudiai na domaga-ta gerebu-imma dahan-toi sinahu-tauratoi\* e davaridia.

<sup>18</sup> Bena ia ese e hağaukaradia: tatau gerebu-hitu na kohu bae hua; tatau gerebu-taurahani† na ororo kahadia ai nadi bae īei; bona tatau dahan-toi sinahu-tauratoi na heitatao taudia ai e halaodia, idia ese taunimanima bae hağaukaradia totona.

### 3

#### *Solomon ese Iehova ena dubu e haginiā*

<sup>1</sup> Bena Solomon ese Iehova ena dubu na Ierusalem ai e haginiā matama, Moria ororona ai; una gabu ai Iehova ese ia tamana David e hahedinarai henia, bena David ese una gabu e abia hidi, Oronana, tau Iebusu, ena uit ikwadina gabuna ai.

<sup>2</sup> Ena lohia lağanina iħahanina huana iħaruana ai, ia ese e haginiā matama.

\* **2:17** Domaga-ta gerebu-imma dahan-toi sinahu-tauratoi = 153,600

† **2:18** Gerehu-hitu = 70,000. Gerebu-taurahani = 80,000.

<sup>3</sup> Solomon ese Dirava ena dubu badidia na ini e karadia toma: latana na kiubit\* tauratoi-ahui (una na sene edia kiubit), bona lababana na kiubit ruahui.

<sup>4</sup> Dubu vairana kahana dehena ena lata na kiubit ruahui, dubu lababana heğereğeren; bona harana latana na kiubit sinahu-ta ruahui. Laloma kahana na *gold* ġoева-daena amo e ġovaia.

<sup>5</sup> Dubu laloikoudia na berozo audia, *gold* ġoeva-daena amo e ġovadia, bona heraheradia e kara, pamu audia bona *gold* varodia.

<sup>6</sup> Dubu na daya-bada nadidia namohereadia amo e haheraia; bona *gold* na Paravaimi *gold*-na.

<sup>7</sup> Taunabunai, ia ese dubu idoinai, lavadia bona raka-vareai audia bona habadia bona iduaradia, na *gold* amo e ġovadia; bona haba ai na kerubi e korodia.

<sup>8</sup> Bena ia ese helağ-a-herea gabuna e karaia; ena lata, dubu lababana heğereğeren, na kiubit ruahui, bona ena lababa na kiubit ruahui; bena *gold* ġoeva-daena talent sinahu-tauratoi<sup>†</sup> amo e ġovaia.

<sup>9</sup> Ikoko metaudia na *gold* sekele imahui.<sup>‡</sup> Atai daiutudia danu na *gold* amo e ġovadia.

<sup>10</sup> Helağ-a-herea gabuna ai ia ese kerubi rua au amo e korodia, bona *gold* amo e ġovadia.

<sup>11</sup> Kerubi ruaosi hanidia e toi roro negana ai edia lata idoinai na kiubit ruahui. Kerubi ta hanina ta, ena lata na kiubit ima, be dubu habana ai e hetomu kau, ma hanina ta, ia danu ena lata

\* <sup>3:3</sup> Kiubit ta = 44 centimetres sisivana. Sene negana ai kiubit na sisina lata; a uru gabedia ese taina e hakwadogia. † <sup>3:8</sup> **Gold talents**inahu-tauratoi = 20 tonnes sisivana. ‡ <sup>3:9</sup> **Gold**sekele imahui = 820 grams sisivana.

na kiubit ima, be kerubi iharuana hanina ida e hetomu heheni;

<sup>12</sup> bona una kerubi hanina ta, ena lata na kiubit ima, be dubu habana ai e hetomu kau, ma hanina ta, ia danu ena lata na kiubit ima, be kerubi gini-gunana hanina ida e hetomu heheni.

<sup>13</sup> Hari kerubi ruaosi hanidia edia lata idoinai na kiubit ruahui; kerubi na aedia ai e gini, dubu e vaira henia.

<sup>14</sup> Ia ese seseahu na dabua vaiunna bona miakakana bona kakakakana bona aukana amo e karaia, bona kerubi laulaudia na seseahu dabuana ai e turi kau.

### *Hurama ena ġaukara dubu ai*

<sup>15</sup> Dubu vairanai ia ese au-tubua rua e kara, edia lata na kiubit toi-ahui ima; bona ta ta doridia ai kwara ikorodia e kara, edia lata na kiubit ima.

<sup>16</sup> Bena auri varodia e kara, ageva na heto, autubua doridia ai e atodia. Rimono<sup>§</sup> huahuadia laulaudia sinahu-ta danu e kara, hari auri varodia ai e hakamo kau.

<sup>17</sup> Unu au-tubua na dubu vairanai e haginidia, ta diho kahana ai bona ta mirigin kahana ai; diho kahana ġauna ladana e hatoa lakin, bona mirigin kahana ġauna ladana e hatoa Boa.

## 4

<sup>1</sup> Ia ese ihaboulaina patana na auri laboralabora amo e karaia. Ena lata na kiubit ruahui bona ena lababa danu kiubit ruahui, bona harana latana na kiubit gwauta.

<sup>2</sup> Bena ranu nauna bada-hereana na auri laboralabora, e havevea ġauna, amo e karaia. Ia

---

§ **3:16** “Rimono” na au huahua ta ladana, Heberu gado ai.

na kuboro-kuboro; ena lababa na kiubit gwauta, harana latana na kiubit ima, bona e hahetohoā hegege na kiubit toi-ahui.

<sup>3</sup> Ia henunai na popou laulaudia, kiubit toi-ahuiosi ai e kara, nau e hahegeā dae; hari popou na ere rua ai e kara, nau ai e karaia kau tamona, e hahetaria negana ai e hahetaridia hebou.

<sup>4</sup> Hari nau na boromakau mamaruanedia laulaudia gwauta-rua latadiai e helai kau: toi mirigini kahana e vaira henia, ma toi lahara kahana, ma toi diho kahana, ma toi laurabada kahana. Hari nau na idia latadiai e heato kau, bona iboudiai e hekunu heheni.

<sup>5</sup> Nau udunana na ima palapala lababana hegeregerena; isena na kehere isena hegeregerena, sosana heraherana na heto. Ia anina na ranu bata daha-toi\* mai kahana.

<sup>6</sup> Ia ese danu tohe gwauta e karadia, hurihuri gaudia; ima na diho kahana ai e atodia, bona ima na mirigini kahana ai. Idia lalodaiā gole-oho boubou gaudia na e huridia, a hari nau badaherana na hahelaā taudia edia hehuri gauna.

<sup>7</sup> Ia ese danu lamepa patadia gwauta, *gold* gaudia, na e karadia, e gwauraidia guna hegeregerena; bena dubu lalonai e atodia, ima na diho kahana ai bona ima na mirigini kahana ai.

<sup>8</sup> Bona pata gwauta danu e karadia, dubu lalonai e atodia, ima na diho kahana ai bona ima na mirigini kahana ai. Ia ese danu nau sinahu-ta na *gold* amo e karadia.

---

\* **4:5** “Sosana” na au heraherana ta ladana, Heberu gado ai. “Bata” na Heberu taudia edia ranu iahetohona gauna ta. Bata daha-toi = 110,000 litres sisivana.

<sup>9</sup> Hahelaġa taudia edia magu bona maġu badana danu e karadia, bona magu iduaradia; hari iduara na auri labora-labora amo e govadria.

<sup>10</sup> Nau bada-hereana na dubu laurabada kahana daigunina ai e haginia.

<sup>11</sup> Hurama ese danu uro bona gaga bona nau e karadia. Taunabunai, King Solomon ese e henia ġaukaradia na Hurama ese e ha-oredia, Dirava ena dubu ai:

<sup>12</sup> au-tubua ruaosi, ilahasi-kuborodia, bona au-tubua doridia ikorodia; bona reke-hetomana ġaudia ruaosi hari au-tubua doridia ikorodia ilahasi-kuborodia iġegelaidia;

<sup>13</sup> bona rimono huahuadia laulaudia sinahuhani, reke-hetomana ġaudia ruaosi edia, rimono huahuadia ere rua reke-hetomana ta ta edia, au-tubua doridia ikorodia ilahasi-kuborodia iġovalaidia.

<sup>14</sup> Ia ese rerue danu e karadia, bona tohe rerue latadiai;

<sup>15</sup> bona nau bada-hereana tamona, bona boromakau mamaruanedia gwauta-ruaosi laulaudia ia henunai.

<sup>16</sup> Uro bona gaga bona kahi, mai kohudia iboudiai ida, na Huram-abi ese e karadia, King Solomon ena; auri labora-labora amo e karadia kimore-kimore, Iehova ena dubu ena.

<sup>17</sup> Unu ġau na hanua pavapavana ese raro tanona gabuna ai e hahetaridia, Ioridane taorana ai, Sukoto bona Sereda padadiai.

<sup>18</sup> Solomon ese ini ġau iboudiai e karadia momomomo; taunabunai auri labora-labora metauna na asie hahetoho.

<sup>19</sup> Taunabunai Solomon ese Dirava ena dubu

kohuna iboudiai e karadia: ihaboulaina patana, *gold* ġauna; bona flaoa helaġana patadia,

<sup>20</sup> bona lamepa patadia mai lamepadia ida, *gold* ġoеваġoевана amo e karadia, laloma daiutuna helaġana vairanai bae ara totona, taravatu hegereggerena;

<sup>21</sup> bona herahera bona lamepa bona ikahi, *gold* ġoева-daena ġaudia;

<sup>22</sup> bona lamepa ihaġoевадия ġaudia, bona nau, bona muramura mai bonadia urodia, bona gida keberedia, *gold* ġoеваġoевана ġaudia; bona iduara ihahelai-dobidia, helaga-herea gabuna iduaradia bona dubu iduaradia ġaudia, na *gold* amo e kara.

## 5

### *Maua helaġana na Dubu lalonai e vareailaia*

<sup>1</sup> Taunabunai, Iehova ena dubu ġaukaradia iboudiai na Solomon ese e karadia ore. Bena tamana David ese e hahelaġadia gaudia na Solomon ese e vareailaidia, *silver* bona *gold* bona ġau idau-idau iboudiai na Dirava ena dubu ena habou-habou daiutudia ai e haboudia.

<sup>2</sup> Bena Solomon ese Israel tau-badadia bona iduhu lohiadia iboudiai bona Israel taudia edia iduhu igunalaidia taudia na Ierusalem ai e haboudia, Iehova ena taravatu mauana na David ena hanua, ladana Siona, amo bae daelaia totona.

<sup>3</sup> Hua ihahituna ariana negana ai, Israel tataudia iboudiai na hanua pavapavana vairanai e hebou.

<sup>4</sup> Israel tau-badadia iboudiai ema; bena Levi taudia ese maua helaġana e abia isi.

**5** Maua helaḡana bona hebou kalagana bona ġau helagadia, kalaga lalonai e miava gaudia, iboudiai na e daelaidia; hahelaḡa taudia bona Levi taudia ese e daelaidia.

**6** Bena King Solomon bona Israel hegogona idoinai, ia vairanai vada e hebou taudia, na maua helaḡana vairanai e gini, mamoe bona boromakau mamaruanedia momo herea na boubou ġaudia ai e halaodia, asi ihagaudia bona asi iduahidia.

**7** Taunabunai hahelaḡa taudia ese Iehova ena taravatu mauana na e mailaia, ena gabu ai e atoa, dubu ena laloma daiutuna helaḡana lalonai, helaḡa-herea gabuna ai, kerubi hanidia henudiai.

**8** Badina be kerubi ese hanidia e toi roro, maua helaḡana ena gabu daenai; taunabunai kerubi ese maua helaḡana mai madunana audia ida e govardia ahu.

**9** Hari maduna audia na lalata heherea dainai, dududia na laloma daiutuna helaḡana vairana kahana ai dubu irutahunana amo e heitava; a dubu murimurina amo na asie heitava. Unu e mia tomamu ema bona ina dina.

**10** Asi ġau ta maua helaḡana lalonai, hari hurnadidia palakadia ruaosi, Horeb ai Mose ese e udadia ġaudia mo; una na vanegai Iehova ese Israel taudia taravadia e atu gabuna, Aigupto tanona amo e raka lasiva negana ai.

**11** Una negana ai hahelaḡa taudia na gabu helaḡana amo e raka lasi; badina be hahelaḡa taudia iboudiai una hebou ai na sibodia vada e hahelaḡa, edia oreia na asie lalodia.

**12** Bena ane-abi taudia Levi iduhuna amo, Asaf bona Hemana bona ledutunu mai natudia bona varavaradia ida, na dabua aukadia e hahedokilai,

bona edia botabota auridia bona edia hatai-hatai ġaudia badadia bona maraġidia e abidia; bena ihaboulaina patana mairiveina kahana ai, hahe-laġa taudia sinahu-ta ruahui, kibi-hiriri taudia, ida e gini.

<sup>13</sup> Hari kibi-hiriri taudia bona ane-abi taudia edia ġaukara be Iehova bae imodaia bona bae hanamo a hebou. Bena ane e ladaia isi, mai kibi bona botabota auridia bona hatai-hatai ġaudia idau-idau regedia ida, Iehova ihanamolaina: eto, Badina be ia na namo; Badina be ena hebogahisi na e hesiriu hanai-hanaimu.

Una negana ai hari dubu, Iehova ena dubu, na ori ta ese e hahonua;

<sup>14</sup> bena hahelaġa taudia na hesiai karadia ikaradia totona asie gini diba, ori dainai; badina be Iehova hairaina ese Dirava ena dubu e hahonua.

## 6

### *Dubu ihahelaġana*

<sup>1</sup> Bena Solomon eto,  
Iehova vada e hereva,  
dibura masemase lalonai baine noho eto,  
<sup>2</sup> Lau ese rum a herea-daena vada na hadaia  
oiemu,  
emu noho gabuna ai bainela, ela bona hanai-hanai.

<sup>3</sup> Bena Israel taudia, una hegogo taudia, do gindia ai, hanua pavapavana na e gini kerehai, Israel hegogona idoinai e hanamo a.

<sup>4</sup> Ia eto, Iehova, Israel Diravana, aita hanamo a.  
Ia ese ena gwauhamata, uduna amo tamagu

David e hamaorolaia ġauna, na imana amo vada e hamomokania. Ia eto

<sup>5</sup> “Egu orea taudia na Aigupto tanona amo na hakaua lasi dinana amo ema, Israel iduhuna iboudiai lalodia amo hanua ta asina abia hidi, lau ladagu baine noholaia rumana auta baine gini gabuna; bona tau ta asina abia hidi, egu bese Israel baine lohiaia.

<sup>6</sup> A harihari lau ese Ierusalem vada na abia hidi, lau ladagu na unuseni ai baine noho; bona David vada na abia hidi, egu hese Israel baine lohiaia.”

<sup>7</sup> Tamagu David ena lalo-hadai be dubu auta baine haginia, Iehova, Israel Diravana, ladana ena.

<sup>8</sup> A Iehova ese tamagu David e hamaoroa, eto “Emu lalo-hadai be lau ladagu dubuna auta ba haginia, bona unu o laloa tomamu be namo;

<sup>9</sup> ġau tamona, oi na dubu basio haginia, a natumu, do baine vara merona, ese lau ladagu dubuna baine haginia.”

<sup>10</sup> Harihari Iehova ese ena gwauhamata vada e hamomokania; badina be lau vada na tore isi, tamagu David gabuna ai, bona Israel teronona ai na helaimu, Iehova ena gwauhamata heġereġerena, bona dubu vada na haginia, Iehova, Israel Diravana, ladana ena.

<sup>11</sup> Unuseni ai maua helaġana vada na atoa; ia lalonai Iehova ena taravatu, Israel taudia taravia dia e atulai ġauna, na e heudamu.

<sup>12</sup> Bena Solomon na Iehova ena ihaboulaina patana vairanai e gini, Israel hegogona idoinai vairanai; bena imana na e toi roro.

<sup>13</sup> Solomon na pata ta auri labora-labora amo vada e karaia, dubu maġuna ai vada e haginia; ena

lata na kiubit ima, ena lababa danu kiubit ima, bona harana latana na kiubit toi. Ia na latanai e gini, tuina e hadai, Israel hegogo idoinai vairanai, bona imana e toi roro, guba e dudui henia.

<sup>14</sup> Bena eto, Iehova e, Israel Diravana, asi Dirava ta oi hegeregēremu, guba ai eiava tanobada ai; emu gwauhamata o badinaiamu, bona emu hesiai tau-dia, oi vairamu ai e rakamu mai lalodia idoidiai ida taudia, o bogadia hisimu.

<sup>15</sup> Oi ese emu hesiai tauna lau tamagu David o hamaorolaia herevana vada o badinaia; oibe, udumu amo o gwauraia bona imamu amo vada o hamomokania hari ina dina ai.

<sup>16</sup> Taunabunai, Iehova e, Israel Diravana, emu hesiai tauna lau tamagu David o gwau henia hamata ġauna na ba badinaia, oto “Natumu na edia dala nahuadia bema toho bona lau vairagu ai bema raka, oi ese lau vairagu ai vada o raka hegeregērena, oi garamu ese basie moru, Israel teronona ihelai-kauna ai”.

<sup>17</sup> Taunabunai, Iehova e, Israel Diravana, emu hereva, emu hesiai tauna David o hamaorolaia herevana, na ba hamomokania.

<sup>18</sup> To Dirava na momokani taunimanima ida tanobada ai baine noho a? A itaia, guba atai doriva-dorivana na se hegeregēre emu noho gabuna; matona, ina lau ese vada na haginia dubuna na ede baine hegeregēre toma?

<sup>19</sup> Ĝau tamona, emu hesiai tauna egu ġuriġuri bona egu noinoi bavabi dae. Iehova e, egu Dirava, emu hesiai tauna egu taitai bona egu ġuriġuri oi vairamu ai na ba hakala hen;

<sup>20</sup> bena ina dubu, vada o gwauraia hamata oi ladamu na iniseni ai bavatoa gabuna, na dina ai

bona hanuaboi ai ba haġerea, emu hesiai tauna egu ġuriġuri, ina gabu enai na gwauraiamu ġauna, na ba hakala henia totona.

<sup>21</sup> Emu hesiai tauna bona emu bese Israel na emai ġuriġuri ai ina gabu baia vaira henia negadia ai, emai noinoi ba kamonai; oibe, guba ai emu noho gabuna amo ba kamonai; bona ba kamonai negana ai emai dika ba gwau tao.

<sup>22</sup> Tau ta ese ia dekena tauna bema kara dika henia, bena bema haduaia baine gwau hamata, bena bainema, ena gwauhamata na ina dubu lalonai emu ihaboulaina patana vairanai baine gwauraia,

<sup>23</sup> oi ese guba ai ba kamonai, bona karana ba karaia; emu hesiai taudia ba hahemaoro henidia, kerere tauna na ba revaia, ena kara na ia sibona kwarana ai ba haloua, bona kara maoromaoro tauna na maorona ba gwauraia, ena kara maormaoro heġereġerena davana do ba henia.

<sup>24</sup> Emu bese Israel na inaidia vairadai bema darere, oiemu ai vada e kara dika dainai, negadia ai na bema lou henimu, bena oi ladamu bema matauraia, bona ina dubu ai bema ġurimu bona bema noi henimu,

<sup>25</sup> oi ese guba ai ba kamonai, bona emu bese Israel edia dika ba gwau tao, bona ba loulaidia, idia bona senedia o henidia tanona lalonai.

<sup>26</sup> Emu ai bae kara dika dainai guba baine hekou bona medu basine diho negadia ai, ina gabu enai bema ġuriġuri, bona oi ladamu bema matauraia, bona ba hahisihisidia negadia ai edia kara dika bema rakatanidia,

<sup>27</sup> oi ese guba ai ba kamonai, bena emu hesiai taudia, emu bese Israel, edia dika ba gwau tao,

edia raka dalana namona ba hadibalaidia negana ai; bona emu tano, emu bese taudia vada o henidia bae ġaunaia tanona, latanai medu ba hadihoa.

**28** Tano ai doe bema vara, eiava dai-hanai gorerenia, eiava hogohogo eiava valavala eiava kwadi eiava rautunu; eiava inaidia na edia hanua ta ai bema koudia heğeğe; eiava edena gorere eiava edena hisihisi bema vara;

**29** una negana ai edena guriğuri eiava edena noinoi tau ta ese eiava emu bese Israel taudia iboudiai ese bae henimu, ta ta sibona sibona ena hisihisi bona ena lalo-hisihisi dibadia ai bona imadia ina dubu bae toi roro henia ai,

**30** oi ese emu noho gabuna guba ai ba kamonai bona edia dika ba gwau tao, bona lalodia o dibadiamu taudia ba kara henidia, ta ta ena kara ena kara heğereğerena ba henidia, badina be oi sibomu ese taunimanima natudia iboudiai lalodia o dibadiamu.

**31** Taunabunai, idia ese oi garimu bae gari bona oiemu dala ai bae raka, senemai o henidiamu tanona ai bae noho dinadia iboudiai lalodiai.

**32** Unuhetomana danu idau tauna ta, dia emu bese Israel tauna ta, na tano daudauna amo bainema, oi ladamu herea-daena bona imamu goadana bona imamu hetoi-rorona bagudiai; bena bainema, ina dubu enai baine ġuriğuri;

**33** una negana ai emu noho gabuna guba ai ba kamonai, idau tauna ena noinoi gaudia iboudiai ba henia; unu amo tanobada besedia iboudiai ese oi ladamu bae diba bona oi garimu bae gari, emu bese Israel heğereğeredia, bona bae diba danu ina lau ese vada na haginia dubuna na oi ladamu vada e hahenemailaia.

<sup>34</sup> Emu orea taudia ese inaidia bema tuari henidia, oi ese boma siaidia dalana ta amo, bena ina oi ese vada o abia hidi hanuana enai bona oi ladamu dainai vada na haginia dubuna enai bema ġuriġuri,

<sup>35</sup> oi ese guba ai edia ġuriġuri bona edia noinoi ba kamonaidia, bona edia namo ba hamiaia.

<sup>36</sup> Oiemu ai kara dika bema kara (badina be dika se karamu tauna ta na lasi), bena boma badu henidia bona inaidia imadia ai boma atodia, bena mai iġuidia ida inaidia edia tano bema laohaidia, gabu daudau eiava kahikahi,

<sup>37</sup> ġau tamona, mai iġuidia ida e laohaidia tanona ai bema haeroa bona bema helalo kerehai, bona e ġuidia taudia edia tano ai oi bema tai henimu, bema toma “Ai na vada a kerere, vada a kara havara, vada a kara dika”;

<sup>38</sup> oibe, bema helalo kerehai mai daradia idoidiai bona mai lalodia idoidiai, inaidia, hari e ġuidia taudia edia tano ai, bona edia tano, senedia o henidia tanona, bona o abia hidi hanuana, bona ina oi ladamu bagunai vada na haginia dubuna, bema vaira henidia, oi bema ġurimu,

<sup>39</sup> oi ese emu noho gabuna guba ai edia ġuriġuri bona edia noinoi ba kamonai, bona edia namo ba hamiaia, bona emu orea taudia edia kara dika oiemu ai do ba gwau tao.

<sup>40</sup> Egu Dirava e, harihari oi matamu a hapapadia bona taiamu a hakiraradia, ina gabu ġuriġurina enai.

<sup>41</sup> Dirava Iehova e, harihari a tore isi, emu laġa-anġ  
gabuna baola,  
oi bona emu siahu maua-helagana;

Dirava Iehova e, emu hahelaḡa taudia ese hahe-mauri bae hahedokilaia,  
emu helaḡa taudia ese emu namo bae moale-laiā;

<sup>42</sup> Dirava Iehova e, o horoa tauna vairana basio  
hamedea kerehai,  
emu hebogahisi emu hesiai tauna David enai  
ba laloa tao.

## 7

<sup>1</sup> Solomon ese ena ġuriġuri e ha-oreia, bena lahi na guba amo e diho, ġole-oho bouboudia bona boubou gaudia idau-idau e hagoledia oho; bona Iehova hairaina ese dubu e hahonua.

<sup>2</sup> Bena hahelaḡa taudia na asi edia dala Iehova ena dubu ai bae raka vareai, badina be Iehova hairaina ese Iehova ena dubu e hahonua.

<sup>3</sup> Bena Israel taudia ese lahi e diho bona Iehova hairaina dubu latanai e itadia negana ai, idia na e igo diho, tano ai e goru parapara ariara ai; bena idia ese Iehova e toma henia diho bona e hanamoia, eto,  
Badina be ia na namo,  
badina be ena hebogahisi na e hesiriu hanai-hanaimu.

<sup>4</sup> Bena hanua pavapavana bona taunimanima iboudiai ese boubou ġaudia e hahelaḡadia, Iehova vairanai.

<sup>5</sup> King Solomon ese boromakau mamaruandia gerebu-rua daha-rua\* bona mamoe domaga-ta gerebu-rua e hahelaḡadia, ena boubou gaudia. Unu amo hanua pavapavana bona taunimanima iboudiai ese Dirava ena dubu e hahelaḡaia.

---

\* <sup>7:5</sup> Gerebu-rua daha-rua = 22,000. Domaga-ta gerebu-rua = 120,000.

**6** Hahelaḡa taudia na edia ġaukara gabudia ai e gini; bona Levi taudia danu, mai edia hatai-hatai ġaudia bona edia botabota auridia idau-idaudia, Iehova ena; unu na King David ese Iehova ihanamolaina totona e kara ġaudia (badina be ena hebogahisi na e hesiriu hanaihanaimu), bona David ena hahenamo negadia iboudiai e hataidia bona e botadia. Hahelaga taudia ese e hevaira henidia, bona kibi e hiriri; bona Israel taudia iboudiai na e gini noho.

**7** Solomon ese danu dubu maġuna lalona bogaraginai, Iehova ena dubu vairanai e miava ġauna, na e hahelaḡaia; badina be unuseni ai ia ese ġole-ohobouboudia bona digara seadia herohemaino boubouna ġaudia e hahelaḡadia; badina be auri labora-labora ihaboulaina patana, Solomon ese e karaia ġauna, na dia bada, ġole-ohoboubouna bona flaoa boubouna bona digara boubouna ġaudia na ia latanai bae ato.

**8** Una negana ai Solomon ese aria e karaia, dina hitu lalodiae, bona Israel idoinai ia ida, hegogo bada-hereana, Hamat e raka vareai gabuna amo ela bona Aigupto Dokana.

**9** Bena dina ihataurahanina ai idia ese hebou helāgħana e karaia; badina be ihaboulaina patana na dina hitu lalodiae vada e hahelaḡaia, bona aria na dina hitu lalodiae vada e karaia.

**10** Bena hua iħahituna dinana iħaruahui-toina ai ia ese taunimanima e siaidie karoħo, edia rumba baela; idia na mai moaledia bona mai lalonamodia, badina be Iehova ese ena hahenamo na David bona Solomon bona ena bese Israel vada e hahedinarai henidia dainai.

*Dirava ese Solomon ma e hahedinarai henia*

**11** Solomon ese Iehova ena dubu bona pavapava ena ruma na unu e ha-oredia toma; Solomon ese e lalo hatalai ġaukaradia iboudiai, Iehova ena dubu ai bona ia sibona ena ruma ai, e ha-oredia vaitani.

**12** Bena hanuaboi ai Iehova ese Solomon e ha-hedinarai henia, bona e hereva henia. eto, Emu ġuriġuri vada na kamonai, bona ina gabu vada na abia hidi egu, boubou dubuna ai bainela.

**13** Guba baina koua bena medu basine diho, eiava kwadi baina haġanidia, tano anidia bae ani ore, eiava dai-hanai gorerena baina siaia egu orea taudia bogaragidiai,

**14** unu negadia ai, egu orea taudia, lau ladagu e henemailai taudia, na sibodia bema hahemanau, bona bema ġuriġuri, lau vairagu bema tahua, bona edia dala dikadia bema rakatanidia, bona lau na guba amo baina kamonai, bona edia dika baina gwaudia tao, bona edia tano baina hanamo lou.

**15** Harihari matagu baina hapapa bona ta-iagu baina hakirara, ina gabu ai bae gwaurai ġuriġuridia ediai.

**16** Badina be harihari ina dubu vada na abia hidi bona vada na hahelaġaia, lau ladagu ese baine noholaia hanaihanai totona; matagu bona lalogu na unuseni ai, nega idoinai.

**17** Bona oi danu lau vairagu ai boma raka, tamamu David e rakava heġereġerena, bona na haġanilaimu ġaudia iboudiai heġereġeredia ai boma kara, bona egu taravatu bona egu hahedua boma badinadia,

**18** bema lau ese emu pavapava teronona baina hagini, tamamu David na gwau henia hamata heġereġerena, nato “Oi garamu ta basine moru,

Israel ireğuna ai".

<sup>19</sup> A boma raka siri, egu taravatu bona egu haheğani, oi vairamu ai vada na ato ġaudia, na boma rakatanidia, bona boma lao, dirava idaudia isiaidia boma lao heni bona boma toma henidia diho,

<sup>20</sup> bena lau ese vada na henimu tanona amo baina butumu oho, bona ina dubu, vada na haheğalaia lau ladagu ena, na lau vairagu amo baina negea, bona hereva lada-isina bona udu gwaurai-gwaurai herevana ai baina halaoa, bese iboudiai bogaragidiai.

<sup>21</sup> Ina dubu danu, harihari e imodaiamu ġauna, na raka-hanai taudia iboudiai ese bae hoalaia, baeto, Badina be dahaka Iehova ese ina tano bona ina dubu na ini vada e karadia toma?

<sup>22</sup> Ma baeto, Badina be Iehova, senedia edia Dirava, Aigupto amo e hakaudia lasi Diravana, idia ese e rakatania, bena dirava idaudia e abidia, e toma henidia dihova bona isiaidia e lao heniva; taunabunai ia ese ina dika idoinai na idia latadiai vada e kara.

## 8

### *Solomon ena ġaukara haida*

<sup>1</sup> Lağani ruahui e ore; unu lağani lalodiai Solomon ese Iehova ena dubu bona ia sibona ena rumu vada e haginidia.

<sup>2</sup> Bena Hurama ese vada e henia hanuadie na Solomon ese e haginidia lou, bona Israel taudia na lalodiai e hanohodia.

<sup>3</sup> Solomon na Hamata-soba ela, bona e abia.

<sup>4</sup> Ia ese Tadamoro e haginia, tano ġaġaena ai, bona kohu-habou hanuadie iboudiai Hamat ai danu e haginidia.

**5** Ia ese Betehorono atai bona henu hanuadia ruaosi e haginidia; idia na hanua aukadia, mai mağudia bona ikoukoudia bona auridia;

**6** bona Baalata, bona Solomon ena kohuhabou hanuadia iboudiai, bona ena kanota hanuadia iboudiai, bona ena hosi-gui taudia edia hanua, bona Solomon ena ura rumadia iboudiai, Ierusalem ai bona Lebanon ai bona e lohiaia tanona idoinai lalonai, danu e haginidia.

**7** Hiti bona Amoro bona Perisi bona Hivi bona Iebusu taudia oredia, dia Israel besena taudia,

**8** garadia dounu tano ai e nohova, Israel asie habuadia tari taudia, na Solomon ese e hağaukaradia; bona unu e noho tomamu ema bona ina dina.

**9** A Solomon ese Israel taudia ta se ġuia bona ta se hagaukaraia; idia na tuari taudia bona tuari biagudia, kariota biagudia bona hosi-gui taudia.

**10** King Solomon ena heitatao taudia na tatau sinahu-rua imahui; idia ese taunimanima e biagudia.

**11** Solomon ese Farao natuna hahinenā na David ena hanua amo e hakaua dae, ena ruma, e haginia ġauna, lalonai; badina be ia eto, Adavagu na David, Israel pavapavana, ena ruma ai basine noho, badina be Iehova ena maua vada e heato gabudia na hehelaġa.

**12** Bena Solomon ese ġole-oho boubou ġaudia e hahelaġadia, Iehova ena, Iehova ena ihaboulaina patana, dubu dehena vairanai e haginia ġauna, latanai.

**13** Dina ta ta ahudia e gwaurai heġereġerena ai e hahelaġadia, Mose ena haheġani heġereġerena, dina helagadia edia, bona hua matamatadia edia, bona

aria toiosi, laġani ta ta amo e kara gaudia, asie hatubua flaoana ariana bona pura ariana bona kalaga ariana, edia.

<sup>14</sup> Tamana David ena hahedua heġereġerena, ia ese hahelaġa taudia e duanaidia orea ta ta lalodai, edia ġaukara ikarana totona; bona Levi taudia danu edia heimodai bona edia hesiai gaukaradia hahelaġa taudia vairadai, dina ta ta e gwaurai ġaukaradia heġereġeredia; bona ikoukou igimadia taudia edia orea lalodai, ikoukou ta ta edia; badina be David, Dirava ena tau, ese unu e ha-heġanilaia toma.

<sup>15</sup> Bona hanua pavapavana ese hahelaġa taudia bona Levi taudia na ġau ta dainai eiava habou-habou daiutudia ġaukaradia daidiae haganilaidia daladia amo asie raka siri.

<sup>16</sup> Solomon ena ġaukara iboudiae na unu e kardia toma, Iehova ena dubu badina e hadaia dinana amo ela bona e ha-oreas negana. Iehova ena dubu na unu e haginia toma.

<sup>17</sup> Bena Solomon na Esiono-gebere bona Elata ela, davara konena ai, Edom tanona lalonai.

<sup>18</sup> Bena Hurama ese ena hesiai taudia imadia amo lagatoi haida e siaidia, ia dekenai, bona lagatoi taudia, davara ġaukaradia mai dibadia taudia, haida danu. Bena idia na Solomon ena hesiai taudia ida Ofiri ela, unu amo *gold talent* sinahuhani imahui\* e abi, King Solomon dekena e mailai.

## 9

### *Sieba pavapavana hahinena*

---

\* **8:18 Gold talents**sinahuhani imahui na 22 tonnes sisivana.

<sup>1</sup> Sieba pavapavana hahinena na Solomon harina namona e kamonai negana ai, ia na Ierusalem ema, henanadai aukadia amo baine tohoa totona. Ia na mai ena hesiai taudia hutuma; bona ena kamelo ese aniani mamidia ihanamodia muramuradia bona *gold* momo herea bona dava-bada nadidia e hua. Solomon dekenai e kau, bena ena lalo-hadai iboudiai na ia e hamaorolaia.

<sup>2</sup> Bena Solomon ese ena henanadai iboudiai e haerelai henia; Solomon enai īgau ta na dia hehuni, iboudiai ia ese e hahedinarai henia.

<sup>3</sup> Sieba pavapavana hahinena ese Solomon ena aonega e itaia, bona e haginia rumana,

<sup>4</sup> bona ena pata anianidia, bona ena heitatao taudia edia helai gabudia, bona ena hesiai tau-dia edia kara bona edia dabua, bona ena kehere iloalaina taudia bona edia dabua, bona ena gole-oho bouboudia, Iehova ena dubu ai e hahelaġadiahā; bena lalona e boio.

<sup>5</sup> Bena hari hahine ese hanua pavapavana e hamaoroa, eto, Egu tano ai emu kara bona emu aonega haridia na kamonai iboudiai na momomo-kakani,

<sup>6</sup> a unu hari na asina abidia dae ema bona nama, sibogu matagu amo name ita; a, emu aonega bada-hereana kahana na asie hamaorogu; na kamonai harina na oi ese o hereaiamu.

<sup>7</sup> Adavarnu na daka moale! Emu hesiai tau-dia bini, dina iboudiai oi vairamu ai gigini bona emu aonega herevadia e kamonaimu danu daka moale!

<sup>8</sup> Iehova, emu Dirava, bae imodaia; ia ese vada e lalo namo henimu, bona iena terono ai vada e ha-helaimu kau, pavapava ai baola, Iehova, emu Di-

rava, ena. Badina be emu Dirava ese Israel taudia vada e ura henidia, baine haginidia hanaihanai e tomu, una dainai ia ese edia pavapava ai vada e halaomu, hahemaoro bona kara maoromaoro ba kara helaoareana.

<sup>9</sup> Bena hari hahine ese hanua pavapavana na *gold talent* sinahu-ta ruahui,\* bona aniani mamidia ihanamodia muramuradia momoherea, bona dava-bada nadidia, e henia; asi aniani ihanamodia muramuradia haida unu Sieba pavapavana hahinenesa Solomon e henia ġaudia heġereġeredia.

<sup>10</sup> Ma ina danu, Hurama ena hesiai taudia bona Solomon ena hesiai taudia, Ofiri amo *gold* e mailaia taudia, na boto audia bona dava-bada nadidia danu e mailai.

<sup>11</sup> Unu boto audia amo hanua pavapavana ese vadavada e kara, Iehova ena dubu ġaudia bona pavapava ena rumā ġaudia, bona ane-abī taudia edia gitara bona edia hatai-hatai ġaudia badadia danu. Unuhetomadia na nega hata asie ita guna Iuda tanona ai.

<sup>12</sup> Bena King Solomon ese Sieba pavapavana hahinenana ena ura gaudia iboudiai e henia; e noi ġaudia iboudiai na hanua pavapavana enai e mailai ġaudia davadia latadiai ma e ato kau. Bena hahine na e tore isi, ena hesiai taudia ida ena tano korikori e lou lao.

### *Solomon ena taġa*

---

\* **9:9 Gold talents**sinahu-ta ruahui na 6 tonnes sisivana.

**13** Laḡani tamona lalonai Solomon dekena e mailaia *gold*-na ena metau na talent sinahu-tauratoi tauratoi-ahui tauratoi;†

**14** bona haida danu laolao taudia bona hoihoi taudia ese e mailai; bona Arabia pavapavadia iboudiai bona tano lohiadia ese *gold* bona *silver* na Solomon dekena e siai lao.

**15** King Solomon ese *gold* kesidia badadia sinahu-rua, e hodo palaka-palaka ġaudia, na e karadia; kesi ta ta ai e hodoa palaka-palaka *gold*-na metauna na sekele sinahu-tauratoi.‡

**16** Bona *gold* kesidia sinahu-toi, e hodo palaka-palaka ġaudia, ma e karadia; kesi ta ta ai *gold* metauna na sekele sinahu-toi.§ Unu kesi na hanua pavapavana ese Lebanon Uda Rumana ai e atodia.

**17** Hanua pavapavana ese danu terono badana na aivori\* amo e karaia, bona *gold* ġoevaġoevana amo e ġovaia.

**18** Hari terono ena vadavada na tauratoi, bona mai ae-hadai ġauna, *gold* amo e karaia, terono ida e karadia tamona. Helai ġauna ohena kahana kahana na ima ato-kau gabudia, bona hari ima ato-kau ġaudia badibadidiae na leona rua laulaudia ginidia ai e korodia.

**19** Leona gwauta-rua laulaudia na hari vadavada tauratoiosi ta ta duduna duduna ai e haginidia. Basileia idau-idau iboudiai lalodiae unuhetomana ta nega ta ai asie karaia.

† **9:13** *Gold talents* sinahu-tauratoi tauratoi-ahui tauratoi na 33 tonnes sisivana. ‡ **9:15** Sekele sinahu-tauratoi na 10 kilograms sisivana. § **9:16** Sekele sinahu-toi na 5 kilograms sisivana.

\* **9:17** “Aivori” na ġau aukana ta mai hairaina, elefant doadie amo e karaiamu.

**20** King Solomon ena inuinu keheredia iboudiai na *gold*, bona Lebanon Uda Rumana ai ruma ko-hudia iboudiai na *gold* ġoeva-daena amo e karadia. Solomon ena nega ai *silver* na e haeroa ġau pipikina mo.

**21** Badina be hanua pavapavana ena lagatoi na Tarasisi ela, Hurama ena hesiai taudia ida; laġani toi toi amo hari Tarasisi lagatoidia na e lou mai, *gold* bona *silver* bona aivori bona maniki badadia bona tukimi<sup>†</sup> e mailaidia.

**22** King Solomon ese tanobada pavapavadia iboudiai na e hereadia, taġa ai bona aonega ai.

**23** Tanobada pavapavadia iboudiai ese Solomon vairana e tahua, Dirava ese ia lalona ai vada e atoa aonegana bae kamonai totona.

**24** Ta ta ena herahia ena herahia e mailai, *silver* ġaudia bona *gold* ġaudia, bona dabua, bona dahudahu muramurana bona aniani mamidia ihanamodia muramuradia, bona hosi bona doniki; unuheto laġani ta ta lalodiae hen.

**25** Solomon na mai ena hosi bona kariota rumadia datha-hani; bona ena hosi-gui taudia na gerebu-ta datha-rua,<sup>‡</sup> kariota hanuadie ai e hanohodia, bona haida na hanua pavapavana dekenai Ierusalem ai danu.

**26** Ia ese pavapava iboudiai e lohiadia, Eufrate sinavaina amo ela bona Filistia taudia edia tano bona Aigupto tano-hetoana.

**27** Hanua pavapavana ese *silver* na ġau pipikina ai e halaoa Ierusalem ai, nadi na heto; bona sida audia na e hahohodia, Sefela suke-audia na heheto.

---

<sup>†</sup> **9:21** “Tukimi” na manu namo-hereana ta ladana, Heberu gado ai.    <sup>‡</sup> **9:25** Gerebu-ta datha-rua = 12,000.

<sup>28</sup> Solomon ena hosi na Aigupto amo bona tano iboudiai amo e hoidia.

*Solomon e mase*

<sup>29</sup> Solomon ena kara oredia, matamana ela bona dokona, na peroveta tauna Natan sivaraina, bona Ahia tau Silono ena peroveta herevadia, bona Ido, mata-hanai tauna, ena mata-hanai Ieroboam Nebata dainai, bukadia ai vada e hetore, ani?

<sup>30</sup> Solomon ese Israel idoinai e lohiaia Ierusalem ai lağani hari-ahui lalodai.

<sup>31</sup> Bena Solomon na tubu tama dekediai e mahuta; tamana David ena hanua ai e guria. Bena natuna Rehoboarn na ia gabuna ai e lohia.

## 10

*Israel ese Rehoboam e dağedağe henia*

<sup>1</sup> Rehoboam na Sekem ela, badina be Israel tau-dia iboudiai na Sekem ela, pavapava ai bae halaoa totona.

<sup>2</sup> Ieroboam Nebata na harina e kamonai; badina be ia na dounu Aigupto ai, King Solomon e heau-tania negana ai e lao henia gabuna ai; una negana ai Ieroboam na Aigupto amo e lou.

<sup>3</sup> Bena idia ese ia iboirina e hesiai; bena Ieroboam bona Israel hegogona idoinai ema, Rehoboam e hereva henia, eto,

<sup>4</sup> Tamamu ese emai maduna e hametaua. Taunabunai, harihari tamamu ena hesiai ilao-henina aukana bona ena maduna metauna latamai ai na ba haharagaia; bena ai ese oi isiaimu baia lao hen.

<sup>5</sup> Ia eto, Dina toi muridiai ma baoma. Taunabunai taunimanima na e raka oho.

**6** Bena King Rehoboam na tau badadia, tamana Solomon maurina ai ia vairanai e giniva taudia, ida e henega bou, e nanadaidia, eto, Emui hahealo be dahaka egu ai? Ini taunimanima na ede baina haere henidia toma?

**7** Idia ese e haere henia, eto, Ini taunimanima na boma bogadia hisi, bona boma hamoaledia, bona hereva namodia amo boma haere henidia, bena idia na oiemu hesiai taudia ai baela hanaihanai.

**8** To una hahealo tau badadia ese e henia ġauna na ia ese e dadaraia; bona eregabe taudia, ia ida e vara isi hebouva bona ia vairanai e giniva taudia, ida e henega bou.

**9** Ia e nanadaidia, eto, Emui hahealo be dahaka? Ini taunimanima ese vada e hamaorogu, eto “Tamamu ese ai latamai ai vada e atoa madunana na ba haharaġaia”. Ede baita haere henidia toma?

**10** Bena hari ia ida e vara isi hebouva taudia ese e haere henia, eto, Hari vada e hamaoromu, eto “Tamamu ese emai maduna e hametaua a oi ese ba haharaġaia”, taudia na ini ba haere henidia toma, baoto “Lau imagu kwakikwakina maraġina udunana ese tamagu mamuna udunana e hereiamu;

**11** taunabunai, tamagu ese maduna metauna na umui latamui ai e atoa, a lau ese ma baina hametaua, bona tamagu ese hekwadi varodia amo e hahisimui, a lau ese doadoa amo baina hahisimui”.

**12** Taunabunai, dina ihatoina ai, Ieroboam bona taunimanima iboudiai na Rehoboam dekena ema, hanua pavapavana ena hereva heġereġerena, eto “Dina ihatoina ai dekegu ma baoma”.

**13** Bena hanua pavapavana ese e gwau daġe

henidia, tau badadia edia hahealo e dadaraia.

<sup>14</sup> King Rehoboam ese eregabe taudia edia hahealo heğereğerena ai e hereva henidia, eto, Tamagu ese maduna metauna na umui latamui ai e atoa, a lau ese ma baina hametaua; bona tamagu ese hekwadi varodia amo e hahisimui, a lau ese doadoa amo baina hahisimui.

<sup>15</sup> Taunabunai hanua pavapavana ese taunimanima eredia asine kamonai; badina be ini kara na Dirava ese e havaradia, Iehova ese ena hereva, Ahia tau Silono uduna amo Ieroboam Nebata e hamaorolaia ġauna, na baine hamomokania heloireana.

<sup>16</sup> Israel taudia iboudiai na e itaia, hanua pavapavana ese idia eredia se kamonai; bena idia ese hanua pavapavana e haere henia, eto,

Ai ahumai be dahaka David enai a?

Asi ahumai ta lese natuna enai.

Israel e, emu kalaga ba lou henidia!

David e, emu rumba gimaia!

Taunabunai, Israel taudia iboudiai na edia kalaga e lou henidia.

<sup>17</sup> A Rehoboam ese Israel taudia Iuda hanuadia ai e nohova na e lohiadia.

<sup>18</sup> Bena King Rehoboam ese Hadorama, e haġaukaradia taudia biagudia, na e siaia; a Israel taudia ese nadi amo e hodoa mase. Bena King Rehoboam na ena kariota ai e gui haraġa, Ierusalem baine heau lao eto.

<sup>19</sup> Taunabunai, Israel taudia ese David garana e gwau edede henidiamu ema bona ina dina.

## 11

<sup>1</sup> Rehoboam na Ierusalem ai e kau negana ai, ia ese Iuda bona Beniamina iduhudia taudia e

haboudia, tuari taudia mai goadadia domaga-ta gerebu-taurahani,\* Israel taudia bae tuari henidia bona basileia na Rehoboam bae henia lou totona.

<sup>2</sup> A Iehova ena hereva na Dirava ena tau ladana Semaia dekenai e kau, eto,

<sup>3</sup> Rehoboam Solomon, Iuda pavapavana, bona Israel taudia iboudiai Iuda bona Beniamina iduhudia ai, na ba hamaorodia, baoto,

<sup>4</sup> Iehova na ini e gwau tomamu: Basiola, tadikakamui basio tuari henidia; ta ta ena ruma ena ruma ba lou lao, badina be ina na lauegu amo e vara. Taunabunai idia ese Iehova ena hereva e hakala henia; bena e lou, Ieroboam asie tuari henia.

### *Rehoboam ena noho namo*

<sup>5</sup> Rehoboam na Ierusalem ai e nohova. Ia ese tuari ilao-ahuna hanuadia haida e haginidia Iuda ai.

<sup>6</sup> Hanuadia bini: Betelehem, Etam, Tekoa,

<sup>7</sup> Betesuru, Soko, Adulama,

<sup>8</sup> Gata, Maresa, Sifi,

<sup>9</sup> Adoraimi, Lakisi, Aseka,

<sup>10</sup> Sora, Aialono, Heberon; iboudiai na hanua mai maǵudia, Iuda ai bona Beniamina ai.

<sup>11</sup> Kohoro na e ha-aukadia, bona ibiagudia e atodia, bona aniani bona dehoro bona vine ranuna na idia lalodiae e haboudia.

<sup>12</sup> Hanua iboudiai lalodiae kesi bona io e atodia, bona e ha-aukadia herea. Unu amo ia ese Iuda bona Beniamina e dogodia tao tarika-tarika.

\* **11:1** Domaga-ta gerebu-taurahani = 180,000.

<sup>13</sup> Hahelaga taudia bona Levi taudia Israel tanona idoinai na edia noho gabudia iboudiai amo ia dekena ela.

<sup>14</sup> Badina be Levi taudia ese edia rei gabudia bona edia tano e rakatanidia, Iuda bona Ierusalem ela. Badina be Ieroboam bona ia garana ese Iehova ena hahelaġa ġaukaradia amo e hadokodia,

<sup>15</sup> bona ia sibona ena hahelaġa taudia e abidia, atai gabudia edia, bona nani mamaruanedia laulaudia edia, bona boromakau natudia laulaudia, ia ese e kara ġaudia, edia.

<sup>16</sup> Lalodia e urava Iehova, Israel Diravana, bae tahua taudia danu idia muridia amo ela; Israel iduhudia iboudiai amo Ierusalem ela, Iehova, senedia edia Dirava, bae boua totona.

<sup>17</sup> Idia ese Iuda basileiana e ha-aukaia, laġani toi lalodai Rehoboam, Solomon natuna, e hahedaia kunu, badina be laġani toi lalodai idia na David bona Solomon edia dala ai e rakava.

<sup>18</sup> Rehoboam ese Mahalata e adavaia. Una hahine na Ierimoto David bona Abihaili natudia; Abihaili na Eliab Iese natuna.

<sup>19</sup> Una hahine ese ia natuna mamaruanedia e havaradia: leusu bona Semaria bona Sahama.

<sup>20</sup> Ia murinai Rehoboam ese Maaka, Absalom natuna hahinen, e adavaia; bena ia ese ia natuna e havaradia: Abia bona Atai bona Sisa bona Selomiti.

<sup>21</sup> Rehoboam ese Absalom natuna hahinen Maaka e lalokau henia bada, adavana orena bona e adavadia hahinedia iboudiai na e lalokau henidia maragi. (Ia adavana korikoridia na gwautaurahani bona e adavadia hahinedia na tauratoi-ahui; natuna mamaruanedia na ruahui taurahani bona natuna hahinedia na tauratoi-ahui.)

**22** Rehoboam ese Maaka natuna Abia e abia hidi, lohia badana ai bainela, tadikakana bogaragidiae; badina be ena ura be pavapava ai baine halaoa.

**23** Ia e ġaukarava mai aonegana, natuna mamaruanedia haida na Iuda bona Beniamina kahadia iboudiae e hanohodia, vada e ha-aukadie hanuadie lalodiae; kohu momo e henidia, bona adavadia e abi henidia.

## 12

### *Aigupto pavapavana ese Iuda taudia e tuari henidia*

**1** Rehoboam ena siahu vada e gini bona vada e auka, murinai ia ese Iehova ena taravatu e rakatania, bona Israel idoinai ia ida.

**2** King Rehoboam ena lohia laġanina iha-imana ai, idia ese Iehova e gwau edeede henia dainai, Sisaka, Aigupto pavapavana, na Ierusalem ituari-henina e dae henia,

**3** ena kariota daha-ta sinahu-rua bona ena hosigui taudia gerebutauratoi\* ida. Aigupto amo ia ida ema taudia, Libia taudia bona Suki taudia bona Etiopia taudia na asi iduahidiae.

**4** Bena ia ese Iuda hanuadie mai maġudia e abidia, bona Ierusalem e raka henia kahi.

**5** Bena peroveta tauna Semaia na Rehoboam bona Iuda lohiadia, Sisaka dainai Ierusalem ai vada e hebou taudia, dekedia ela, e hamaorodia, eto, Iehova na ini e gwau tomamu: umui ese o kahugu nege dainai lau ese baina kahumui nege, Sisaka imana ai.

---

\* **12:3** Gerebu-tauratoi = 60,000.

**6** Bena Israel lohiadia bona hanua pavapavana na sibodia e hahemanau, eto, Iehova na maormaoro.

**7** Iehova ese e itadia sibodia vada e hahemanau negana ai, Iehova ena hereva na Semaia enai e kau, eto, Sibodia vada e hahemanau; lau na basina habuadia tari, a baina hamauridia; egu badu na Ierusalem latanai basina bubua kau, Sisaka imana amo.

**8** Ģau tamona, idia ese ia isiaina bae lao hen; bena lau isiaigu ilao-henina bona tanobada basileiadia isiaidia ilao-henidia mamidia bae diba.

**9** Taunabunai, Sisaka, Aigupto pavapavana, ese Ierusalem e tuari henia. Ia ese Iehova ena dubu kohudia ġoeva-daedia bona pavapava ena ruma kohudia goeva-daedia e abidia oho, ġau iboudiai e laohaidia. *Gold* kesidia danu, Solomon ese e kara ġaudia, na iboudiai e abidia oho.

**10** Bena King Rehoboam ese auri labora-labora kesidia e kara, idia ibolodia; bona hegima oreana biagudia, pavapava ena ruma iduarana e gima-ava taudia, imadia ai e atodia, bae naridia.

**11** Bena hanua pavapavana na Iehova ena dubu ai e raka vareaiva negadia iboudiai, hegima tau-dia ese unu kesi e abidia kauva. ma e loulaidiava, edia hegima rumana ai e atodiava.

**12** Ia sibona e hahemanau negana ai Iehova ese ena badu na iena amo e abia oho, bena se hadikaia rohoroho. Bena taunimanima edia noho be namo Iuda ai.

**13** Taunabunai, King Rehoboam na vada e gini auka bona e lohia Ierusalem ai. Rehoboam e lohia matama negana ai ena mauri laġanidia na hari-ahui ta; ia na laġani gwauta-hitu Ierusalem,

Iehova ese Israel iduhudia iboudiai bogaragidia amo e abia hidia ladana unuseni ai baine atoa totona hanuana, lalonai e lohia. Ia sinana ladana na Naamaha, Amono hahinena.

<sup>14</sup> Ia na e kara havara, badina be ia ese lalona se ha-aukaia Iehova itahuna ai.

<sup>15</sup> King Rehoboam ena kara, matamana ela bona dokona, na Semaia, peroveta tauna, bona Ido, mata-hanai tauna, Sisigadia Bukadia ai e hetore, ani? Rehoboam bona Ieroboam e hetuari heheni loulouva.

<sup>16</sup> Bena Rehoboam na tubu tama dekediai e mahuta, David ena hanua ai e guria. Bena ia natuna Abia na ia gabuna ai e lohia.

## 13

### *King Abia*

<sup>1</sup> King Ieroboam ena lohia lagānina ihagwautaurahanina ai, Abia ese Iuda e lohiaia matama.

<sup>2</sup> Ia na lagāni toi e lohia Ierusalem ai. Sinana ladana na Mikaia, Urielle tau Gibea natuna hahinenenai.

<sup>3</sup> Abia bona Ieroboam na e hetuari heheni. Abia na tuari totona e raka lasi, mai ena tuari oreana ida, tuari boga-auka taudia domaga-hani; bona Ieroboam ese ena tuari taudia e haginidia hegaēgæ, ituari-henina totona; iena tuari bogauka taudia na domaga-taurahani.\*

<sup>4</sup> Bena Abia na Semaraim ororona ai e gini (una na Efraim ororodia ai), eto, Ieroboam e, bona Israel idoinai, a kamonai henigu!

---

\* **13:3** Domaga-hani = 400,000. Domaga-taurahani = 800,000.

**5** Umui dibamui, ani, Iehova, Israel Diravana, ese Israel basileiana na David mai garana ida e henidia ela bona hanaianai, damena amo e hamomokania gwauhamatana ai?

**6** A Ieroboam Nebata, Solomon David ena hesiai tauna, na e tore isi, ena lohia e dağedäge henia;

**7** bona kara dibaka taudia haida na ia dekenai e hebou, Rehoboam Solomon e dağedäge henia. Una negana ai Rehoboam na eregabé bona lalomanka tauna, bena se laodia ahu diba.

**8** Harihari o laloamu umui na hutuma herea bona boromakau natudia laulaudia, Ieroboam ese *gold* amo e kara bona emui dirava ai e halao ġaudia, o abidia kau dainai umui ese Iehova ena basileia David garana imadia ai e miamu ġauna ba laoa ahu o tomamu.

**9** Iehova ena hahelağā taudia, Aaron garana, bona Levi taudia na asio luludia lasi a? Sibomui emui hahelağā taudia asio abidia, idau tano taudia e karamu heğereğerena, a? Bainema, boromakau maruanena natuna ta eiava nani mamaruanedia hitu amo sibona baine hahelağā tauna na haheğā tauna ai e hahelaomu, a dia dirava edia.

**10** A ai emai Dirava na Iehova; ai na asia rakatania. Ai na mai emai hahelağā taudia; idia ese Iehova isiaina e lao henimu; idia na Aaron garana, bona Levi taudia ese idia isiaidia e lao henimu.

**11** Daba iboudiai bona adorahi iboudiai idia ese ġole-oho boubou ġaudia e hahelağadiamu Iehova ena, bona muramura mai bonadia namohereadia na e gabudiamu, bona flaoa helağana na *gold* ġoeva-daena patana latanai e atoamu, bona lamepa patana, *gold* ġauna, e nariamu, lamepa na adorahi iboudiai bae ara heloireana. Badina be

ai ese Iehova, emai Dirava, a badiniamu, a umui ese vada o rakatania.

<sup>12</sup> A itaia, Dirava na ai ida, ai ikwaramai; iena hahelaǵa taudia ese edia tuari kibidia bae hiriri, ituari-henimui totona. Israel besena e, Iehova, senemui edia Dirava, basio tuari henia, badina be basio kwalimu diba.

<sup>13</sup> Ieroboam ese haida vada e siaidia hehuni, muridia kahana amo bae hahoadia; taunabunai ena tuari oreadia na Iuda taudia vairadai, a hari e siaidia hehuni taudia na muridia kahana ai.

<sup>14</sup> Iuda taudia na e roha lao negana ai e itaia, tuari na vairadai bona muridai; bena idia ese Iehova e boi henia, bona hahelaǵa taudia ese kibi e hiriri.

<sup>15</sup> Bena Iuda taudia ese tuari honena e hone. Iuda taudia e hone negana ai, Dirava ese Ieroboam bona Israel idoinai e hadareredia, Abia bona Iuda taudia vairadai.

<sup>16</sup> Israel taudia ese Iuda taudia vairadai e heau, bona Dirava ese idia imadia ai e atodia.

<sup>17</sup> Bena Abia bona ena oreia taudia ese e aladia mase; ala-ala na bada herea. Israel edia abi-hidi taudia domaga-ima<sup>†</sup> e mase.

<sup>18</sup> Taunabunai, Israel taudia na e darere bona Iuda na e kwalimu una negana ai, badina be idia ese Iehova, senedia edia Dirava, e abidadama henia.

<sup>19</sup> Bena Abia ese Ieroboam e hahahaia, bona hanua haida na iena amo e abidia, Betele mai ena hanua maraǵidia ida, bona lesana mai ena hanua maraǵidia ida, bona Efron mai ena hanua maraǵidia ida.

<sup>20</sup> Ieroboam ese ena siahu na se abia lou Abia

---

† **13:17 Domaga-ima = 500,000.**

ena nega ai; Iehova ese e rahua mase, bena vada e mase.

<sup>21</sup> A Abia na e goada e laova. Ia ese hahine gwauta-hani e adavadia; natuna mamaruane-dia na ruahui-rua, bona natuna hahinedia na gwauta-tauratoi.

<sup>22</sup> Abia ena kara oredia, ena dala bona ena hereva, na peroveta tauna Ido Sisigana Bukana ai e hetore.

## 14

### *King Asa*

<sup>1</sup> Taunabunai, Abia na tubu tama dekediai e mahuta; David ena hanua ai e guria. Ia gabuna ai natuna Asa e lohia. Iena nega ai tano na e laḡa ani, laḡani gwauta lalodai.

<sup>2</sup> Asa ese kara namodia bona maoromaorodia e karava, Iehova, ena Dirava, vairanai.

<sup>3</sup> Ia ese dirava idaudia edia ihaboulaina patadia bona atai gabudia helagadia e abidia oho, bona au-tubua e hagaridia, bona kaivakuku e utudia.

<sup>4</sup> Ia ese danu Iuda taudia e haḡanidia, Iehova, senedia edia Dirava, bae tahua, bona taravatu bona haheḡani bae badinadia.

<sup>5</sup> Iuda hanuadiah iboudiai Ialodai ia ese atai gabudia helāḡadia bona muramura mai bonadia patadia e abidia oho. Basileia na e laḡa aniva ia henunai.

<sup>6</sup> Hanua mai maḡudia e haginidia Iuda tanona ai, badina be tano na e laḡa aniva. Unu laḡani lalodai ia na se tuari, badina be Iehova ese maino e havara henia.

<sup>7</sup> Bena ia ese Iuda taudia e hamaorodia, eto, Ini hanua baita haginidia, bona magu bona kohoro

bona ikoukou bona auri amo baita koudia heğeğe; tano na doini iseda, badina be ita ese Iehova, eda Dirava, vada ta tahua; ita ese vada ta tahua, bona ia ese maino vada e havara henida, kaha iboudiai. Taunabunai, idia ese e haginidia, bona edia namo e habadaiava.

<sup>8</sup> Asa na mai ena tuari oreana, Iuda taudia domaga-toi, mai edia kesi bona edia io, bona Beniamina taudia domaga-rua gerebu-taurahani,\* mai edia kesi bona edia peva; ini iboudiai na goada dikadika taudia.

<sup>9</sup> Sera, Etiopia tauna, na ituari-henidia totona ema. Ena tuari taudia na domaga-gwauta,<sup>†</sup> bona ena kariota na sinahu-toi. Idia na ema bona Maresa ai e kau.

<sup>10</sup> Asa na e raka lasi ia vairanai; bena idia ese edia tuari oreadia e haginidia heğaeğae Maresa ai, Sefata kourana ai.

<sup>11</sup> Bena Asa ese Iehova, ena Dirava, e boi henia, eto, Iehova e, asi ikahamai ta oi heğereğeremu, goada taudia bona manoka taudia padamai ai. Iehova e, emai Dirava, a kahamai; badina be emu ai a hetao kaum, bona oi ladamu ai ini hutuma baia tuari henidia a tomu. Iehova e, oi na emai Dirava; tau ta basine gini diba oi vairamu ai.

<sup>12</sup> Taunabunai, Iehova ese Etiopia taudia e hadareredia, Asa bona Iuda taudia vairadiai. Bena Etiopia taudia na e heau.

<sup>13</sup> Asa mai bamona ida ese e hahavadia ela bona Gerara; Etiopia taudia na e aladia mase, ela bona ta se mauri; badina be Iehova bona ena tuari

\* **14:8** Domaga-toi = 300,000. Domaga-rua gerebu-taurahani = 280,000. † **14:9** Domaga-gwauta = 1,000,000.

oreana vairanai idia na e makohi rohoroho. Iuda taudia ese kohu momo e hua lao.

<sup>14</sup> Bena idia ese Gerara kahana hanuadia iboudiai e habuadia tari; badina be Iehova igari-henina na idia lalodiae. Idia ese hanua iboudiae kohudia e abi, badina be lalodia kohudia na momo.

<sup>15</sup> Boromakau iregudia taudia edia kalaga danu e habuadia tari; bena mamoe momo e laohaidia, bona kamelo danu. Bena idia na Ierusalem e lou lao.

## 15

### *King Asa ena kara*

<sup>1</sup> Dirava ena lauma ese Asaria Odede e rohea,

<sup>2</sup> bena ia na e raka lasi Asa ihedavari-henina totona. E hereva henia, eto, Asa e, bona Iuda bona Beniamina idoinai, a kamonai henigu! Umui na Iehova enai o taomu ai, ia na umui ida. Boma tahua, do ba davaria, a boma rakatania, ia ese baine rakatanimui.

<sup>3</sup> Nega daudau Israel na asi edia Dirava korikori, asi edia hahedibadiba hahelaāga tauna, bona asi edia taravatu.

<sup>4</sup> A edia hisihisi lalodiae Iehova, Israel Diravana, e hagerea bona e tahua negana ai, idia ese ia e davaria.

<sup>5</sup> Unu negadia ai, e raka lasi tauna bona e raka vareai tauna na asi edia maino, badina be hahedika badadia ese tano idau-idau taudia iboudiae e hahisihisiava.

<sup>6</sup> Idia na e makohi rohoroho, bese ta bese ta hanua ta hanua ta e heala-ala heheni; badina be Dirava ese hisi idau-idau amo e hahisidia.

<sup>7</sup> A umui na ba boga auka. Imamui basie manoka, badina be emui ġaukara anina bae halou hemimui.

<sup>8</sup> Asa ese Asaria Odede ena peroveta herevadia e kamonai negana ai, e boga auka, bona kaivakuku dikadia na Iuda bona Beniamina tanodia idoidiae bona Efraim ororo-hanuadia, ia ese vada e abi ġaudia, amo e abidia oho. Iehova ena ihaboulaina patana danu, Iehova ena dubu dehena vairanai e miava ġauna, na ma e larebaia lou.

<sup>9</sup> Bena ia ese Iuda bona Beniamina taudia iboudiae e haboudiae, bona Efraim bona Manase bona Simeon taudia, idia bogaragidiae e noho hedoava taudia, danu; badina be hutuma bada ese e itaia, Iehova, ena Dirava, na ia ida, bena idia ese Israel e rakatania, ia dekena ela.

<sup>10</sup> Asa ena lohia laġanina ihagwauta-imana huana ihatoina lalonai, idia na Ierusalem ai e hebou.

<sup>11</sup> Una dina ai idia ese boubou gaudia na Iehova vairanai e hahelaġadie, hari tuari ai e abi gaudia lalodia amo, boromakau mamaruanedia sinahuhitu bona mamoe daha-hitu.

<sup>12</sup> Bena e gwau hamata, Iehova, senedia edia Dirava, na bae tahua, mai lalodia bona mai laumadia idoidiae ida eto;

<sup>13</sup> bona daika Iehova, Israel Diravana, basine tahua, ia na bae alaia mase, eregabie iava iahu, tau eiava hahine.

<sup>14</sup> Iehova e gwau henia hamata mai gao badadia bona mai lolodia ida, bona mai auri kibidie bona doa kibidie regedie ida.

<sup>15</sup> Bena Iuda idoinai na una gwauhamata e moalelaia; badina be mai lalodia idoidiae ida vada e gwau hamata, bona mai edia ura idoinai vada e

tahua; bena idia ese ia e davaria, bona Iehova ese laḡa-ani e henidia, kaha iboudiai ai.

<sup>16</sup> King Asa ese danu ia sinana Maaka ena pavapava dagina e abia oho, badina be ia ese kaivakuku dikana ta e karaia, Asera ena. Asa ese ena kaivakuku e utua gari, e hapatapataia, bena Kidron sinavaina badibadinai e gabua.

<sup>17</sup> A atai gabudia helāḡadia na Israel amo asie abidia oho. Ġau tamona, Asa na asi ena lalo-hadai kerere, ena dina iboudiai.

<sup>18</sup> Bena tamana ena herahia ġaudia helagadia bona ia sibona ena herahia ġaudia helāḡadia, *silver* bona *gold* ġaudia idau-idau, ia ese Iehova ena dubu ai e vareailaidia.

<sup>19</sup> Tuari na se vara lou, ela bona Asa ena lohia laġanina ihatoiahui-imana ai.

## 16

### *Asa na Ben-hadad ida e herohemaino*

<sup>1</sup> Asa ena lohia laġanina ihatoiahui-tauratoina ai, Baasa, Israel pavapavana, na e dae lao, Iuda baine tuari henia totona; bena ia ese Rama e haginia, Asa, Iuda pavapavana, enai baela baema taudia ilao-ahudia.

<sup>2</sup> Bena Asa ese Iehova ena dubu bona pavapava ena rumu kohudia amo *gold* bona *silver* e abi, Ben-hadad, Suria pavapavana, Damasko ai e nohova tauna, dekena e siai lao, eto,

<sup>3</sup> Raruosi aita herohemaino, lau tamagu bona oi tamamu heġereġeredia. A itaia, *silver* bona *gold* vada na siai vasimu; aola, Israel pavapavana Baasa ida emui herohemaino ba ġiġia rohoroho; bena ia na lauegu amo baine raka oho.

<sup>4</sup> Ben-hadad ese King Asa e kamonai henia, bena ena tuari oreadia biagudia e siaidia lao, Israel hanuadia bae tuari henidia. Idia ese lono bona Dan bona Abele-maimi bona Napatali kohuhabou hanuadia iboudiai e hadareredia.

<sup>5</sup> Baasa e kamonai, bena Rama ihaginina e rakatania bona ena ġaukara e hadokoa.

<sup>6</sup> Bena King Asa ese Iuda taudia iboudiai e laohaidia; bena idia ese Rama nadidia bona audia, Baasa ese vada e hagini ġaudia, na e huadia; bena unu ġau amo ia ese Geba bona Mispa hanuadia e haginidia.

<sup>7</sup> Una negana ai Hanani, mata-hanai tauna, na Asa, Iuda pavapavana, dekena ela, e hereva henia, eto, Suria pavapavana enai o hetao kaum a Iehova, emu Dirava, enai to hetao kaum dainai, Suria pavapavana ena tuari oreana na oi imamu amo vada e roho mauri.

<sup>8</sup> Etiopia taudia bona Libia taudia na dia orea bada-hereana a? Edia kariota bona edia hosi-gui taudia na dia hutuma a? Matona, Iehova enai o hetao kau dainai ia ese oi imamu ai e atodia.

<sup>9</sup> Badina be Iehova matana ese tanobada idoinai e neneamu, ena siahu na ienai asie kereremu taudia idurulaidia ai baine hedinarai totona. Ina lalonai vada o kara kava; badina be hari amo tuari na bae vara loulou emu ai.

<sup>10</sup> Asa ese hari mata-hanai tauna e badu henia, bena dibura rumana ai aena ikahidia e atodia; badina be e badu henia lalo-dika, una hereva dainai. Asa ese danu taunimanima haida e daġedäge henidia una negana ai.

<sup>11</sup> Asa ena kara, matamana ela bona dokona, na Iuda bona Israel Pavapavadia Bukana ai e hetore.

<sup>12</sup> Ena lohia lağanina ihatoiahui-taurahanitana ai, Asa ese hisihisi ta e davaria aena ai, bena ena hisihisi e bada e laova; ġau tamona ena hisihisi lalonai danu ia ese Iehova se tahua, a muramura taudia edia heduru mo e tahua.

<sup>13</sup> Bena Asa na tubu tama dekediai e mahuta; ena lohia lağanina ihahariahui-tana ai e mase.

<sup>14</sup> David ena hanua ai e guria, ia sibona e geia heġġaeġ kohuana lalonai. Pata ta ai e hahekurea; una pata na muramura mai bonadia ikaradia taudia edia muramura idau-idau ai e hahonua. Bena lahi badana e ha-araia ia ilalolaina.

## 17

### *King Iehosafat*

<sup>1</sup> Ia natuna Iehosafat na ia gabuna ai e lohia, bona ena goada e habadaia, Israel ituari-henina totona.

<sup>2</sup> Tuari taudia na Iuda hanuadia mai maġudia iboudiai lalodiae e hanohodia, bona hegima ore-adia na Iuda tanona ai bona Efraim hanuadia, tamana Asa e abi hanuadia, lalodiae e atodia.

<sup>3</sup> Iehova na Iehosafat ida, badina be ia na tamana ena dala gunadia ai e rakava. Ia na Baal se tahudia,

<sup>4</sup> a tamana ena Dirava e tahua, bona ena ha-heġani ai e raka, dia Israel taudia edia dala ai.

<sup>5</sup> Taunabunai, Iehova ese basileia e haginia auka ia imana ai. Iuda taudia iboudiai ese heaiva ġaudia na Iehosafat dekena e mailaidia; bena ena taġa bona imatauraina na bada herea.

<sup>6</sup> Lalona vada e auka Iehova ena dala ai; ina danu, ia ese atai gabudia helaqadie bona kaivakuku na Iuda tanona amo e abidia oho.

<sup>7</sup> Ena lohia lağanina ihatoina ai ia ese ena lohia taudia, Ben-haili bona Obadia bona Sekaria bona Netanele bona Mikaia, e siaidia lao, Iuda hanuadia ai taunimanima na bae hadibadibadia totona.

<sup>8</sup> Levi taudia danu, Semaia bona Netania bona Sebadia bona Asahele bona Semiramoto bona lehonatan bona Adonia bona Tobia bona Tobadonia, na idia ida e siaidia lao; bona Levi taudia ida hahelağā taudia Elisama bona Iehoram danu e siaidia lao.

<sup>9</sup> Iuda ai e hahedibava; Iehova ena taravatu bukana na idia ese e abia kau, bena Iuda hanuadia iboudiai e rakadia hanai, taunimanima na e hadibalaidia lao.

<sup>10</sup> Iehova garina ese Iuda e ġeġea ahu basileiadia iboudiai e butudia tao; bena idia ese Iehosafat asie tuari henia.

<sup>11</sup> Filistia taudia haida ese herahia gaudia na Iehosafat dekena e mailaidia, bona *silver* danu, heaiva gaudia; Arabia taudia ese danu mamoe maruanedia daha-hitu sinahu-hitu bona nani maruanedia daha-hitu sinahu-hitu na ia dekena e mailaidia.

<sup>12</sup> Bena Iehosafat na e bada e laova. Iuda tanona ai ia ese kohoro bona kohu-habou hanuadia e haginidia;

<sup>13</sup> bona Iuda hanuadia lalodiae kohu momo e habou. Ia na mai ena tuari taudia, goada-herea taudia, Ierusalem ai.

<sup>14</sup> Ihagaudia binai, edia iduhu ta ta ai: Iuda ai daha biagudia na Adna, goada-herea taudia domaga-toi\* biagudia;

<sup>15</sup> bona ia - murinai lehohan, goada-herea

\* **17:14** Domaga-toi = 300,000.

taudia domaga-rua gerebu-taurahani<sup>†</sup> biagudia;  
<sup>16</sup> bona ia murinai Amasia Sikri, Iehova isiaina ilao-henina e urava tauna ta, ia na goada-herea taudia domaga-rua biagudia.

<sup>17</sup> Beniamina ain na Eliada, goada-herea tauna ta; ena orea taudia na domaga-rua,<sup>‡</sup> mai edia peva bona edia kesi ida.

<sup>18</sup> Ia murinai na Iehosabad; ena orea taudia na domaga-ta gerebu-taurahani,<sup>§</sup> mai edia tuari ġaudia ida.

<sup>19</sup> Ini na hanua pavapavana ena hesiai taudia; ma haida danu be hari hanua pavapavana ese hanua mai maġudia lalodai vada e hanohodia taudia, Iuda tanona idoinai lalonai.

## 18

### *Mikaia ena peroveta herevadia*

<sup>1</sup> Iehosafat na mai ena taġa bada, bona imatauraina danu na bada. Iena iduhu bona Ahaba ena iduhu na e headava heheni.

<sup>2</sup> Laġani haida vada ela, bena ia na Samaria e diho ela, Ahaba dekenai. Bena Ahaba ese mamoe bona boromakau momo herea e aladia mase, ia bona ia ida ela taudia adia, bona e ha-uraia ia na Ramoto-gilead baine tuari henia.

<sup>3</sup> Ahaba, Israel pavapavana, ese Iehosafat, Iuda pavapavana, e nanadaia, eto, Oi na lau ida Ramoto-gilead aitala eiava? Ia na e haere henia, eto, Lau oi na tamona, lauegu orea bona oiemu orea danu tamona. Tuari ai baia bamomu.

---

<sup>†</sup> **17:15** Domaga-rua gerebu-taurahani = 280,000.    <sup>‡</sup> **17:17** Domaga-rua = 200,000.    <sup>§</sup> **17:18** Domaga-ta gerebu-taurahani = 180,000.

**4** Bena Iehosafat ese Israel pavapavana e hamaoroa, eto, Iehova ena hereva do ba tahua guna.

**5** Bena Israel pavapavana ese peroveta taudia e haboudia, tatau sinahu-hani; bena e nanadaidia, eto, Ramoto-gilead baia tuari henia eiava basina tuari henia? Idia na e haere, eto, Vada aola; badina be Dirava ese hanua pavapavana imana ai baine atoa.

**6** A Iehosafat eto, Iehova ena peroveta tauna ma ta dia noho iniseni ai, bena ia ma baitama nanadaia a?

**7** Israel pavapavana ese Iehosafat e haere henia, eto, Tau ta do noho, iena amo Iehova ena hereva baitama tahua; ladana na Mikaia, Imla natuna. A lau ese na inai heniamu, badina be ia na nega ta āgau namodia egu ai se perovetalai, a nega iboudiai āgau dikadia mo. A Iehosafat eto, Hanua pavapavana na unu basine gwau toma.

**8** Bena Israel pavapavana ese ena heitatao tauna ta e boiria, eto, Mikaia Imla ba hakaua mai haraāga.

**9** Una negana ai Israel pavapavana bona Iehosafat, Iuda pavapavana, na edia terono ai hehelai, edia pavapava dabuadia e kara, uit ikwadina gabuna ai, Samaria hanua ikoukouna ai; bona peroveta taudia iboudiai na idia vairadiai e perovetava.

**10** Bena Sedekia Kenana ese ena auri doadia e kara, bona e hereva, eto, Iehova na ini e gwau tomamu: Ini āgau amo Suria taudia ba doridia lao, ela bona ba habuadia tari.

**11** Bena peroveta taudia iboudiai danu unu e peroveta toma; ma eto, Ramoto-gilead baola, ba

kwalimu; Iehova ese hanua pavapavana imana ai baine atoa.

<sup>12</sup> Gwaukau tauna na Mikaia iboirina ela, bena e hamaoroa, eto, A kamonai: peroveta taudia edia hereva na vada e hatamonaia, hanua pavapavana ihanamona; oiemu hereva danu idia ta ena hereva ida baine heğereğere, hereva namona ba gwauraia.

<sup>13</sup> A Mikaia eto, Iehova e maurimu heğereğeren, egu Mrava ese ede baine hereva henigu toma, una mo baina gwauraia.

<sup>14</sup> Ia na hanua pavapavana dekenai e kau; bena hanua pavapavana ese e nanadaia, eto, Mikaia e, Ramoto-gilead na baia tuari henia eiava basina tuari henia? Bena Mikaia ese e haere henia, eto, Aola, ba kwalimu; imamu ai bae heato kau.

<sup>15</sup> A hanua pavapavana ese ma e hamaoroa, eto, Nega hida baina sisiba henimu, Iehova ladana ai hereva ta basio gwaurai henigu, a hereva momokani mo?

<sup>16</sup> Bena Mikaia eto, Lau ese Israel idoinai na itadia, ororo ai e heau karoho, mamoe asi ireğudia na heheti; bena Iehova eto, Ini na asi biagudia, ta ta ena rumu ena rumu aela, mai mainodia ida.

<sup>17</sup> Bena Israel pavapavana ese Iehosafat e hamaoroa, eto, Na hamaoromu ani, ia na hereva namodia latagu ai basine gwaurai, a hereva dikadiia mo?

<sup>18</sup> Mikaia ma eto, Taunabunai, Iehova ena hereva ba kamonai. Iehova na ena terono ai helaina ai na itaia, bona guba oreana idoinai ia badinai gigini, haida idibana kahana ai bona haida laurina kahana ai.

**19** Bena Iehova eto, Daika ese Ahaba, Issel pava-pavana, baine koia, bena bainela, Ramoto-gilead ai baine mase. Bena ta ese hereva ta e gwauraia, ma ta hereva ta.

**20** Bena lauma ta e raka lasi, Iehova vairanai e gini, eto, Lau ese baina koia. Iehova ese e nanadaia, eto, Edena dala amo?

**21** Ia eto, Bainala, koikoi laumana ai baina ha-helao, ena peroveta taudia iboudiai ududia ai. Iehova eto, Ba koia, emu koikoi baine kwalimu; aola, unu ba kara toma.

**22** Taunabunai o kamonaimu, Iehova ese koikoi laumana na emu peroveta taudia ududia ai vada e atoa; Iehova ese hereva dikana oi latamu ai vada e gwauraia.

**23** Sekedia Kenana na e raka kahira, bena ia ese Mikaia na vahana ai e pataia, eto, Iehova Laumana na ede e rakatanigu toma oi ihereva-henimu totona a?

**24** Mikaia eto, Laloma daiutuna ai ba heau vareai, komu totona, dinana ai vada ba itaia.

**25** Bena Israel pavapavana eto, Mikaia ba dabaia tao, Amon, hanua lohiana, bona Ioasa, hanua pavapavana natuna, dekedia ba loulaia;

**26** baoto, Hanua pavapavana na ini e gwau tomarnu: Ina tau na dibura rumana ai ba koua, flaoa kavakava bona ranu taidia mo ba henia, ela bona maino ai baina lou mai.

**27** Bena Mikaia eto, Bema oi na maino ai ba lou mai, bena Iehova na lauegu amo vada se hereva. Ma eto, Taunimanima ibouboumui ai, a kamonai.

*Ahaba na tuari ai e mase*

<sup>28</sup> Taunabunai, Israel pavapavana bona Iehosafat, Iuda pavapavana, na Ramoto-gilead ela.

<sup>29</sup> Bena Israel pavapavana ese Iehosafat e hereva henia, eto, Lau na ita-itagu baina ha-idaua, bainala tuari lalonai, a oi be emu pavapava dabuadia ba doki. Bena Israel pavapavana na sibona ita-itana e ha-idaua; bena idia na ela tuari lalonai.

<sup>30</sup> Suria pavapavana ese ena kariota biagudia vada e hağanidia, eto, Taunimanima marağidia eiava badadia basio tuari henidia, a Israel pavapavana mo.

<sup>31</sup> Kariota biagudia ese Iehosafat e itaia, bena idia eto, Una na Israel pavapavana; taunabunai, idia na e heau kerehai, ia bae heatu henia eto. A Iehosafat na e lolo, bena Iehova ese e durua. Dirava ese iena amo e veridia oho,

<sup>32</sup> badina be kariota biagudia ese e itaia, ia na dia Israel pavapavana, bena iğavana amo e lou.

<sup>33</sup> A tau ta ese diba ta e kinoa kava, Israel pavapavana ena auri dabuana bona ena keme aurina padadiai e taraki. Taunabunai, ia ese ena kariota e heaulaiava tauna na e hamaoroa, eto, A haheaua hegiro, tuari murimurinai ba laohaigu, badina be vada na bero.

<sup>34</sup> Una dina ai tuari na auka herea. Israel pavapavana na sibona e hedori tao, ena kariota ai, Suria taudia e vaira henidia ela bona ado e rahi. Bena dina e diho ai e mase.

## 19

*Iehu ese Iehosafat e gwau henia*

<sup>1</sup> Iehosafat, Iuda pavapavana, na ena ruma e lou henia, Ierusalem ai, mai namona ida.

<sup>2</sup> A Iehu Hanani, mata-hanai tauna, na ihe-davarihenina totona e raka lasi, bena ia ese King Iehosafat e gwau henia, eto, Kara dika taudia o durudiamu bona Iehova e inai heniamu taudia o ura henidiamu be maoro a? Ina dainai Iehova ena badu na oi latamu ai vada e kau.

<sup>3</sup> Gau tamona, namo taina lalomu ai e miamu, badina be kaivakuku na tano idoinai o habuadia tari, bona lalomu vada o hadaia Dirava ba tahua oto.

### *Iehosafat ese hahemaoro taudia e haginidia*

<sup>4</sup> Iehosafat na Ierusalem ai e nohova. Bena ia na ma e raka lasi, taunimanima bogaragidai ela, Bere-sieba amo ela bona Efraim ororodia, e harakadia kerehai, Iehova, senedia edia Dirava, enai.

<sup>5</sup> Ia ese hahemaoro taudia e haginidia, Iuda hanuadia mai mağudia iboudiai lalodiae.

<sup>6</sup> Unu hahemaoro taudia na ia ese e hamaordia, eto, Emui kara nahuadia ba toho; badina be emui hahemaoro be dia tau ta ena a Iehova ena; ia na umui ida, hahemaoro ġaukaradia ai.

<sup>7</sup> Benaini, Iehova garina na latamui ai baine mia; emui kara nahuadia ba toho, badina be Iehova, eda Dirava, ese hahemaoro se hagageviamu, bona tau ta se matauraiamu, bona hahemaoro ihagagevana davana se abiamu.

<sup>8</sup> Ierusalem ai danu Iehosafat ese Levi taudia bona hahelaġa taudia haida bona Israel iduhudia ikwaradia taudia haida danu e haginidia, Iehova ena hahemaoro karadia bae kara, bona heiri-heiri taudia bae hahemaoro henidia. Edia ġaukara gabuna be Ierusalem ai.

**9** Bena ia ese e haduadia, eto, Ini ba kara toma, Iehova garina ai bona heabidadama ai bona mai lalomui idoidiai ida:

**10** tadikakamui edia hanua lalodiae e nohomuna hahemaoro totona dekemui baema, rara iha-hebubuna dainai, eiava hahegani eiava taravatu eiava hahedua herevadia daidiae, negadia iboudiae na ba hadibadia, bena idia na Iehova vairanai basie kerere, bona badu na umui bona tadikakamui latamui ai basine kau. Unu ba kara toma, bena basio kerere.

**11** A itaia, biagumui Iehova ena gaukara lalodiae na Amaria, hahela ga tauna badana; bona biagumui hanua pavapavana ena gaukara lalodiae na Sebadia, Ismael natuna, Iuda iduhuna lohiana; a Levi taudiae na idurumui taudiae ai baela. Ba gaukara mai boga-aukamui ida; Iehova na kara maoromaoro taudiae ida baine noho.

## 20

### *Moab bona Amono taudiae e darere*

**1** Una murinai, Moab taudiae bona Amono taudiae bona Meunimi taudiae haida na Iehosafat ituari-henina totona ema.

**2** Bena tatau haida na ema, Iehosafat e hamaoroa, eto, Hutuma bada ese oi ituari-henimu e maimu Edom amo, davara unukahaha amo; a itaia, idia na Hasasono-tamara ai (una na Engedi).

**3** Bena Iehosafat na e gari, bena lalona e hadiae Iehova baine tahua; bena anivaga e gwauraia Iuda tanona idoinai.

**4** Bena Iuda taudiae na e hebou, hekaha na Iehova ena amo bae tahua totona; Iuda hanuadiae iboudiae amo ema, Iehova itahuna totona.

<sup>5</sup> Bena Iehosafat na Iuda bona Ierusalem hebouna bogaraginai e gini, Iehova ena dubu ai, magu matamatana vairanai;

<sup>6</sup> bena eto, Iehova e, senemai edia Dirava, oi na guba Diravana ani? Oi na bese idau-idau basileiadia iboudiai o lohiadiamu ani? Oi imamu ai na siahu bona goada, una dainai oi ilao-ahumu dalana na tau ta asi dibana.

<sup>7</sup> Emai Dirava e, oi ese ina tano taudia na emu bese Israel vairanai o luludia lasi, bona turamu Abraham garana o henidia, bae ġaunaia hanai-hanai, ani?

<sup>8</sup> Bena idia ese vada e noholaja, bona lalonai gabu helāgana vada e haginia, oi ladamu ena, eto,

<sup>9</sup> Hahedika eiava dare eiava hahemaoro eiava dai-hanai gorerena eiava doe na latamai ai bema kau negana ai, ai ese ina dubu vairanai bona oi vairamu ai baia gini, badina be oi ladamu na ina dubu ai; bena emai hisihisi ai baia tai henimu, bena oi ese ba kamonai bona ba hamaunmai.

<sup>10</sup> Harihari Amono bona Moab bona Seiri orrona taudia a itadia; Israel taudia na Aigupto amo ema negana ai oi ese o gwaudia tao, unu bese basie tuari henidia, bena e rakadia hanai, asie habuadiah tari.

<sup>11</sup> A itaia, edia ima-dava e maimu, emu tano, o henimai baia ġaunaia tanona, amo bae lulumai lasi e tomu.

<sup>12</sup> Emai Dirava e, oi basio hahemaoro henidia a? Badina be ai na asi goadamai, ina hutuma bada-hereana, ituari-henimai totona e maimu, vairadiae. Ai na asi dibamai ede baia kara toma, to matamai na oiemu ai e kaumu.

<sup>13</sup> Una negana ai Iuda taudia iboudiai na Iehova vairanai e gini, mai natudia karukarudia bona

adavadia bona natudia ida.

<sup>14</sup> Bena Iehova ena Lauma ese lahasiel e rohea, hebou bogaraginai. Una lahasiel na Sekaria natuna; Sekaria tamana na Benaia; Benaia tamana na leiele; leiele tamana na Matania, Levi tauna, Asaf ena iduhu amo.

<sup>15</sup> Ia eto, Iuda idoinai bona Ierusalem taumui iboumui ai, bona King Iehosafat, a kamonai. Iehova ese ini e gwau henirnui tomamu: Basio gari, kudoumui basie hetaha, ina hutuma bадhereana dainai; badina be tuari na dia emui, a Dirava ena.

<sup>16</sup> Kerukeru baola, ba tuari henidia; idia na Sisi amo bae dara dae; koura dokona ai ba davaridia, Ieruele tano-ѓаѓаена mairiveina kahana ai.

<sup>17</sup> Iuda bona Ierusalem e, ina tuari ai umui na basio tuari; emui gabu ai ba gini noho, bena Iehova ena kwalimu umui daimui ai do ba itaia. Basio gari, kudoumui basie hetaha; kerukeru idia ituari-henidia baola, bona Iehova na umui ida.

<sup>18</sup> Bena Iehosafat na e igo diho, tano ai e goru diho; bona Iuda taudia iboudiai bona Ierusalem taudia danu e goru diho Iehova vairanai, bona Iehova e toma henia diho.

<sup>19</sup> Bena Levi taudia haida, Kohat taudia bona Kora taudia, na e tore tore isi, Iehova, Israel Diravanaugh, e imodaia, mai gao badadia ida.

<sup>20</sup> Daba maraѓi ai, idia na e tore isi, e raka lasi, Tekoa tano-ѓаѓаена ela. Idia e raka lasi negana ai, Iehosafat na e gini tore, eto, Iuda bona Ierusalem taumui e, a hakala henigu. Iehova, emui Dirava, bavabiabiraia, bena ba gini; ena peroveta taudia ba kamonai henidia, bena ba kwalimu.

<sup>21</sup> Ia na taunimanima ida e henega bou, bena ia

ese Iehoya ihanamolaina anedia bae abi taudia e gvauraidia hidi; idia na dabua helagadia bae hahe-dokilai bona tuari oreana vairanai baela, baeto,

Iehova ba hanamoas,

badina be ena hebogahisi na e hesiriu hanai-hanaimu.

**22** Idia na heimodai anedia e abi matama negana ai, Iehova ese Amono bona Moab bona Seiri ororona taudia, hari Iuda ituari-henina totona vada ema taudia, ihahoadia dalana ta e lailaia; taunabunai idia na e darere.

**23** Badina be Amono bona Moab taudia ese Seiri ororona taudia e tuan henidia bona e habuadia tan vaitani, bena Seiri taudia e aladia ore murinai idia na sibodia e hahebuatari heheniva.

**24** Iuda taudia na kito rumana ai e kau, tano gagaena ai, bena idia ese hari hutuma e rohadia bona e itadia mase taudia mo tano ai hehekure; ta se mauri.

**25** Iehosafat mai ena orea taudia ida edia kohu iabidia totona ela negana ai, idia ese boromakau momo bona kohu bona dabua bona dava-bada gaudia e davaridia. E abidia edia, ela bona asi goadadia haida ma bae hua. Dina toi lalodai unu āgau e abidia, badina be āgau momo herea.

**26** Bena dina ihananina ai idia na Beraka\* Kourana ai e hebou. Unuseni ai idia ese Iehova e hanamoas; una dainai una gabu ladana e hatoamu Beraka Kourana ema bona ina dina.

**27** Bena Iuda bona Ierusalem taudia iboudiai na e lou lao, bona Iehosafat na mata ai e raka; Ierusalem e lou henia mai moaledia ida, badina be Iehova ese vada e hamoaledia, inaidia vairadai.

\* **20:26** “Beraka” anina be “Hahenamo”.

**28** Idia na Ierusalem ai e dae kau, mai edia hataihatai ġaudia badadia bona maraġidia bona edia kibi ida; bena Iehova ena dubu ai e didi vareai.

**29** Bena tano idau-idau basileiadja iboudiai na Iehova ese Israel taudia adia inai vada e tuari henidia sivaraina e kamonai negana ai na gari ese e butudia tao.

**30** Taunabunai, Iehosafat ena basileia na asi regereġena, badina be ena Dirava ese laġa-ani e henia, kaha iboudiai.

### *Iehosafat ena kara oredia*

**31** Taunabunai, Iehosafat ese Iuda e lohiaia. E lohia matama negana ai ena mauri laġanidja na toi-ahui ima; bena Ierusalem ai e lohia, laġani ruahui ima. Ia sinana ladana na Asuba Silihi.

**32** Ia na tamana Asa ena dala ai e raka, una dala amo se raka siri; kara maoromaoro e karava, Iehova vairanai.

**33** Gau tamona, atai gabudia helaġadja na se abidia oho; taunimanima lalodia ese senedia edia Dirava do asie abia dae.

**34** Iehosafat ena kara oredia, matamana ela bona dokona, na Iehu Hanani Sisigana lalonai e hetore; una na Israel Pavapavadia Sisigadia Bukana ai.

**35** Una murinai Iehosafat, Iuda pavapavana, na Ahasia, Israel pavapavana, kara havara tauna, ida e tami hebouva.

**36** Ia ida e tami hebou, lagatoi haida e raidia, Tarasisi baela ġaudia. Unu lagatoi na Esionogebere ai e raidia.

**37** Bena Eliesere Dodavahu, tau Maresa, ese Iehosafat e gwau henia ena peroveta ai, eto, Ahasia ida vada o tami hebou dainai, Iehova ese ini

vada o kara ġaudia na baine habuadia tari. Bena lagatoidia na e tata kau, bena Tarasisi na vada asiela diba.

## 21

### *Iehoram, Iuda pavapavana*

<sup>1</sup> Iehosafat na tubu tama dekediai e mahuta; senena garadia ai e guria, David ena hanua ai. Bena natuna Iehoram na ia gabuna ai e lohia.

<sup>2</sup> Ia na mai tadina, Iehosafat natuna haida; ladadia na Asaria, Iehiele, Sekaria, Asaria, Mikael bona Sefatia. Ini iboudiai na Iehosafat, Iuda pava-pavana, natuna.

<sup>3</sup> Tamadia ese herahia badadia e henidia, *silver* bona *gold* bona dava-bada kohudia, bona hanua mai maġudia Iuda ai danu; a basileia na Iehoram e henia, badina be ia na natuna roboana.

<sup>4</sup> Iehoram na tamana ena terono ai e dae kau, bona ena siahu e ha-aukaia, bena ia ese tadina iboudiai bona Israel lohiadia haida na dare amo e aladia mase.

<sup>5</sup> Iehoram e lohia matama negana ai ena mauri laġanidia na toi-ahui rua; ia na laġani taurahani Ierusalem ai e lohia.

<sup>6</sup> Ia na Israel pavapavadia edia dala ai e rakava, Ahaba ena iduhu taudia vada e karava heġereġerena, badina be Ahaba natuna hahinena na ia adavana. Ia na Iehova vairanai e kara dikaya.

<sup>7</sup> Ĝau tamona, Iehova na se ura David ena iduhu baine habuaia tari, badina be ia na David ida e hegwaħamata heheni, bona e gwau henia hamata, lamepa ta ia bona ia garana baine henidia ela bona hanaihanai.

<sup>8</sup> Iena nega ai Edom ese Iuda ena helohia e dadaraia, bona sibodia edia pavapava ta e haginia.

<sup>9</sup> Bena Iehoram na ena tuari biagudia bona ena kariota iboudiai ida e hanai; bena hanuaboi ai e tore isi, hari Edom taudia, ia bona ena kariota biagudia vada e daidia hegege taudia, na e rahudia mamase.

<sup>10</sup> Taunabunai, Edom ese Iuda ena helohia vada e dadaraia ema bona ina dina. Una negana ai, Libna ese danu iena helohia e dadaraia, badina be ia ese Iehova, senena edia Dirava, vada e rakatania dainai.

<sup>11</sup> Ina danu, ia ese atai gabudia helaǵadia e kara, Iuda ororodia ai, bona Ierusalem taudia na gwau-edede daladia ai e hakaudia, bona Iuda taudia e harakadia kerere.

<sup>12</sup> Bena revareva ta na peroveta tauna Elia ena amo ema, eto, Iehova, senemu David ena Dirava, na ini e gwau tomamu: Badina be tamamu Iehosafat eiava Asa, Iuda pavapavana, edia dala ai so raka,

<sup>13</sup> a Israel pavapavadia edia dala ai vada o raka, bona Iuda bona Ierusalem taudia na gwau-edede daladia ai vada o hakaudia, Ahaba ena iduhu ese Israel taudia na gwau-edede daladia ai e hakaudia na heto, bona tadimu danu, tamamu ena iduhu taudia, oi e hereamu taudia, vada o aladia mase;

<sup>14</sup> una dainai Iehova ese dai-hanai gorerena badana ta na emu oreia taudia latadiai baine havaraia, bona natumu bona adavamu bona emu gau iboudiai latadiai;

<sup>15</sup> bona oi danu ba gorere bada, bogaraumu

gorerena ba davaria, ela bona una gorere dainai bogamu anina baine heğigi lasi, dina ta ta amo.

<sup>16</sup> Bena Iehova ese Filistia taudia bona Arabia taudia Etiopia taudia badibadidiai e nohova na edia badu e havaraia, Iehoram enai;

<sup>17</sup> bena idia na Iuda ituari-henina totona ema, e daea, bona e davaridia kohudia iboudiai e hua lao, pavapava ena ruma kohudia, bona pavapava natuna bona adavana hahidaosi danu, e laohaidia; taunabunai natuna ta se noho, tau-muritai Iehoahasa mo sibona.

<sup>18</sup> Una murinai Iehova ese gorere metauhereana amo ia bogarauna e hahisihisia.

<sup>19</sup> Negana ela, bena lağani rua e ore ai ia bogana anina na e heğigi lasi, una gorere dainai; bena e mase, n-ai hisihisi bada-hereana ida. Ena orea taudia na lahi ta asie ha-araia ia dainai, senena edia lahi e ha-arava heğereğeredia.

<sup>20</sup> Ia na e lohia matama negana ai ena mauri lağanidia na toi-ahui rua, bona ia na lağani taurahani Ierusalem ai e lohia. E mase negana ai ta ese lalo-hisihisina se karaia; idia ese David ena hanua ai e guria, a dia pavapava edia gara ai.

## 22

### *Ahasia, Iuda pavapavana*

<sup>1</sup> Ierusalem taudia ese Iehoram natuna tau-muritai Ahasia na pavapava ai e halaoa, ia gabuna ai; badina be Arabia taudia ida ema oreana ese natuna gunadia iboudiai vada e aladia mase. Taunabunai, Ahasia, Iuda pavapavana Iehoram natuna, na e lohia.

<sup>2</sup> Ahasia e lohia matama negana ai ena mauri lağanidia na hari-ahui rua; ia na lağani tamona mo

e lohia, Ierusalem ai. Ia sinana ladana na Atalia; una hahine na Omri tubuna hahinena.

<sup>3</sup> Ia danu Ahaba ena iduhu taudia edia dala ai e raka, badina be sinana ese e hahealo henia, kara dika daladia ai.

<sup>4</sup> Ia na Iehova vairanai e kara havara, Ahaba ena iduhu taudia e karava heğereğerena; badina be tamana ena mase murinai idia ese e hahealo henia, bena e hakaraia dika.

<sup>5</sup> Edia hahealo e abia dae dainai ia na Iehoram Ahaba, Israel pavapavana, ida ela, Hasaele, Suria pavapavana, na Ramoto-gilead ai bae tuari henia totona. Bena Suria taudia ese Ioram e haberoa;

<sup>6</sup> bena ia na e lou lao Iesrele ai, ena bero, Hasaele, Suria pavapavana, e tuari henia negana ai Rama ai e davari gaudia, ihanamodia totona. Bena Ahasia Iehoram, Iuda pavapavana, na Iesrele ela, Ioram Ahaba i'igo-itana totona, badina be ia na e gorerea.

### *Iehu ese Ahasia e alaia mase*

<sup>7</sup> Dirava ese Ahasia ihadikana dalana e heğaeğaelaia, Ioram i'igo-itana ela amo. Badina be unuseni ai e kau, bena Iehoram ida e raka lasi, Iehu Nimisi ida bae hedavari totona. Una Iehu na Iehova ese vada e horoa, Ahaba ena iduhu ihabua-tarina helaoareana.

<sup>8</sup> Iehu ese Ahaba ena iduhu taudia edia kara dika davadia e henidiava negana ai, ia na Iuda lohiadia bona Ahasia kakana natuna hahidaosi, Ahasia e bamoava taudia, ida e hedavari; bena ia ese e aladia mase.

<sup>9</sup> Ia ese danu Ahasia e tahua, bena Samaria ai e komuva ai na e dabaia tao. Idia ese e laohaia Iehu dekenai, bena e hamasea. Bena e guria, badina be idia na eto, Ia na Iehosafat, mai lalona idoinai ida

Iehova e tahua tauna, tubuna. Bena Ahasia ena iduhu ai asi tauna ta noho, basileia baine lohiaia diba.

*Atalia ese terono e dadia*

<sup>10</sup> Atalia, Ahasia sinana, ese e itaia, natuna na vada e mase, bena ia na e tore isi, Iuda pavapavana varavarana iboudiai e aladia mase.

<sup>11</sup> A Iehosabea, hanua pavapavana natuna hahinenia, ese Ioasa, Ahasia natuna, e abia, hanua pavapavana natuna mamaruanedia, bae aladia taudia, bogaragidia amo e hakaua oho hehuni, ireguna hahinenia ida mahuta daiutuna ta ai e hunidia. Hari Iehosabea, King Iehoram natuna hahinenia bona hahelāga tauna Iehoiada adavana, na unu e kara toma badina be ia na Ahasia taihuna; bena ia ese Atalia ena amo e hunia, taunabunai se alaia mase.

<sup>12</sup> Bena ia na idia ida e nohova, lağani tauratoi lalodliai, Dirava ena dubu ai e komuva, Atalia ese tano e lohiaiava negana ai.

## 23

<sup>1</sup> Lağani ihahituna ai Iehoiada na e boga auka, sinahu biagudia, Asaria Ierohamo bona Ismael Iehohanen bona Asaria Obed bona Maaseia Adaia bona Elisafat Sikri, ida e henega bou.

<sup>2</sup> Bena idia na Iuda tanona e rakaia hanai, Levi taudia Iuda hanuadiah iboudiai lalodia amo bona Israel iduhudia ikwaradiah taudia na e haboudia; bena idia na Ierusalem ela.

<sup>3</sup> Bena hebou taudia iboudiai na hanua pavapavana ida e hegwaumata heheni, Dirava ena dubu ai. Bena Iehoiada ese e hamaorodia, eto, A itaia, hanua pavapavana natuna; ia na baine

lohia, Iehova ese David garana e herevalaidia heğereğerena.

<sup>4</sup> Ini ba kara toma: umui hahelağā taumui bona Levi taumui dina helāğā ai ġaukara amo ba raka oho na orea toi ai ba haheparara; bona orea ta na ikoukou bae gimadia,

<sup>5</sup> ma orea ta na pavapava ena rumā ai bae noho, ma orea ta na Dubu Badina Ikoukouna ai bae noho. A taunimanima iboudiai na Iehova ena dubu maguna lalodiai bae noho.

<sup>6</sup> Ta ese Iehova ena dubu lalonai basine raka vareai, hahelağā taudia bona Levi taudia, mai edia ġaukara taudia, sibodia mo bae raka vareai dibā, badina be idia na hehelağā. A taunimanima iboudiai ese Iehova ena hahedua bae badinaia.

<sup>7</sup> Levi taudia ese hanua pavapavana bae ginia heğeğe, ta ta mai edia tuari ġaudia imadia ai; bena daika na dubu ai baine raka vareai na bae alaia mase. Hanua pavapavana na ba bamoa, ena raka vareai ai bona ena raka lasi ai.

<sup>8</sup> Levi taudia bona Iuda taudia iboudiai ese hahelağā tauna Iehoiada ena haheğani iboudiai heğereğeredia mo e kara. Ta ta ena orea ena orea e mailaidia, dina helāğā ai ġaukara amo bae raka oho oreadiā bona dina helāğā ai ġaukara bae matamaia oreadiā; badina be hahelağā tauna Iehoiada ese orea na se siaidia oho.

<sup>9</sup> Bena hahelağā tauna Iehoiada ese io bona kesi, badadia bona marağidia, gunaguna King David ena, Dirava ena dubu ai e miava gaudia, na e abidia, orea biagudia e henidia.

<sup>10</sup> Bona taunimanima iboudiai na hanua pavapavana igimana ai e halaodia, ta ta mai edia tuari ġaudia imadia ai, dubu diho kahana amo

ela bona dubu mirigini kahana ai, ihaboulaina patana bona dubu e ginia hegege.

<sup>11</sup> Bena ia ese hanua pavapavana natuna e hakaua lasi, havava gauna na kwarana ai e atoa, bona dagi toana e henia; bena idia ese ia e gwauraia hanua pavapavana. Bena Iehoiada mai natuna ida ese ia e horoa; bena eto, Hanua pavapavana baine mauri daudau.

<sup>12</sup> Atalia na rege e kamonai, taunimanima na e heau bona hanua pavapavana e imodaia, bena ia na Iehova ena dubu ai e raka vareai, taunimanima dekediai.

<sup>13</sup> E roha lao negana ai hanua pavapavana e itaia, raka-vareaina ai e gini, ena au-tubua badibadinai; orea biagudia bona kibi-hiriri taudia danu hanua pavapavana badibadinai gigini; bona tano taudia iboudiai e moaleva bona kibi e hiririva, bona ane-abi taudia mai edia hatai-hatai gaudia ese moale e gunalaiava. Bena Atalia ese ena dabua e dare, e boi lolo, eto, Tao-tore! Tao-tore!

<sup>14</sup> Bena hahela ga tauna Iehoiada ese tuari oreana biagudia e hakaudia lasi, e hereva henidia, eto, Gima taudia padadia amo ba hakaua lasi; ia murina amo baine raka tauna na dare amo bavalaia mase. Badina be hahela ga tauna eto, Iehova ena dubu ai basio alaia mase.

<sup>15</sup> Bena idia ese e dabaia tao; bena hosi edia raka vareai dalana amo hanua pavapavana ena ruma e lao henia, unuseni ai e alaia mase.

<sup>16</sup> Bena Iehoiada ese ia bona taunimanima iboudiai bona hanua pavapavana na e haherohe-dia maino, idia na Iehova ena orea taudia ai baela totona.

**17** Bena taunimanima iboudiai na Baal ena dubu ela, eha ġigġia dobi; ena ihaboulaina patadia bona ena kaivakuku danu e hamakohidia rohoroho; bona Matan, Baal ena hahelaġa tauna, na ihaboulaina patadia vairadai e alaia mase.

**18** Bena Iehoiada ese Iehova ena dubu igimana taudia e atodia: idia e biagudia taudia be hahe-laġa taudia Levi oreana amo, bona Levi taudia. Unu na David ese edia orea ta ta ai e atodia, Iehova ena dubu ġaukaradia bae biagudia, bona ġole-oho bouboudia bae hahelaġadie Iehova ena, Mose ena taravatu ai e torea heġereġerena, mai moaledia bona mai anedia ida, David ena hahe-dua heġereġerena.

**19** Ia ese danu ikoukou igimadia taudia na Iehova ena dubu ikoukoudia ai e atodia, se ha-heġoева tauna ta basine raka vareai heloareana.

**20** Bena ia ese orea biagudia bona hanua lohiadia, taunimanima e lohiadia taudia, bona tano taudia iboudiai, na e abidia; bena idia ese hanua pavapavana na Iehova ena dubu amo e hakaua diho, atai ikoukouna amo e raka hanai, ela hanua pavapavana ena rum a i. Bena idia ese pavapava teronona ai e hahelaia kau.

**21** Taunabunai, tano taudia iboudiai e moaleva; Atalia na dare amo e alaia mase murinai hanua na asi reġereġena.

## 24

### *Ioasa, Iuda pavapavana*

**1** Ioasa e lohia matama negana ai ena mauri laġanidie na hitu hona; ia na laġani hari-ahui Ierusalem ai e lohiava. Sinana ladana na Sibia; ia na Bere-sieba hahinena.

<sup>2</sup> Ioasa na Iehova vairanai e kara maoro-maoro, hahelaġa tauna Iehoiada ena mauri dinadia iboudiai lalodiae.

<sup>3</sup> Iehoiada ese ia adavana raruia e abidia hid; bena ia ese natuna mamaruanedia bona hahine-dia e havaradiae.

<sup>4</sup> Una murinai, Ioasa na lalona e hadaia Iehova ena dubu baine hanamoia lou eto.

<sup>5</sup> Bena ia ese hahelaġa taudia bona Levi taudia e haboudia, e hereva henidie, eto, Iuda hanuadie baola, Israel taudia iboudiae edia amo moni ba habou, laġani ta ta amo emui Dirava ena dubu ba hanamoia helaoreana; ġaukara ba haharagaia. A Levi taudia ese ġaukara na se haharaġaia.

<sup>6</sup> Taunabunai, hanua pavapavana ese hahelaġa tauna badana Iehoiada e boiria, e nanadaia, eto, Badina be dahaka Levi taudia so haduadie goada, idia ese Iuda bona Ierusalem amo *tax* monina, Iehova ena hesiai tauna Mose ese Israel hegogona latanai e gwauraia ġauna, taravatu mauana kalgħana ena, asie abia, asie mailaia?

<sup>7</sup> Badina be una hahine dikana Atalia natuna mamaruanedia ese Dirava ena dubu e daea, bona Iehova ena dubu ai e hahelaġadie gaudia iboudiae vada e ġaukaralaidia, Baal ediae.

<sup>8</sup> Taunabunai hanua pavapavana ese e haġānidie, bena idia ese maua ta e karaia, Iehova ena dubu ikoukouna murimurinai e atoa.

<sup>9</sup> Bena Iuda bona Ierusalem ai e gwauraia hedinarai, *tax* monina bae mailaia Iehova ena, Dirava ena hesiai tauna Mose ese tano ġaġaena ai Israel latanai e gwauraia ġauna.

<sup>10</sup> Bena lohia iboudiae bona taunimanima iboudiae e moale hisi dae. edia *tax* monidia e

mailai, maua lalonai e uda dobi, ela bona e ore vaitani.

<sup>11</sup> Bena Levi taudia ese moni momo maua ai e itava negadia ai, idia ese e laohaiava hanua pavapavana ena heitatao taudia dekediai; unu negadia ai hanua pavapavana ena toretore tauna bona hahelağā tauna badana ena heitatao tauna na e maiva, maua anina e bubuava; bena maua ma e laohaiava, gabuna ai e atoava. Dina ta ta amo unu e kara tomava, bena moni momo vada e haboudia.

<sup>12</sup> Bena hanua pavapavana bona Iehoiada ese unu moni na Iehova ena dubu ġaukaradia e ita taova taudia e henidia; bena idia ese nadi īgaukaralaidia taudia bona kamuta taudia e vatudia, Iehova ena dubu bae hanamo lou totona, bona auri bona auri labora-labora īgaukaralaidia taudia danu e vatudia, Iehova ena dubu ibanina totona.

<sup>13</sup> Taunabunai ġaukara lalonai e vareai taudia na e ġaukara goadagoada, bona dubu ibanina vada e harağā idia imadia ai; idia ese Dirava ena dubu ma e hanamo lou oromana korikorina ai, bona e ha-aukaia danu.

<sup>14</sup> Gaukara e ha-orea, bena moni orena na hanua pavapavana bona Iehoiada vairadiai e atoa. Una moni amo Iehova ena dubu kohuna idau-idau e kara, ia isiaina ilao-henina ġaudia, bona ġole-oho boubou ġaudia bona e gabu muramuradia keberedia, bona *gold* bona *silver* ġaudia. Bena Iehoiada ena maun dinadia iboudiai lalod-diai ġole-oho bouboudia e hahelağadia loulouva, Iehova ena dubu ai.

<sup>15</sup> A Iehoiada na e buruka, ena mauri dinadia na momo herea; bena e mase. Ena mase negana ai,

ena mauri lağanidia na sinahu-ta toi-ahui.

<sup>16</sup> Bena David ena hanua ai e guria, pavapava bogaragidiai, badina be ia na kara namodia e karava Israel ai, bona Dirava enai, bona ena dubu enai.

<sup>17</sup> Iehoiada ena mase murinai, Iuda lohiadia na ema, hanua pavapavana e toma henia diho; bena hanua pavapavana ese e kamonai henidia.

<sup>18</sup> Bena idia ese Iehova, senedia edia Dirava, ena dubu e rakatania, Asera kaivakukudia bona kaivakuku haidaisiaidia e lao hen. Bena badu na Iuda bona Ierusalem latadiai e kau, edia kerere dainai.

<sup>19</sup> Gau tamona, ia ese peroveta taudia na bogaragidiai e siaidia lao, Iehova enai bae haloudia totona; idia ese e hahebada henidia, to asie kamonai.

<sup>20</sup> Bena Dirava ena Lauma ese Sekaria, hahelaga tauna Iehoiada natuna, na e rohea; bena tau-nimanima daediae gini, e hereva henidia, eto, Dirava na ini e gwau tomamu: Dahaka dainai Iehova ena hehağani o tata utumu, bena namomui basine vara diba? Umui ese Iehova vada o rakatania dainai, ia ese vada e rakatanimui.

<sup>21</sup> Bena idia ese ia ihadikana dalana e hene-galaia, bona hanua pavapavana ena hahedua dainai idia ese nadi amo e hodoa, Iehova ena dubu maguna lalonai.

<sup>22</sup> Una kara ai, Ioasa, hanua pavapavana, ese Iehoiada, Sekaria tamana, ena hebogahisi ienai e hahedinaraia na se laloa tao, a natuna e alaia mase. Bena mase e laova ai ia na eto, Iehova ese baine itaia, bona baine hadavaia.

<sup>23</sup> Lağani dokona ai, Suria tuari oreana na Ioasa ituari-henina totona ema. Iuda ai bona Ierusalem

ai e kau, bena taunimanima bogaragidia amo hanua lohiadiah boudiai e habuadia tari, bona edia kohu iboudiai e abi, Damasko pavapavana dekena e siai lao.

<sup>24</sup> Ena be Suria tuari oreana taudia na gagadoi, to Iehova ese tuari oreana bada-hereana na idia imadia ai e atoa, Iehova, senedia edia Dirava, vada e rakania dainai. Unuheto idia ese Ioasa latanai hahemaoro anina e kara henia.

<sup>25</sup> Idia na iena amo e raka oho, mai bero badahereana idia e rakania, bena ena hesiai taudia ese ia ihadikana dalana e henegalaia, hahelaǵa tauna Iehoiada natuna rarana dainai, bena ena mahuta ǵauna latanai e alaia mase. Taunabunai, ia na e mase; bena David ena hanua ai e guria, a pavapava edia gara ai asie guria.

<sup>26</sup> Ia ihadikana dalana e henegalaia taudia na Sabada, Simeata hane Amono natuna, bona Iehosabad, Simiriti hane Moab natuna.

<sup>27</sup> Ia natuna mamaruanedia sivaraidia, bona peroveta herevadia momo ia latanai e gwaurai, bona Dirava ena dubu ihagini-louna sivaraina, na Hanua Pavapavadia Bukana anina ihahedinaraina herevadia lalodiah e hetore. Bena ia natuna Amasia na ia gabuna ai e lohia.

## 25

### *King Amasia*

<sup>1</sup> Amasia e lohia matama negana ai, ena mauri laǵanidia na ruahui-ima. Ia na laǵani ruahui taurahani-ta Ierusalem ai e lohia. Ia sinana ladana na Ieho-adana, Ierusalem hahinena.

<sup>2</sup> Ia na Iehova vairanai e kara maorova, to dia mai lalo-ǵoevaǵoevana ida.

<sup>3</sup> Lohia siahuna na ia imana ai e ha-aukaia negana ai, ia ese ena hesiai taudia, ia tamana hanua pavapavana e alaia mase taudia, na e aladia mase.

<sup>4</sup> A idia natudia na ia ese se aladia mase, taravatu na Mose ena buka ai e toreia heğereğerenen; unuseni ai Iehova e haheğani, eto “Tama na basio aladia mase natudia daidiae, eiava memero na basio aladia mase tamadia daidiae; a ta ta ena kara dika ena kara dika daidiae bae mase”.

<sup>5</sup> Bena Amasia ese Iuda taudia e haboudia, edia iduhu ta ta daha biagudia bona sinahu bi-agudia e atodia, Iuda idoinai bona Beniamina idoinai unu e karadia toma. Lagani ruahui vada e hanai tataudia na e haboudia, bena e duahidia, iboudiae na abi-hidi taudia domaga-toi,\* tuari ai bae heğereğere bona io bona kesi iğaukaralaidea mai dibadia taudia.

<sup>6</sup> Ia ese danu goada-herea taudia domaga-ta<sup>†</sup> na Israel amo e vatudia, davadia na *silver talent* sinaltu-ta.

<sup>7</sup> Dirava ena tau ta ia dekena ema, eto, Pavapava e, Israel tuari oreana na oi ida basiola, badina be Iehova na dia Israel ida, dia ini Efraim taudia iboudiae ida.

<sup>8</sup> A boma laloa ina dala amo tuari ai ba goada, Dirava ese baine tahomu dobi, inai taudia vairadiae; badina be Dirava na mai siahuna baine kahamu eiava baine tahomu dobi.

<sup>9</sup> Bena Amasia ese Dirava ena tau e nanadaia, eto, A hari talent sinahu-ta Israel tuari oreana vada na henidiae na ede baia tomaia? Dirava ena tau e haere, eto, Iehova baine henimu diba ġauna

---

\* **25:5** Domaga-toi = 300,000. † **25:6** Domaga-ta = 100,000. **Silver talents** sinahu-ta = 5 tonnes sisivana.

ese una na baine hereaia.

<sup>10</sup> Bena Amasia ese tuari oreana, Efraim amo ia dekena vada ema ġauna, na e hakarohodia, e siaidia lao, edia hanua bae lou hen. Bena edia badu e bada Iuda enai; bena edia hanua ela mai badu ġaraġgaradia ida.

<sup>11</sup> A Amasia na e boga auka, ena orea taudia e hakaudia lasi, Damena Kourana ela, Seiri taudia gerebu-ta<sup>‡</sup> e rahudia mase.

<sup>12</sup> Iuda taudia ese gerebu-ta ma e abidia mauri; bena haga nadina ta dorina e laohaidia, una haga nadina dorina amo e tahodia dobi; iboudiai na e hehuari patapata.

<sup>13</sup> A Amasia ese e haloua oreana, ia ida tuari lalonai basiela eto taudia, na Iuda hanuadiah e tuari henidiah, Samaria amo ela bona Bete-horono lalodiah idia ese hanua taudia daha-toi e aladia mase, bona kohu momo e abi, e laohai.

<sup>14</sup> Amasia na Edom taudia iala-masedia amo e lou murinai ia ese Seiri taudia edia dirava laulau-dia e mailaidia, e haginidiah iena dirava; bena ia ese e toma henidiah diho, bona boubou ġaudia e hahelaġadiah edia.

<sup>15</sup> Taunabunai Iehova ese Amasia e badu henia, bona peroveta tauna ta ia dekena e siaia. Una peroveta tauna ese e hereva henia, eto, Dahaka dainai varavaradia na oi imamu amo asie hamauridiah besena edia dirava vada o lao henidiamu?

<sup>16</sup> Dounu e herevava ai hanua pavapavana ese e gwau henia, eto, Ai ese pavapava ena hahealo tauna ai vada a halaomu a? A hadokoa! Baia alamu mase anina be dahaka? Taunabunai, peroveta tauna ese ena hereva e hadokoa; a ia eto,

---

<sup>‡</sup> **25:11** Gerebu-ta = 10,000.

Lau dibagu Dirava ese lalona vada e ha-aukaia, baine habuamu tari, badina be ini vada o kara toma bona egu hahealo herevadia so kamonai henidia.

<sup>17</sup> Bena Amasia, Iuda pavapavana, na hahealo e tahua, bena Ioasa, Iehoahasa Iehu natuna, Israel pavapavana, dekena e hesiai, eto, Aoma, vairada aitame heita heheni.

<sup>18</sup> Bena Ioasa, Israel pavapavana, ese hereva na Amasia, Iuda pavapavana, dekena e siaia lao, eto, Lebanon ava-ḡiniḡinina ta na Lebanon sida-auna dekena e siaia lao, eto “Natumu kekenina na lau natugu maruanena ba henia, baine adavaia”; a Lebanon uda-boromana ta ese raka-hanaina ai una ava-ḡinigini na e moia tao.

<sup>19</sup> Oi na o tomu “A itaia; Edom vada na rahua mase”, bena lalomu e heabi isimu, o heaḡimu. A harihari emu hanua ai ba noho; anina be dahaka hekwarahi ba havaraia, bena ba moru, oi bona Iuda idoinai danu oi ida?

<sup>20</sup> Bena Amasia na se kamonai; badina be una na Dirava ena amo, inaidia imadia ai baine atodia helaooreana, idia ese Edom diravadia e tahudia dainai.

<sup>21</sup> Taunabunai Ioasa, Israel pavapavana, na e dae ela; bena ia bona Amasia, Iuda pavapavana, na e hevaira heheni tuari ai, Bete-semese ai, Iuda tanona ai.

<sup>22</sup> Bena Iuda na Israel ese e hadarerea, bona Iuda taudia na e heau, ta ta ena rumu ena rumu ela.

<sup>23</sup> Bena Ioasa, Israel pavapavana, ese Amasia, Iuda pavapavana, Iehoasa Ahasia natuna, e abia mauri, Bete-semese ai. Ia ese Ierusalem e laohaia,

bena Ierusalem maǵuna e ġigia dobi, Efraim Ikoukouna amo ela bona Daiguni Ikoukouna, padadia na kiubit sinahu-hani.

<sup>24</sup> Ia ese danu *gold* bona *silver* idoinai bona ġau iboudiai Dirava ena dubu ai e davari ġaudia, na e abidia, bona Obed-edom danu e abia, idia ida. Ia ese pavapava ena ruma kohuna namohereadia e dadidia, bona abi-mauri taudia danu; bena Samaria e lou lao.

<sup>25</sup> Amasia Ioasa, Iuda pavapavana, na laġani gwauta-imma dounu mauri, Ioasa Iehoahasa, Israel pavapavana, ena mase murinai.

<sup>26</sup> Amasia ena kara oredia, matamana ela bona dokona, na Iuda bona Israel Pavapavadia Bukana ai e hetore, ani?

<sup>27</sup> Iehova ena amo e raka oho negana amo idia ese ia ialana dalana e henegalaia Ierusalem ai; bena ia na e heau, Lakisi ela. A idia ese haida na ia murina amo e siaidia lao ela bona Lakisi; unuseni ai e alaia mase.

<sup>28</sup> Bena hosi ai e atoa kau, e laohaia; bena Ierusalem ai e guria, tubu tama dekediai, David ena hanua ai.

## 26

### *King Usia*

<sup>1</sup> Bena Iuda taudia iboudiai ese Usia na ena mauri laġanina ihagwauta-tauratoina ai e abia, hanua pavapavana ai e halaoa, tamana Amasia gabuna ai.

<sup>2</sup> Ia ese Elata e haginia, bona Iuda hanuana ta ai ma e halaoa, hanua pavapavana na tubu tama dekediai e mahuta murinai.

<sup>3</sup> Usia e lohia matama negana ai ena maun lağanidia na gwauta-tauratoi; ia na lağani imahui-rua Ierusalem ai e lohia. Sinana ladana na lekolia, hane Ierusalem.

<sup>4</sup> Ia na Iehova vairanai e kara maoromaoro, tamana Amasia ena kara iboudiai heğereğeredia ai e kara.

<sup>5</sup> Ia ese Dirava itahuna na Sekaria ena nega ai e matamaia; hari Sekaria ese Dirava garina e hadibalaia; bona Iehova e tahuava negadia iboudiai lalodiai, Dirava ese ena namo e habadaia.

<sup>6</sup> Ia na e raka lasi, Filistia taudia e tuari henidia, Gata bona labne bona Asdod mağudia eha ġigidia dobi. Ia ese hanua haida na Asdod tanona ai bona gabu haida ai danu e haginidia, Filistia taudia padadiai.

<sup>7</sup> Dirava ese e durua, Filistia taudia ituari-henidia ai, bona Arabia taudia Guru-baal ai e no-hova bona Meunimi taudia ituari-henidia ai danu.

<sup>8</sup> Amono taudia ese heaiva ġaudia na Usia e henia, bona ia harina vada e haperea ela bona Aigupto tano-hetoana; badina be ena goada e habadaia e laova.

<sup>9</sup> Ina danu, Usia ese kohoro e haginidia Ierusalem ai, Daiguni Ikoukouna bona Koura Ikoukouna badibadidiai bona mağu diagunidia ai, bona e ha-aukadia, tuari gabudia ai baela.

<sup>10</sup> Ia ese danu kohoro haida tano ġaġaena ai e haginidia, bona guri momo e ġei, badina be ena seri na momo, Sefela ai bona taora ai danu. Ia na mai ena biru taudia bona ena vine ireğudia taudia, ororo ai bona nomu tanodia ai, badina be biru e ura henia.

**11** Ma ina danu, Usia na mai ena tuari oreana, tuari ai heğereğere taudia, edia orea ta ta ai e haboudia, leiele toretore tauna, bona Maaseia, heitatao tauna, ese e hagaudia heğereğerena. Bi-agudia na Hanania, hanua pavapavana ena tuari lohiana ta.

**12** Iduhu ikwaradia taudia, goada-herea taudia, iboudiai na daha-rua sinahu-tauratoi.

**13** Tuari oreana taudia idia henudiai iboudiai na domaga-toi daha-hitu sinahu-ima;\* idia na gogoada heherea, tuari ai bae tuari diba, bona hanua pavapavana iduruna mai dibadia, inai taudia ituari-henidia ai.

**14** Bona Usia ese kesi bona io bona kwara ġaudia bona auri dabuadia bona peva bona vilipopo nadidia e abi heğaeğae, tuari taudia iboudiai edia.

**15** Bona Ierusalem ai ia na ġau haida e kara, aonega taudia ese ikaradia daladia e lalo davari heğereğerena, kohoro ai bona maġu daigunidia ai bae heato, diba ikinolaidia bona nadi badadia ipidi-lasilaidia. Bena ia harina e pere rohoroho, badina be heduru badana e davaria ela bona vada e goada.

**16** A e goada negana ai, ena heaġi e vara, unu amo e dika Badina be Iehova, ena Dirava, enai e kara koikoi; ia na Iehova ena dubu ai e raka vareai, muramura patana ai muramura mai bonana baine gabua eto.

**17** A hahelaġa tauna Asaria na ia murina amo e raka vareai, Iehova ena hahelaġa taudia taurahani-ahui, boga-auka taudia, ida.

**18** Bena idia ese King Usia e laoa ahu, eto, Usia

\* **26:13** Domaga-toi daha-hitu sinahu-ima = 307,500.

e, dia oiemu ġaukara muramura mai bonana ba gabua Iehova ena, a Aaron garana hari vada e hahelaġadie, muramura mai bonadia bae gabu. Gabu helaġana amo a raka lasi, badina be vada o kara kerere, bona ina kara ai hahenamo na Iehova ena amo basio abia.

<sup>19</sup> Bena Usia na e badu. Una negana ai gida keberena ta be ia imana ai, muramura igabulaina ġauna, bena hahelaġa taudia e badu henidia negana ai lepra na e vara ia baguna ai, hahelaġa taudia vairadiae, Iehova ena dubu lalonai, muramura patana badibadinai.

<sup>20</sup> Bena hahelaġa tauna badana Asaria bona hahelaġa taudia iboudiae ese ia e raraia, e itaia baguna na mai leprana. Bena e doria lasi haraġa, bona ia sibona danu e raka lasi haraġa, badina be Iehova ese vada e hahisia.

<sup>21</sup> Bena King Usia vada lepra tauna, ela bona ena mase dinana. Ia na lepra tauna dainai sibona ena ruma ta ai e nohova, badina be mai taravatuna, Iehova ena dubu ai basine raka vareai. Bena ia natuna Iotam ese hanua pavapavana ena ruma e biagua, bona tano taudia e lohiadia.

<sup>22</sup> Usia ena kara oredia, matamana ela bona dokona, peroveta tauna Isaia Arnoso ese sivaraidia e tore.

<sup>23</sup> Usia na tubu tama dekediai e mahuta; bona tubu tama dekediai e guria, pavapava edia gara gabuna ai; badina be idia eto, Ia na lepra tauna. Bena natuna Iotam na ia gabuna ai e lohia.

<sup>1</sup> Iotam e lohia matama negana ai, ena mauri lağanidia na ruahui-imā; ia na lağani gwauta-tauratoi Ierusalem ai e lohia. Sinana ladana na Ierusa; ia na Sadok natuna hahinena.

<sup>2</sup> Ia na Iehova vairanai e kara maoromaoro, tamana Usia ena kara iboudiai heğereğeredia ai e kara; ġau tamona ia na Iehova ena dubu ai se raka vareai kava. A taunimanima na dounu e kara havarava.

<sup>3</sup> Ia ese Iehova ena dubu atai kahana ikoukouna e karaia, bona Ofele mağuna latanai danu ruma momo e hagini.

<sup>4</sup> Ia ese danu hanua haida e hadaidia Iuda ororodia ai, bona tuari rumadia bona kohoro e haginidia, ororo mai udadia doridia ai.

<sup>5</sup> Ia ese Amono taudia edia pavapava e tuari henia, bena e hadareredia. Bena una lağani lalonai Amono taudia ese *silver talent* sinahu-ta,\* bona uit koro gerebu-ta, bona bali koro gerebu-ta, e henia. Amono taudia ese danu unu heğereğeredia ma e henia, lağani iharuana ai bona lağani ihatoina ai.

<sup>6</sup> Taunabunai, Iotam na e goada e Iehova, badina be ena dala nahuana e tohoava Iehova, ena Dirava, vairanai.

<sup>7</sup> Iotam ena kara oredia, bona ena tuari iboudiai, bona ena ġaukara daladia, sivaraidia na Israel bona Iuda Pavapavadia Sisigadia Bukana ai vada e hetore.

<sup>8</sup> E lohia matama negana ai, ena mauri lağanidia na ruahui-imā; ia na lağani gwauta-tauratoi Ierusalem ai e lohiava.

\* **27:5 Silver talents**sinahu-ta = 5 tonnes sisivana. Koro na Heberu taudia edia hahetoho ġauna ta.

<sup>9</sup> Bena Iotam na tubu tama dekediai e mahuta; David ena hanua ai e guria. Bena ia natuna Ahasa na ia gabuna ai e lohia.

## 28

### *King Ahasa*

<sup>1</sup> Ahasa e lohia matama negana ai ena mauri lağanidia na ruahui; ia na lağani gwauta-tauratou e lohiava Ierusalem ai. Ia na Iehova vairanai se kara maoromaorova, senena David e karava heğereğerenä,

<sup>2</sup> a Israel pavapavadia edia dala ai e rakava. Ia ese kaivakuku na e havevea aurina amo e karadia, Baal edia;

<sup>3</sup> bona muramura mai bonadia e gabu, Hinom natuna ena koura ai; bona natuna mamaruanedia na ġole-oho bouboudia ai e halaodia, Iehova ese Israel taudia vairadai e luludia lasi besedia edia kara dika-hereadia heğereğeredia.

<sup>4</sup> Ia ese danu boubou karadia e karava bona muramura mai bonadia e gabuva, atai gabudia ai bona ororo ai bona au mauridia iboudiai henudiae.

<sup>5</sup> Taunabunai Iehova, ena Dirava, ese Suria pavapavana imana ai e atoa. Suria pavapavana ese e hadarerea, bona ena orea taudia hutuma bada e abidia mauri, bena Damasko e laohaidia. Israel pavapavana imana ai e atoa danu; bena una tau ese e hadarerea mai ala-ala badana ida.

<sup>6</sup> Badina be Peka Remalia ese Iuda taudia domaga-ta gerebu-rua\* na dina tamona ai e aladia mase, iboudiae na goada taudia; badina be idia ese Iehova, senedia edia Dirava, vada e rakanania.

---

\* **28:6** Domaga-ta gerebu-rua = 120,000.

**7** Bena Sikri, goada-herea tauna ta Efraim ai, ese Maaseia, hanua pavapavana natuna, bona Asarikama, pavapava ena rumu biaguna, bona Elkana, hanua pavapavana badibadinai e gini tauna, na e aladia mase.

**8** Israel taudia ese varavaradia domaga-rua<sup>†</sup> e abidia mauri, hahine, memero, bona kekeni; bona kohu momo edia amo e abi, bena unu kohu na Samaria e laohai.

**9** A Iehova ena peroveta tauna ta, ladana Odede, na unuseni ai. Bena ia na e raka lasi, tuari oreana na Samaria irakakahi-henina ai e hedavari henidia; bena e hamaorodia, eto, A itaia, Iehova, semui edia Dirava, ese Iuda taudia e badu henidia dainai, ia ese umui imamui ai e atodia; a umui ese vada o ala-ala henidia mai badumui ida, una badu na e dae ela guba ai.

**10** Harihari emui lalo-hadai be Iuda taudia bona Ierusalem taudia, mamaruanedia bona hahinedia, ba ġuidia, bona emui hesiai taudia ai ba halaodia. A umui danu sibomui ese Iehova, emui Dirava, asio kara dika henia a?

**11** Harihari ba kamonai henigu, varavaramui o abidia mauri na ba siaidia lou, badina be Iehova ena badu ġaraġara na umui latamui ai.

**12** Lohia haida danu Efraim oreana amo, Asaria Iohanan bona Berekia Mesilemoto bona Iehisikia Salumu bona Amasa Hadalai, ese tuari amo e maiva taudia ilao-ahudia e gini,

**13** e hamaorodia, eto, Abi-mauri taudia na iniseni ai basio hakaudia vareai; badina be o haeroamu karana ese baine hakerereda Iehova vairanai, bena una kerere na eda kara dika bona eda kerere gunadia latadiai baine heato ġau.

---

<sup>†</sup> **28:8 Domaga-rua = 200,000.**

Badina be eda kerere vada e bada, bona badu ġaraġarana na Israel latanai.

<sup>14</sup> Taunabunai, tuari taudia ese abi-mauri taudia bona e abi kohudia na lohia bona hebou taudia iboudiai vairadiae rakatanidia.

<sup>15</sup> Bena hari ladadia vada e hegwařurai taudia na e tore isi; bena idia ese unu abi-mauri taudia na e abidia, bona idia bogaragidiae asi dabuadie taudia iboudiae na unu e abi ġaudia amo e hadabualaidia, bona tamaka e henidiae, bona aniani bona ranu e henidiae, bona taudia na dehoro amo e dahudiae. Bena edia manoka taudia iboudiae na doniki lata-diae e hahelaidiae kau; bena varavaradie dekedia e laohaidiae, Ieriko, pamu audia hanuana, lalonai. Bena idia na Samaria e lou lao.

<sup>16</sup> Una negana ai King Ahasa ese hereva na Asuria pavapavana dekena e siaia lao, una tau ese baine durua eto.

<sup>17</sup> Badina be Edom taudia ese Iuda na ma vada e daea bona e hadarerea, bona abi-mauri taudia vada e laohaidiae.

<sup>18</sup> Bona Filistia taudia ese Sefela kahana bona Iuda diho kahana hanuadie vada e tuari henidiae; bena Bete-semese bona Aialono bona Gederoto e abidia, bona Soko bona Timuna bona Gimiso, mai edia hanua maraġidiae ida; bena unuseni ai e nohova.

<sup>19</sup> Badina be Iehova ese Iuda e taoa tari, Ahasa, Israel pavapavana, dainai; badina be Iuda ai e kara havara, bona Iehova vada e gwau edeede heniae.

<sup>20</sup> Taunabunai Tiglata-pilnesere, Asuria pavapavana, na ia ituari-henina totona ema; bena e hahisihisia mo, a se hagoadaia.

<sup>21</sup> Badina be Ahasa ese Iehova ena dubu bona

pavapava ena rumा bona lohia edia rumা kohudia e abi, heaiva ġaudia na Asuna pavapavana e henia; to unu ese na se kahaia.

<sup>22</sup> Ena hisihisi negana ai ena gwau-edede Iehova enai ma e habadaia, hari King Ahasa ese.

<sup>23</sup> Badina be ia ese boubou ġaudia e hahelaġadie, Damasko diravadia, e hadarerea ġaudia, edia. Ia eto, Suria pavapavadia edia dirava ese idia e durudia dainai, lau ese boubou ġaudia baina haheġadie edia, bae durugu helaoreana. A idia ese ia bona Israel idoinai e hadikadia rohoroho.

<sup>24</sup> Bena Ahasa ese Dirava ena dubu kohudia e haboudia bona e utudia sisisisi; bona Iehova ena dubu iduaradia e koudia ahu. Bena ia ese ihaboulaina patadia e kara, ia sibona ena, Ierusalem daigunidia iboudiai lalodiae.

<sup>25</sup> Iuda hanuadie iboudiai Ialodiai danu ia ese atai gabudia e kara, unuseni ai muramura mai bonadia bae gabu, idau dirava edia; unu amo ia ese Iehova, senena edia Dirava, e habadua.

<sup>26</sup> Ena kara orena bona ena dala iboudiae, matama ela bona dokona, na Iuda bona Israel Pavaradie Sisigadie Bukana ai vada e hetore.

<sup>27</sup> Bena Ahasa na tubu tama dekediai e mahuta. Hanua lalonai e guria, Ierusalem ai; badina be Israel pavapavadia edia gara ai asie vareailaia. Bena ia natuna Hesekia na ia gabuna ai e lohia.

## 29

### *King Hesekia*

<sup>1</sup> Hesekia e lohia matama negana ai ena mauri laġanidie na ruahui-ima. Ia na laġani ruahuitaurahanita e lohiava Ierusalem ai. Sinana ladana na Abia, Sekaria natuna hahinena.

<sup>2</sup> Ia na Iehova vairanai e kara maoromaoroava, senena David ena kara iboudiai heğereğeredia ai e karava.

*Hesekia ese dubu e kehoa lou*

<sup>3</sup> Ena lohia lağanina gini-gunana huana gini-gunana ai, ia ese Iehova ena dubu iduaradia e kehodia bona e banidia.

<sup>4</sup> Hahelağā taudia bona Levi taudia na e hakau-dia vareai, mağu lalonai e haboudia, mairiveina kahana ai.

<sup>5</sup> Ia ese e hamaorodia, eto, Levi taumui e, a kamonai henigu! Sibomui ba hahelağā, bona Iehova, senemui edia Dirava, ena dubu ba hahelağāia; bona miro na gabu helağana amo bavabia lasi murimuri ai.

<sup>6</sup> Badina be tamada vada e gwau edeede, Iehova, eda Dirava, vairanai vada e kara havara; idia ese ia vada e rakatania, bona vairadia na Iehova ena noho gabuna amo e mede kerehai, e gini muri.

<sup>7</sup> Dehe iduaradia danu vada e koudia, bona lamepa vada e habododia, muramura mai bona-dia asie gabu bona ġole-oho bouboudia asie hahe-lağadia, Israel Diravana ena gabu helağana lalonai.

<sup>8</sup> Taunabunai, Iehova ena badu na Iuda bona Ierusalem latadiai e kau, taunimanima ese igari-henidia bona ihoalaidia bona isi-henidia ġaudia ai vada e halaodia, umui sibomui ese matamui ai o itamu heğereğerena.

<sup>9</sup> Badina be o itaiamu, tamada na dare amo vada e mase, bona natuda mamaruanedia bona hahinedia bona adavadia na iğui ai e nohomu, una dainai.

<sup>10</sup> Harihari lau lalogu na e uramu Iehova, Israel Diravana, ida baia herohemaino, ena badu īgarāgara na ita eda amo baine heabi oho helaoreana.

<sup>11</sup> Natugu e, harihari basio hedavauhe, badina be Iehova ese vada e abimui hidi, ia vairanai ba gini, ia ba toma henia diho, ia isiaina ba lao heni, bona ienai muramura mai bonadia ba gabu totona.

<sup>12</sup> Bena Levi taudia na e tore isi. Taudia bini. Kohat iduhuna amo: Mahata Amasai bona Ioel Asaria; Merari iduhuna amo: Kisa Abdi bona Asaria Iehalelele; Gereson iduhuna amo: loa Sima bona Eden loa;

<sup>13</sup> Elisafan iduhuna amo: Simri bona leuele; Asaf iduhuna amo: Sekaria bona Matania;

<sup>14</sup> Hemana iduhuna amo: Iehuele bona Simei; bona Iedutunu iduhuna amo: Semaia bona Usiele.

<sup>15</sup> Idia ese tadikakadia e haboudia, bena sibodia e hahelaġa; bena e raka vareai, hanua pava-pava ese Iehova ena hereva amo e haduadie hegereggerena, Iehova ena dubu bae haġoevaia totona.

<sup>16</sup> Bena hahelaġa taudia na Iehova ena dubu laloma daiutuna lalonai e raka vareai, bae haġoevaia totona; bena miro iboudiai Iehova ena gabu helagħana ai e davari na e abi lasi, Iehova ena dubu maġuna ai; bena Levi taudia ese e abi, e laohai ela bona Kidron sinavaina.

<sup>17</sup> Hua gini-gunana dinana gini-gunana ai idia ese hahelaġa ġaukaradia e kara matama; bena hua dinana ihataurahanina ai idia na Iehova ena dubu dehena ai e kau; bena dina taurahani lalodiae idia ese Iehova ena dubu e hahelaġaia, ela bona hua gini-gunana dinana ihagwautatauratoina ai e

hadokoa.

<sup>18</sup> Bena idia na Hesekia, hanua pavapavana, dekenai e raka vareai, eto, Ai ese Iehova ena dubu idoinai vada a ha góevaia, bona ġole-oho bouboudia patana, mai kohuna iboudiai ida, bona flaoa hela ġana patana, mai kohuna iboudiai ida.

<sup>19</sup> Kohu iboudiai, King Ahasa ese e lohiava negana lalonai ena gwau-edede ai e negedia ġaudia, na ai ese vada a he ġae ġaelaidia bona vada a hahe la ġadia; a itaia, ġaudia na Iehova ena ihaboulaina patana vairanai.

<sup>20</sup> Bena Hesekia, hanua pavapavana, na daba ai e tore isi, hanua ena heitatao taudia iboudiai e haboudia, bena Iehova ena dubu ai e dae kau.

<sup>21</sup> Idia ese boromakau mamaruanedia hitu bona mamoe mamaruanedia hitu bona mamoe natudia hitu bona nani mamaruanedia hitu e vareailaidia, boubou ġaudia ai baela, kara dika daidiai, basileia ena, bona gabu hela ġana ena, bona Iuda ena. Bena ia ese hahela ġa taudia, Aaron garana, na e ha ġanidia, idia ese unu ġau bae hahe la ġadia, Iehova ena ihaboulaina patana latanai.

<sup>22</sup> Taunabunai, idia ese boromakau mamaruanedia e aladia mase; bena hahela ġa taudia ese raradia e abi, ihaboulaina patana e nevarilaia; bona mamoe mamaruanedia e aladia mase, bona raradia na ihaboulaina patana e nevarilaia; mamoe natudia danu e aladia mase, bona raradia na ihaboulaina patana e nevarilaia.

<sup>23</sup> Bena nani mamaruanedia e mailai, hanua pavapavana bona hebou taudia dekediai, boubou ġaudia ai bae halao, kara dika dainai; bena idia ese imadia na latadiai e ato kau.

<sup>24</sup> Bena hahela ġa taudia ese e aladia mase, bona

raradia na kara dika dainai boubou ġauna ai e halaoa, ihaboulaina patana latanai, herohemaino ikaralaina, Israel taudia iboudiai edia. Badina be hanua pavapavana ese e haġanidia, ġole-oho boubouna bona kara-dika boubouna bae kara, Israel taudia iboudiai edia.

<sup>25</sup> Bena ia ese Levi taudia na Iehova ena dubu ai e atodia, mai edia botabota auridia, bona hatai-hatai ġaudia badadia bona maraġidia ida, David bona hanua pavapavana ena mata-hanai tauna Gad bona peroveta tauna Natan edia haheġani heġereġerena; badina be una haheġani na Iehova ena amo ema, ena peroveta taudia edia amo.

<sup>26</sup> Levi taudia na e gini, David ena botabota auridia bona ena hatai-hatai ġaudia imadia ai e abi; bona hahelaġa taudia danu, mai edia kibi ida.

<sup>27</sup> Bena Hesekia ese e haġanidia, ġole-oho boubouna na ihaboulaina patana ai bae hahelaġaia. Bena ihahelaġana e matamaia negana ai, Iehova ihanamolaina anena danu e ladaia isi, bona kibi e hiriri, bona David, Israel pavapavana, ena ġau e botadia bona e hataidia.

<sup>28</sup> Hebou idoinai e toma diho, bona ane-abi taudia ese ane e abi, bona kibi-hiriri taudia ese edia kibi e hiriri; una mo e kara toma ela bona ġole-oho boubouna ġaudia vada e haġoledia oho vaitani.

<sup>29</sup> Boubou karana e ore, bena hanua pavapavana bona ia ida e hebou taudia iboudiai na e igo diho, e toma diho.

<sup>30</sup> Bena Hesekia, hanua pavapavana, bona lohia taudia, ese Levi taudia e haġanidia, Iehova ihanamolaina anedia bae abi, David ena, bona Asaf, matai-hanai tauna, ena. Bena ihanamolaina anedia e abi mai moaledia ida. Bena e igo diho, e

toma diho.

<sup>31</sup> Bena Hesekia eto, Sibomui vada o hahelaāga, Iehova ena; harihari a raka kahi mai, boubou ġaudia bona hahenamo herahiadia na Iehova ena dubu ai a mailaidia. Bena hebou taudia ese boubou ġaudia bona hahenamo herahiadia e mailai; bona ura kwalimu taudia iboudiai ese ġole-oho boubouna ġaudia e mailaidia.

<sup>32</sup> Gole-oho boubouna ġaudia hebou taudia ese e mailaidia be inihohodia: boromakau mamaruanedia hitu-ahui, mamoe mamaruanedia sinahu-ta, bona mamoe natudia sinahu-rua; unu iboudiai na ġole-oho boubouna ġaudia, Iehova ena.

<sup>33</sup> Bona e hahelaāgadie herahiadia na boromakau mamaruanedia sinahu-tauratoi bona mamoe daha-toi.

<sup>34</sup> A hahelaāga taudia na dia hoho ġole-oho boubouna ġaudia iboudiai na bae kopadia, taunabunai hahelaāga taudia haida na sibodia do asie hahelaāga negana lalonai tadikakadia Levi taudia ese e durudia, ela bona ġaukara vada e ore; badina be Levi taudia edia lalo-maoromaorona ese nahelaāga taudia edia e hereaia, sibodia edia hahelaāga karana ai.

<sup>35</sup> Ĝole-oho ġaudia momomomo latadiai na maino boubouna ġaudia digaradia bona inuinu bouboudia, ġole-oho ġaudia edia, danu. Iehova ena dubu ġaukarana na unu e haginia lou toma.

<sup>36</sup> Bena Hesekia bona taunimanima iboudiai na e moale, Dirava ese taunimanima vada e kara henidia karadia daidiae; badina be una kara na vada e vara taku.

*Lagau-hanai Ariana*

<sup>1</sup> Hesekia ese hereva e siaia lao Israel bona Iuda kahadia idoidiai, bona revareva e tore Efraim bona Manase edia, idia na Iehova ena dubu Ierusalem ai baema, Iehova, Israel Diravana, ena lagau-hanai ariana bae karaia totona.

<sup>2</sup> Hanua pavapavana bona hanua lohiadia bona Ierusalem hebouna idoinai vada e henega, lagau-hanai ariana na hua iharuana ai bae karaia eto.

<sup>3</sup> (Idia na asi edia dala negana korikorina ai bae karaia, badina be hahelaġa taudia na asie heġereġere, haida na sibodia do asie hahelaġa dainai, bona taunimanima danu Ierusalem ai do asie hebou.)

<sup>4</sup> Bena una lalo-hadai na hanua pavapavana bona hebou idoinai e haeroa vada e namo.

<sup>5</sup> Taunabunai idia na e hahedua, Israel idoinai lalonai, Bere-sieba amo ela bona Dan, bae gwauraia hedinarai, taunimanima na Ierusalem baema, lagau-hanai ariana bae karaia Ierusalem ai, e gwauraia dalana heġereġerena ai, Iehova, Israel Diravana, ena; badina be idia hutuma ese asie badinaiava.

<sup>6</sup> Taunabunai, gwaukau taudia na Israel bona Iuda tanodia idoidiai e rakadia hanai, hanua pavapavana mai ena lohia taudia ida e tore revarevadia e laohai, hanua pavapavana ena ha-heġani heġereġerena, eto, Israel taumui e, Iehova, Abraham bona Isaak bona Israel edia Dirava, ba lou henia, ia ese umui kwabukwabumui, Asuria pavapavadia imadia amo vada o roho mauri tau-mui, ma baine haġeremui lou helaoreana.

<sup>7</sup> Tamamui bona tadikakamui ida basio heġereġere; idia ese Iehova, senedia edia Dirava, e

gwau edeede henia, una dainai ia ese e harahudia tari, umui ese o itaiamu heğereğerena.

<sup>8</sup> Basio aio auka, tamamui heğereğeredia, a Iehova enai ba hedaro dae, bona ena gabu helağana, ia ese vada e hahelağai hanaihanai ġauna, baoma; Iehova, emui Dirava, isiaina ba lao heni, ena badu ġarağara na umui emui amo baine heabi oho helaoreana.

<sup>9</sup> Badina be Iehova boma lou henia, tadikakamui bona natumui na e ġuidia taudia ese bae bogadia hisi, bena idia na ina tano bae lou henia. Badina be Iehova, emui Dirava, na mai ena harihari-bada bona mai ena hebogahisi; boma lou henia, ia na emui amo basine mede kerehai.

<sup>10</sup> Taunabunai, gwaukau taudia na hanua ta ta amo ela, Efraim bona Manase kahadia e rakadia hanai ela bona Sebulun; a idia ese e kirikirilaidia bona e ġonaġonalaidia.

<sup>11</sup> Asere bona Manase bona Sebulun taudia hida hona be sibodia e hahemanau, bena Ierusalem ela.

<sup>12</sup> Dirava imana na Iuda taudia latadiai danu, Ialodia ihatamonadia, hanua pavapavana bona hanua lohiadia ese Iehova ena hereva dainai e haheganilai karadia bae kara totona.

<sup>13</sup> Taunabunai, hutuma na Ierusalem ai e hebou, asie hatubua flaoana ariana na hua iharuana ai bae karaia totona. Hebou na bada herea.

<sup>14</sup> Idia na e ġaukara matama, ihaboulaina patadia Ierusalem ai e abidia oho bona muramura mai bonadia igabudia patadia iboudiai e abidia, e laohaidia, Kidron kourana ai e negedia.

<sup>15</sup> Bena hua iharuana dinana ihagwauta-hanina ai idia ese lagau-hanai mamoena e alaia mase.

Bena hahelaḡa taudia bona Levi taudia na e hemarai; taunabunai idia na sibodia e hahelaḡa, bena ġole-oho boubouna ġaudia na Iehova ena dubu ai e vareailai.

<sup>16</sup> Edia gini gabudia korikori ai e gini, Mose, Dirava ena tau, ena taravatu heġereġerena; bena hahelaḡa taudia ese Levi taudia imadia amo e abia rarana na e henevarilaia.

<sup>17</sup> Badina be hutuma una hebou lalonai na sibodia asie hahelaḡa; una dainai Levi taudia edia ġaukara ta be asie haheġoeva taudia iboudiai edia lagau-hanai mamoeđia e aladia mase, Iehova enai bae helaga totona.

<sup>18</sup> Badina be taunimanima hutuma na sibodia asie haheġoeva; momo na Efraim bona Manase bona Isakara bona Sebulun amo; ġau tamona idia ese lagau-hanai ariana e ania, dala idauna amo, dia taravatu ese e gwauraia dalana heġereġerena. Badina be Hesekia na idia daidiae vada e ġuriġuri, eto, Iehova namona ese

<sup>19</sup> unu lalodia vada e ura vaitani idia ese senedia edia Dirava, Iehova, bae tahua taudia iboudiai na edia dika baine gwau tao, ena be gabu helāgħana ena haheġoeva taravatudia asie badinadja.

<sup>20</sup> Bena Iehova ese Hesekia e kamonai henia, bona taunimanima na e hamauridia.

<sup>21</sup> Israel taudia Ierusalem ai e hebouva ese asie hatubua flaoana ariana na dina hitu lalodiae e karaia, mai moale badadia ida; bona Levi taudia bona hahelaḡa taudia ese Iehova e imodaia, dina ta ta lalodiae, bona ane e abi mai goadadia ida Iehova ena.

<sup>22</sup> Bena Hesekia ese Levi taudia na ena hereva amo e hagoadadia, badina be idia ese edia dibu namona vada e hahedinaraia, Iehova isiaina ilao-

henina lalonai. Taunabunai, hebou taudia ese aria anianidia e ani, dina hitu lalodai, bona hero-hemaino bouboudia e hahelaḡadia, bona Iehova, senedia edia Dirava, e hanamoia.

<sup>23</sup> Bena hebou taudia iboudiai ese ura tamona e uralaia hebou, aria na ma bae karaia lou dina hitu; taunabunai idia ese ma e karaia lou, dina hitu lalodai, mai moaledia ida.

<sup>24</sup> Badina be Hesekia, Iuda pavapavana, ese boromakau maruanedia daha-ta bona mamoe daha-hitu na hebou taudia e henidia, edia boubou ġaudia; bona hanua lohiadia ese boromakau maruanedia daha-ta bona mamoe gerebu-ta\* e henidia. Hahelaḡa taudia hutuma na sibodia e hahelaḡa.

<sup>25</sup> Iuda hegogona idoinai, bona hahelaḡa taudia bona Levi taudia, bona Israel amo ema taudia edia hegogo idoinai, bona noho-hedoia taudia Israel tanona amo ema, bona Iuda ai e noho hedoava taudia danu, na e moale.

<sup>26</sup> Taunabunai, moale na bada Ierusalem ai; badina be Solomon, David natuna, Israel pavapavana, ena nega amo ema, kara unuhetomana na Ierusalem ai se hedinarai.

<sup>27</sup> Bena hahelaḡa taudia bona Levi taudia na e tore tore isi, tanimanim e hanamodia. Bena gadodia na vada e kamonaidia, bona edia ġuriġuri na e dae, Dirava ena noho gabuna helāgħana guba ai.

## 31

<sup>1</sup> Ina idoinai e ore, bena Israel taudia iboudiai unuseni ai e hebouva na e raka lasi, Iuda han-

---

\* **30:24** Gerebu-ta = 10,000.

uadia ela, nadi au-tubuadia e hamakohidia ro-horoho, bona kaivakuku au-tubuadia e utudia, bona atai gabudia bona ihaboulaina patadia e ġigidia dobi, Iuda bona Beniamina tanodia idoidiai lalodiae, bona Efraim ai bona Manase ai, ela bona idia ese iboudiae vada e habuadia tari. Bena Israel taudia iboudiae na edia hanua e lou hen, ta ta ena gabu ena gabu ela.

*Hahelaga taudia bona Levi taudia edia noho daladia*

<sup>2</sup> Bena Hesekia ese hahelaġa taudia bona Levi taudia oreadia e duanaidia, orea ta ta edia ġaukara, hahelaġa taudia edia bona Levi taudia edia, heġeregeredia ai, ġole-oho bouboudia bona maino bouboudia bae hahelaġadia bona Iehova ena taruha ikoukoudia ai ġuriġuri ġaukaradia bae kara bona hahenamo bona heimodai bae hen helooreadia.

<sup>3</sup> Hanua pavapavana e hen ġaudia, ia sibona ena ġau amo, na ġole-oho boubou ġaudia ai e halaodia: daba bona adorahi ġole-oho bouboudia, bona dina helaġadia bona hua matamatadia bona e gwaurai ariadia edia ġole-oho bouboudia, Iehova ena taravatu ai e hetore heġereġerena.

<sup>4</sup> Bena ia ese Ierusalem ai e nohova taudia na e haġanidia, idia ese hahelaġa taudia bona Levi taudia ahudia korikoridua bae henidua, Iehova ena taravatu bae badinaia balaheni totona.

<sup>5</sup> Una haheġani herevana e piua rohoroho negana ai, Israel taudia ese ġau momo-herera e hen, uit bona bali anidia roboadua, bona vine ranuna, bona dehoro, bona bada-ranuna, bona uma anidia iboudiae; ġau iboudiae e karoadia,

karoa gwauta, bena karoa ta e mailaia. E mailai karoadia na momo herea.

<sup>6</sup> Israel taudia bona Iuda taudia Iuda hanuadia ai e nohova ese danu edia boromakau bona edia mamoe e karoadia, karoa gwauta, bena karoa ta na e mailaia, bona ġau helaġadie danu, vada e hahelaġadie Iehova, edia Dirava, ena; bena unu ġau na senu ai e atodia.

<sup>7</sup> Hua ihatoina ai e senudia matama, ela bona hua ihahituna ai e hadokoa.

<sup>8</sup> Hesekia bona lohia iboudiai ema hari senu e itadia negana ai, idia ese Iehova bona ena bese Israel na e hanamodia.

<sup>9</sup> Bena Hesekia ese hari senu daladia na haheġaġa taudia bona Levi taudia e nanadailaidia.

<sup>10</sup> Asaria, hahelaġa tauna badana, Sadok ena iduhu tauna, ese e haere henia, eto, Edia herahia ġaudia na Iehova ena dubu ai e vareailai matama negana amo ema bona harihari, ai na vada a ani-an, bogamai vada e kunu, bona bahu momo vada e mia, badina be Iehova ese ena orea taudia vada e hanamodia; una dainai ini ġau oredia momo herea vada ame hamia.

<sup>11</sup> Bena Hesekia ese e haġanidia, daiutu haida bae haheġaġaedia Iehova ena dubu ai. Bena idia ese e haheġaġaedia.

<sup>12</sup> Bena mai maoromaorodia ida herahia ġaudia bona e karoadia ġaudia bona ġau hahelaġadie na e vareailaidia. Heitatao tauna badana, unu ġau igimadia tauna, na Konania, Levi tauna; ihararuana na ia tadina Simei.

<sup>13</sup> Heitatao taudia haida ese Konania tadina Simei ida e durudia. Ladadia bini: Iehiele, Asasia, Nahata, Asahele, Ierimoto, Iosabad, Eliele, Isimakia, Mahata, Benaia; Hesekia, hanua pavapa-

vana, bona Asaria, heitatao tauna badana Dirava ena dubu ai, ese e duanaidia.

<sup>14</sup> Herahia ġaudia, taunimanima edia lalo-namo ai Dirava e henia ġaudia, na Kore, Levi tauna Imna natuna, mairiveina kahana ikoukouna igimana tauna, ese e itadia tao, Iehova ahuna bona helaġa-herea herahiana ahuna danu baine ato tabe tottona.

<sup>15</sup> Ia iduruna, hahelaġa taudia edia hanua hidaoxi lalodai, be Eden, Miniamini, lesua, Semaia, Amaria bona Sekania; idia ese e durua balaheni, tadikakadia badadia bona maraġidia ahudia e henidia, edia orea ta ta ai.

<sup>16</sup> A e hadabudia taudia be edia iduhu ta ta ai ladadia e tore taudia, laġani toi vada e hanai mamaruanedia, Iehova ena dubu ai e raka vareai dina ta ta ġaukaradia heġereġeredia, edia hesiai karadia bae kara, ta ta ena ġaukara ena ġaukara heġereġeredia, edia orea ta ta ai.

<sup>17</sup> Hahelaġa taudia na tamadia edia iduhu heġereġeredia ai ladadia e tore; a Levi taudia, laġani ruahui vada e hanai, na edia ġaukara heġereġeredia ai orea ta ta ai ladadia na e tore.

<sup>18</sup> Hahelaġa taudia na mai natudia maraġidia bona adavadia bona natudia mamaruanedia bona hahinedia ida iboudiai ladadia e tore; badina be sibodia ihahelaġadie karadia e kara momokani.

<sup>19</sup> A Aaron garana, hahelaġa taudia, edia hanua gabi-ruma tanodia ai e nohova, edia dala be hanua ta ta ai tatau haida ladadia vada e gwaurai, idia ese mamaruane iboudiai, hahelaġa taudia bona Levi taudia oreana ai hahidaosi ladadia vada e tore taudia, ta ta ahudia bae henidia hagau-

hagau.

<sup>20</sup> Hesekia na unu e kara toma, Iuda tanona idoinai; kara namodia bona maoromaorodia bona momokanidia Iehova, ena Dirava, vairanai e kara.

<sup>21</sup> Bona e kara ġaukaradia iboudiai, Dirava ena dubu isiaina ilao-henina ai, bona taravatu bona haheġani ibadinadia ai, bona ena Dirava itahuna ai, ia ese e karava mai lalona idoinai, bona ena namo e habadaia.

## 32

### *Senakerib ese Iuda e tuari henia*

<sup>1</sup> Unu ġau bona unu heabidadama karadia muridia i, Senakerib, Asuria pavapavana, ema, Iuda e daea. Ia na hanua mai maġudia vairadai e taruha, e laloa baine ġaunaidia eto.

<sup>2</sup> Hesekia e diba Senakerib vada ema Ierusalem baine tuari henia negana ai,

<sup>3</sup> ia na ena heitatao taudia bona ena goada tau-dia ida e henega bou, ranu gabudia hanua badana murimurinai na bae tahunidia eto; bena idia ese ia e durua.

<sup>4</sup> Taunimanima hutuma bada e hebou, bena ranu gabudia Iboudiai, bona sinavai maragina, tano e ha-arua hanai ġauna, na e tahunidia; eto, Anina be dahaka Asuria pavapavadia baema, ranu momo bae davari?

<sup>5</sup> Ia na mai boga-aukana ida e ġaukara matama, vada e hegigi dobi maġuna idoinai ma e haginia lou, bona latanai kohoro e haginidia. Bena una maġu murimurinai ia ese maġu ta ma e larebaia; bona Milo kohorona e ha-aukaia, David ena

hanua lalonai. Ia ese danu tuari ġaudia bona kesi momo herea e karadia.

<sup>6</sup> Ia ese tuari lohiadie e duanaidia, idia ese taunimanima bae biagudia. Hanua ikoukouna ariarana ai e haboudia, bena ena hereva amo e hagoedadie, eto,

<sup>7</sup> Ba goada, ba boga auka. Basio gari bona kudoumui basie hetaha, Asuria pavapavana bona hutuma bada ia ida ema vairadi; badina be ita edai na ta herea-dae, ia enai e hereaiamu.

<sup>8</sup> Ienai be taunimanima imana mo; a ita edai be Iehova, eda Dirava. Ia ese baine duruda, bona eda tuari baine tuarilaia. Bena taunimanima lalodia ma e goada, Hesekia, Iuda pavapavana, ena hereva daidiae.

<sup>9</sup> Senakerib, Asuria pavapavana, mai ena tuari oreana idoinai, ese Lakisi e daia ahuva; bena una murinai ia ese ena hesiai taudia na Ierusalem e siaidia lao, Hesekia, Iuda pavapavana, bona Iuda taudia iboudiae Ierusalem ai e hebouva, dekediai; eto,

<sup>10</sup> Senakerib, Asuria pavapavana, na ini e gwau tomamu: Dahaka ai o hetao kaum dainai Ierusalem o ha-aukaiamu?

<sup>11</sup> Hesekia ese se koimuimu a? Ia ese baine kahumui nege, doe bona ranu mase ese bae hamasemui; badina be ia ese vada e koimuimu, e tomu “Iehova, eda Dirava, ese Asuria pavapavana imana amo baine hamaurida”.

<sup>12</sup> Ina Hesekia ese ena atai gabudia bona ena ihaboulaina patadia vada e abidia oho, bona Iuda bona Ierusalem vada e haġanidie, eto “Ihaboulaina patana tamona mo vairanai ba toma diho bona latanai emui boubou ġaudia ba hagoledia oho”, ani?

**13** Umui asi dibamui a, lau bona lau senegu ese idau tano taudia iboudiai ede vada a kara henidia toma? Unu tano basileiadia edia dirava ese edia tano na lau imagu amo vada e hamauridia diba a?

**14** Unu senegu ese e habuadria tari vaitani basileiadria edia dirava iboudiai bogaragidia amo daika ese ena bese na lau imagu amo vada e hamauria diba, matona, umui emui Dirava ese lau imagu amo baine hamaurimui diba a?

**15** Taunabunai, harihari Hesekia ese unu basine dibağanimui eiava basine koimui toma. Basio kamonai henia, badina be bese ta eiava basileia ta diravana ese ena orea taudia na lau imagu amo eiava lau senegu imadia amo se hamauridia diba. Benaini, umui emui Dirava ese lau imagu amo basine hamaurimui diba.

**16** Ena hesiai taudia ese hereva haida ma e gwaurai, Ĝaubada Iehova ihadikana bona ena hesiai tauna Hesekia ihadikana.

**17** Bona revareva haida ia ese e tore, Iehova, Israel Diravana, iğonalaina bona ihadikana herevadia e tore, eto “Tano haida basileiadria edia dirava ese edia orea taudia na lau imagu amo asie hamauridia heğereğerena, Hesekia ena Dirava ese ena orea taudia na lau imagu amo basine hamauridia”.

**18** Unu hereva e lololai mai gao badadia ida, Ierusalem taudia mağu ai e giniva na e hamaorolaidia, Iuda taudia edia gado ai. Edia ura be bae hagaridria bona laumadia bae hadauredia, hanua badana bae abia helaoreana.

**19** Ierusalem Diravana e herevalaia, tanobada besedia edia dirava, taunimanima imadia ese e kara ǵaudia, e herevalaidia heğereğerena.

*Iehova ese Hesekia e hamauria*

<sup>20</sup> Bena Hesekia, hanua pavapavana, bona Isaia, peroveta tauna, Amoso natuna, e ġuriġuri unu hereva daidiai, bona guba e tai henia.

<sup>21</sup> Bena Iehova ese aneru ta e siaia, bena ia ese tuari taudia mai goadadia bona tuari lohia-dia bona heitatao taudia Asuria pavapavana ena taruha lalonai na e aladia mase. Bena Asuria pavapavana na ena tano korikori ai e lou lao mai hemaraina ida. Bena ena dirava ena dubu ai e dae kau negana ai, ia natuna haida ese unuseni ai dare amo e alaia.

<sup>22</sup> Taunabunai, Iehova ese Hesekia bona Ierusalem ai e nohova taudia na Senakerib, Asuria pavapavana, imana amo bona ana inai taudia iboudiai imadia amo e hamauridia. Ia ese laga-ani e henidia, kaha iboudiai.

<sup>23</sup> Bena hutuma ese herahia gaudia na Ierusalem e laohaidia, Iehova ena, bona dava-bada ġaudia, Hesekia, Iuda pavapavana, ena; taunabunai ia na e imodaia bese iboudiai vairadiai, una negana amo ela.

*Hesekia e gorerea*

<sup>24</sup> Unu dinadia ai Hesekia na e gorerea, mokona e mase. Bena ia ese Iehova e ġuria; bona Iehova ese e haere henia bona toa ta e henia.

<sup>25</sup> A Hesekia ese ia ihanamona davana na se hen, badina be lalona na e hekokoroku. Taunabunai badu na ia latanai e kau, bona Iuda bona Ierusalem latadiai danu.

<sup>26</sup> A Hesekia ese ena hekokoroku e negea, e hahemanau, ia bona Ierusalem taudia danu; una dainai Iehova ena badu na idia latadiai se kau, Hesekia ena nega ai.

*Gwau-kau taudia Babulono amo*

<sup>27</sup> Hesekia ena taḡa na bada; imatauraina danu bada. Ia ese habou-habou rumadia e haginidia, *silver* bona *gold* bona dava-bada nadidia, bona aniani mamidia ihanamodia muramuradia, bona kesi, bona dava-bada kohudia idau-idau na unu ruma lalodiae e habou.

<sup>28</sup> Roḡe danu e kara, lalodiae ia ese uit bona bali bona vine ranuna bona dehoro e haboudia. Boromakau rumadia danu e haginidia, ubu-ubu ġaudia idau-idau edia, bona mamoe ikoulaidia maġudia danu.

<sup>29</sup> Ia ese danu ena hanua haida e hadaidia, bona mamoe seridia bona boromakau seridia momo herea e abidia; badina be Dirava ese ena taḡa e habadaia herea.

<sup>30</sup> Hari Hesekia ese danu Gihon daena ranu e arumu gabudia e koudia ahu, bena ranu na e harua diho, David ena hanua lahara kahana ai. Hesekia ese ena namo e habadaiaava, ena ġaukara iboudiae lalodiae.

<sup>31</sup> Taunabunai, Babulono lohiadia ese edia gwaukau taudia na ia dekena e siaidia, una tano ai vada e hedinarai toana bae henanadailaia eto negana ai, Dirava ese e rakatania ġaġae, baine to-hoa bona lalona idoinai baine dibaiha helioreana.

*King Hesekia e mase*

<sup>32</sup> Hesekia ena kara oredia bona ena kara namodia sivaraidia na Isaia Amoso, peroveta tauna, ena mata-hanai ai e tore, Iuda bona Israel Pavapavadia Sisigadie Bukana ai.

<sup>33</sup> Bena Hesekia na tubu tama dekediai e mahuta; idia ese David garana edia gara daelaona ai e guria. Ena mase negana ai, Iuda idoinai

bona Ierusalem taudia iboudiai ese ia e imodaia.  
Bona ia natuna Manase na ia gabuna ai e lohia.

## 33

### *King Manase*

<sup>1</sup> Manase e lohia matama negana ai ena mauri lağanidia na gwauta-rua; ena lohia lağanidia na imahui-imā Ierusalem ai.

<sup>2</sup> Ia na Iehova vairanai e kara havara, Iehova ese Israel taudia vairadiai e luludia lasi besedia edia kara dika-hereadria heğereğeredia.

<sup>3</sup> Badina be atai gabudia helağadia ia tamana Hesekia ese e habuadia tari na ia ese ma e haginidia lou, bona Baal edia ihaboulaina patadia e haginidia, bona kaivakuku au-tubuadia haida e kara, bona guba hisiudia iboudiai e toma henidia diho bona isiaidia e lao henī.

<sup>4</sup> Iehova ena dubu ai danu ia ese ihaboulaina patadia haida e haginidia; una dubu na Iehova ese vada e herevalaia, eto “Lau ladagu na Ierusalem ai baine mia hanaihanai”.

<sup>5</sup> Ia ese ihaboulaina patadia e haginidia, guba hisiudia iboudiai edia, Iehova ena dubu mağuna ruaosi lalodiae.

<sup>6</sup> Ia ese danu natuna mamaruanedia na ġole-oho boubou ġaudia ai e halaodia, Hinom natuna ena koura ai; bona mari bona bagu-haoro bona babalau karadia e kara, bona rohe bona mea taudia na e daidaidia. Iehova vairanai e kara havara-havara, bona e habadua.

<sup>7</sup> Hari kaivakuku, ia ese e karaia ġauna, na oirava ena dubu ai e haginia; una dubu na Dirava ese David bona natuna Solomon e herevalai henidia, eto “Ina dubu ai bona Ierusalem, Israel iduhudia

iboudiai lalodia amo vada na abia hidi hanuana, lalonai lau ladagu baina atoa ela bona hanaihanai,

<sup>8</sup> bona Israel aena na senemui na duanai henidia tanona amo nega ta ai basina abia oho lou; ġau tamona na henidia haheġanina idoinai bona egū hesiai tauna Mose ena amo na henidia taravatuna idoinai bona hahedua herevadia bona hahemaoro herevadia na bae badinadia namonamo”.

<sup>9</sup> Manase ese Iuda taudia bona Ierusalem inoholaina taudia e dibaġanidia, taunabunai Iehova ese Israel taudia vairadiae habuadie tari besedia edia kara dika na idia edia ese e hereadia.

<sup>10</sup> Iehova ese Manase mai ena oreia taudia ida e hereva henidia, a idia na asie kamonai.

<sup>11</sup> Taunabunai, Iehova ese Asuria pavapavana ena tuari oreana biagudia na idia ihadikadia tottona e siaidia lao; bena idia ese Manase na igau amo e abia, bona auri labora-labora gadeadia ai e ġuia, bena Babulono e laohaia.

<sup>12</sup> Ena hisihisi negana lalonai ia ese Iehova, ena Dirava, ena hahenamo e tahua ena ġuriġun ai, bona senena edia Dirava vairanai e hahemanau herea.

<sup>13</sup> E ġuria, bena Dirava ese ena noinoi e abia dae, bona e hakaua lou lao Ierusalem ai, ena basileia lalonai. Beni Manase vada e diba Iehova be Dirava.

<sup>14</sup> Una murinai ia ese David ena hanua maġuna, murimuri kahana ġauna, e haginia, Gihon lahara kahana ai, koura lalonai, ela bona Gwarume Ikoukouna raka-vareaina ai; ma e larebaia lao ela bona Ofele e ġeġea; bona harana e halataia herea.

Ia ese danu tuari oreana biagudia na Iuda hanuadia mai mağudia iboudiai lalodiae hanohodia.

<sup>15</sup> Bona dirava idaudia bona kaivakuku na Iehova ena dubu amo e abidia oho, bona ihaboulaina patadia iboudiae ia ese guna Iehova ena dubu ororona ai bona Ierusalem ai e haginidia gaudia ma e abidia oho, hanua murimurinai e negedia.

<sup>16</sup> Ia ese danu Iehova ena ihaboulaina patana ma e haginia lou, bona latanai herohemaino bouboudia bona hahenamo bouboudia e hahe-lağadia; bona Iuda taudia e hağanidia, idia ese Iehova, Israel Diravana, isiaina bae lao hen.

<sup>17</sup> Ğau tamona, tauimanima ese boubou karadia dounu e karava atai gabudia ai, to Iehova, edia Dirava, mo enai.

<sup>18</sup> Manase ena kara oredia, bona ena ġuriġuri ena Dirava enai, bona mata-hanai taudia ese Iehova, Israel Diravana, ladana ai e hereva henia negana ai e gwaurai herevadia, na Israel Pavaradie Sisigadia Bukana ai e hetore.

<sup>19</sup> Ena ġuriġuri danu, bona Dirava ese ena noinoi ede e abia dae toma, bona ena kara dikha bona ena kara hebeatai, bona edesenai ai atai gabudia e karadia, bona Asera ena au-tubua bona kaivakuku e haginidia, ia na do se hahemanau negana ai, sivaraidia na Mata-hanai Taudia Sisigadia Bukana ai vada e hetore.

<sup>20</sup> Taunabunai, Manase na tubu tama dekediai e mahuta; bena ena rumai ai e guria. Bena ia natuna Amon na ia gabuna ai e lohia.

*King Amon*

<sup>21</sup> Amon e lohia matama negana ai ena mauri lağanidia na ruahui; lağani rua hona e lohia, Ierusalem ai.

<sup>22</sup> Ia na Iehova vairanai e kara havarava, tamana Manase e kara havarava heğereğerenä. Tamana Manase ese e kara kaivakukudia iboudiai na Amon ese e boudia bona isiaidia e lao heni.

<sup>23</sup> Iehova vairanai se hahemanau, tamana Manase na e hahemanau na heto; a hari Amon ese ena kerere e habadaia herea.

<sup>24</sup> Ena hesiai taudia ese ia ihadikana dalana e henegalaia, bena iena rumä ai e alaia mase.

<sup>25</sup> A tano taudia ese King Amon ihadikana e henegalaia taudia iboudiai na e aladia mase; bena tano taudia ese ia natuna Iosia na pavapava ai e halaoa, ia gabuna ai.

## 34

### *Iosia e lohia matama*

<sup>1</sup> A Iosia e lohia matama negana ai, ena mauri lağanidia na taurahani. Ena lohia lağanidia Ierusalem ai na toiahui-ta.

<sup>2</sup> Ia na Iehova vairanai e kara maoromaoro, senena David ena dala idoinai e rakalaia, se raka siri, idiba kahana ai eiava lauri kahana ai.

<sup>3</sup> Badina be ena lohia lağanina ihataurahanina ai, ia do merona ai, ia ese senena David ena Dirava e tahua matama; bena lağani ihagwautaruana ai ia ese Iuda bona Ierusalem e hağoevadia matama, atai gabudia bona Asera ena au-tubua bona kaivakuku, e havevedia auridia amo e kara gaudia, na e abidia oho.

<sup>4</sup> Idia ese Baal edia ihaboulaina patadia na ia vairanai e gigidia dobi. Ia ese danu muramura

mai bonadia patadia, idia daediae e giniva gaudia, na e utudia; bona Asera ena au-tubua bona e havevedia auridia amo e kara kaivakukudia na e hamakohidia patapata, ġahu ai e halaodia; bena gahu na unu ġau e boudia taudia edia gara latadiai e ġigia rohoroho.

<sup>5</sup> Hahelaġa taudia turiadia danu edia ihaboulaina patadia latadiai e haġoledia oho; una kara amo ia ese Iuda bona Ierusalem e haġoevadia.

<sup>6</sup> Manase bona Efraim bona Simeon hanuadie ai, ela bona Napatali, bona edia hanua gunadia heġeġe:madaidie ai danu,

<sup>7</sup> ia ese ihaboulaina patadia e ġigidie dobi, bona Asera ena au-tubua bona kaivakuku na gahu ai e halaodia, bona muramura mai bonadia patadia e utudia, Israel tanona idoinai. Bena ia na Ierusalem e lou lao.

### *Taravatu Bukana e davana*

<sup>8</sup> Ena lohia laġanina ihagwauta-taurahanina ai, tano bona dubu vada e haġoevadia murinai, ia ese Safana, Asalia natuna, bona Maaseia, hanua lohiana, bona loa Ioahaha, toretore tauna, na e siaidie lao, Iehova, ena Dirava, ena dubu bae bania.

<sup>9</sup> Idia na Hilkia, hahelaġa tauna badana, dekenai e kau; bena Dirava ena dubu ai e vareailai monidia, Levi taudia, raka-vareaina inarina taudia, ese Manase bona Efraim taudia, bona Israel taudia kwabukwabudia, bona Iuda bona Beniamina taudia iboudiai, bona Ierusalem inoholaina taudia, edia amo e abi ġaudia, na e henia.

<sup>10</sup> Idia ese Iehova ena dubu itataona taudia e henidia, bena Iehova ena dubu e ġaukaralaiava taudia ese dubu ibanina ai bona ihanamo-louna ai e heni;

<sup>11</sup> kamuta taudia bona rumahagini taudia e henidia, e gei nadidia bona kapa-kapa audia bona lava bae hoidia, Iuda pavapavadia ese e matadia rea dainai vada e dika rumadia ihanamo-loudia totona.

<sup>12</sup> Unu tatau ese ġaukara e karaia mai momokanida ida. Idia itataodia taudia e atodia na Iahata bona Obadia, Levi taudia Merari besena amo, bona Sekaria bona Mesularna, Kohat besena taudia; idia ese e itadia tao. Levi taudia iboudiai na hatai-hatai ġaudia ihataidia mai dibadia taudia;

<sup>13</sup> idia ese kohu-hua taudia e itadia tao, bona hesiai ġaukaradia idau-idau e kara taudia iboudiai e biagudia. Levi taudia haida na itorena taudia bona heitatao taudia bona ikoukou igimadia taudia.

<sup>14</sup> Hari Iehova ena dubu ai e vareailaia monina e abia lasi negana lalonai, hahelaġa tauna Hilkia ese Iehova ena taravatu bukana, Mose ena amo e henī ġauna, na e davaria.

<sup>15</sup> Bena Hilkia ese toretore tauna Safana e hamaoroa, aeto, Lau ese taravatu bukana vada na davaria, Iehova ena dubu ai; bena Hilkia ese buka na Safana e henia.

<sup>16</sup> Safana ese buka na hanua pavapavana dekena e laohaia. Ia ese hanua pavapavana e hamaoroa, eto, Emu hesiai taudia o henidia ġaukaradia iboudiai na e karamu;

<sup>17</sup> Iehova ena dubu ai e davaria monina na vada e vaia, heitatao taudia bona ġaukara taudia imadia ai vada e atoa.

<sup>18</sup> Bena toretore tauna Safana ese hanua pavapavana ma e hamaoroa, eto, Hahelaga tauna Hilkia ese buka ta vada e henigu. Bena Safana ese hanua pavapavana vairanai e duahia.

**19** Hanua pavapavana ese taravatu herevadia e kamonai negana ai, ena dabua e dare.

**20** Bena hanua pavapavana ese Hilkia, bona Ahikama Safana, bona Abdon Mika, bona toretore tauna Safana, bona Asaia, hanua pavapavana ena hesiai tauna, na e hağanidia, eto,

**21** Aola, Iehova ba nanadaia, lau daigu ai bona Israel bona Iuda kwabukwabudia daidiae, hari e davaria bukana herevadia ba henanadailai; badina be Iehova ena badu ġaraġara na ita latadai vada e hadihoa; badina be tamada ese Iehova ena hereva asie badinaia, bona ina buka lalonai e tore ġaudia iboudiai na asie kara.

**22** Taunabunai, Hilkia bona hanua pavapavana ese vada e siaidia taudia na peroveta hahinena Hulda, Salumu Tokohata adavana, dekena ela. Una Salumu na Hasra tubuna. Ia na pavapava ena dabua inaridia tauna. Hahine na Ierusalem kaha matamatana ai e nohova. Bena idia ese unu hereva e hamaorolaia.

**23** Bena ia ese e hamaorodia, eto, Iehova, Israel Diravana, na ini e gwau tomamu: dekegu e siamui mai tauna ba hamaoroa, baoto,

**24** Iehova na ini e gwau tomamu: A itaia, lau na dika baina havaraia, ina gabu latanai bona inoholaina taudia latadiet, heuduguirai herevadia iboudiai, Iuda pavapavana vairanai e duahia bukana lalonai e hetore ġaudia, heġereġeredia ai.

**25** Badina be lau vada e rakatanigu, bona idau dirava vairadiet muramura mai bonadia vada e gabu; imadia gaukaradia iboudiai amo vada e habadugu. Taunabunai, egħi badu baine diho ina gabu latanai, bona ta ese basine habodoa diba.

**26** A Iuda pavapavana ese Iehova inanadaina

totona vada e siaimui mai; taunabunai ini ba hamaoroa toma, baoto, Iehova, Israel Diravana, na ini e gwau tomamu: Badina be vada o kamonai herevadia daidiae

<sup>27</sup> o helalo kerehai, bona Dirava ena hereva, ina gabu mai inoholaina taudia ida ihadikalaidia ġaudia, o kamonai negana ai na vairagu ai o ha-hemanau, bona emu dabua vada o dare bona vairagu ai vada o tai; una dainai (Iehova na e tomamu) lau ese danu vada na kamonai henimu.

<sup>28</sup> A itaia, lau ese tubu tama ida baina haheboumu, gara bae laohaimu mai mainomu ida; a dika iboudiai ina gabu mai inoholaina taudia ida latadiai baina mailai na oi matamu ese basie ita. Bena idia ese una hereva na hanua pavapavana dekena e loulaia lao.

<sup>29</sup> Bena hanua pavapavana na e hesiai, Iuda bona Ierusalem tau-badadia iboudiai e haboudia.

<sup>30</sup> Bena hanua pavapavana na Iehova ena dubu ai e dae kau, bona Iuda taudia iboudiai bona Ierusalem inoholaina taudia iboudiai, bona ha-helaġa taudia bona Levi taudia, taunimanima iboudiai kikina-badana danu ia ida; bena ia ese taravatu bukana, Iehova ena dubu ai e davaria ġauna, herevadia iboudiai na idia vairadiai e duahi hedinarai.

<sup>31</sup> Bena hanua pavapavana na ena gabu ai e gini, Iehova vairanai e gwau hamata, Iehova ena dala ai baine raka, bona ena haheġani bona ena hahed-iba herevadia bona ena taravatu baine badinadia mai lalona idoinai bona mai laumana idoinai ida, bona taravatu herevadia una buka lalonai e hetore na karadia do baine kara.

<sup>32</sup> Bena Ierusalem bona Beniamina taudia na e haduadia idia danu unu bae gwau hamata toma.

Bena Ierusalem inoholaina taudia na Dirava, senedia edia Dirava, ena taravatu heğereğerenai ai e kara.

<sup>33</sup> Bena Iosia ese kara dikahereadia iboudiai na Israel taudia edia tano idoinai lalona amo e abidia oho; bona Israel ai e nohova taudia iboudiai na e haduadia, Iehova, edia Dirava, isiaina bae lao hen. Iena nega ai idia na Iehova, senedia edia Dirava, ena dala amo asie raka siri.

## 35

### *Lagau-hanai Ariana*

<sup>1</sup> Iosia ese lagau-hanai ariana ta Ierusalem ai e karaia, Iehova ena. Hua gini-gunana dinana ihagwauta-hanina ai, idia ese lagau-hanai mamoena e alaia mase.

<sup>2</sup> Ia ese hahelağā taudia e duanaidia, edia ġaukara e gwaurai henidia, bona Iehova ena dubu isiaina ilao-henina ai e hagoadadia.

<sup>3</sup> Bena ia ese Levi taudia, (unu na Israel taudia iboudiai e hadibadia bona Iehova enai e helağā taudia), na e hamaorodia, eto, Maua helägana na Solomon, David natuna, Israel pavapavana, ese e haginia dubuna lalonai bavatoa; ina murinai pağamui ai basio huaia lao. Harihari Iehova, emui Dirava, bona ena bese Israel, isiaidia ba lao hen.

<sup>4</sup> Sibomui ba heğaeğae, emui iduhu heğereğeredia ai, emui oreata ta ta amo; David, Israel pavapavana, bona ia natuna Solomon, edia hahedua ba badinadi.

<sup>5</sup> Bona gabu helägana ai ba gini, tadikakamui hanua taudia edia iduhu oreadia ta ta ai e gini heboumu heğereğeredia; Levi iduhuna taudia haida na oreata ta ida bae gini hebou.

**6** Bena lagau-hanai mamoeña bavalaia mase; sibomui ba hahelağā, bona ba heğaeğae tadikakamui daidiae; bena Iehova ena hereva Mose ena amo heğereğerena ai ba karaia.

**7** Bena Iosia ese hanua taudia e harihari henidia, e hebouva taudia iboudiai edia lagau-hanai boubouna ġaudia e henidia, mamoe natudia bona nani natudia gerebu-toi\* bona boromakau maruanedia daha-toi; unu na hanua pavapavana sibona ena seri amo.

**8** Ena lohia taudia ese danu hanua taudia bona hahelağā taudia bona Levi taudia e harihari henidia mai lalo-harağadia ida. Hilkia bona Sekaria bona Iehiele, Iehova ena dubu itataona taudia badadia ese mamoe natudia bona nani natudia daha-rua sinahu-tauratoi bona boromakau maruanedia sinahu-toi na hahelağā taudia e henidia, lagau-hanai boubouna ġaudia.

**9** Konania danu, mai tadina Semaia bona Netanele ida, bona Hasabia bona leiele bona Iosabad, Levi taudia Iohiadie, ese mamoe natudia bona nani natudia daha-imā bona boromakau maruanedia sinahu-imā na Levi taudia e henidia, lagau-hanai boubouna ġaudia.

**10** Kara helağana vada e heğaeğaelaia vaitani negana ai, hahelağā taudia na edia gabu ai e gini bona Levi taudia edia orea ta ta ai e gini, hanua pavapavana ena haheğani heğereğerena ai.

**11** Bena lagau-hanai mamoeña e alaia mase; bona hahelağā taudia ese raradia e abi, e henevarilai; bona Levi taudia ese mase ġaudia na e kopadia.

---

\* **35:7** Gerebu-toi = 30,000.

<sup>12</sup> Bena ġole-oho boubou ġaudia e atodia tabe, hanua taudia edia iduhu oreadia bae henidia hagau-hagau, Iehova enai bae hahelaġadia helaoreana, Mose ena buka ai e torea heġereġerena. Boromakau mamaruanedia danu unu e karadia toma.

<sup>13</sup> Bena idia ese lagau-hanai mamoena na lahi ai e gabua, taravatu heġereġerena; bona herahia helāġadia ġaudia na uro maraġidia bona badadia bona nau lalodiae e nadudia, bena e laohaidia haraġa, hanua taudia dekediai.

<sup>14</sup> Gabeamo idia na sibodia adia bona hahelaġa taudia adia e nadu, badina be hahelaġa taudia, Aaron vevena, ese ġole-oho boubou ġaudia bona digaradia ihahelaġadia e hekwarahilai ela bona hanua e boi. Una dainai Levi taudia ese sibodia adia bona hahelaġa taudia, Aaron vevena, adia e nadu.

<sup>15</sup> Ane-abu taudia, Asaf vevena, na edia gabu ai e nohova, David ena haheġani heġereġerena; bona Asaf bona Hemana bona ledutunu, hanua pavapavana ena mata-hanai tauna, danu. Bona ikoukou igimadia taudia na ikoukou ta ta ai e nohova; asi badina edia ġaukara bae rakatania, badina be tadikakadia, Levi taudia, ese adia e nadu.

<sup>16</sup> Taunabunai Iehova isiaina ilao-henina idoinai e heġaeġaelaia una dina ai, lagau-hanai ariana bae karaia bona ġole-oho boubouna ġaudia Iehova ena ihaboulaina patana latanai bae hahelaġadia totona, King Iosia ena haheġani heġereġerena.

<sup>17</sup> Bena Israel taudia hahidaosi unuseni ai e hebouva ese lagau-hanai ariana e karaia una ne-

gana ai, bona asie hatubua flaoana ariana danu e karaia, dina hitu lalodai.

<sup>18</sup> Peroveta tauna Samuel negana amo, lagau-hanai ariana ta se karaia Israel ai; Israel pavapavana ta ese lagau-hanai ariana ta se karaia, una Iosia bona hahelağā taudia bona Levi taudia bona Iuda bona Israel unuseni ai e hebouva taudia iboudiai bona Ierusalem inoholaina taudia ese e karaia ġauna heğereğerenā.

<sup>19</sup> Iosia ena lohia laġanina ihagwautaurahanina ai una lagau-hanai ariana e karaia.

### *Iosia e mase*

<sup>20</sup> Una idoinai murinai, Iosia ese dubu vada e lailaia vaitani negana ai, Neko, Aigupto pavapavana na tuari totona Karakemisi, Eufrate sinavaina badibadinai, ela; bena Iosia ese ia ituari-henina totona e lao henia.

<sup>21</sup> A ia ese gwaukau taudia na dekena e siaidia lao, eto, Iuda pavapavana e, ita padadai be da-haka? Hari dina ai lau ese oi ihadikamu totona asinama, a na tuari heniamu oreana na mai henia; bona Dirava ese vada e haġanigu, baina kara haraġa. Dirava na lau ida; ia ilao-ahuna ba hadokoa, ia ese baine habuamu tari na garina.

<sup>22</sup> Ĝau tamona, Iosia na se ura iena amo baine raka oho; a ia na sibona toana e ha-idaua, baine tuari henia totona. Ia ese Neko ena hereva Dirava uduna amo na se kamonaidia, a Megido taorana ai tuari e kwatua.

<sup>23</sup> A peva taudia ese King Iosia e tarakia. Bena hanua pavapavana ese ena hesiai taudia na e hamaorodia, eto, Dauha a laohaigu, badina be vada na bero dikadika.

<sup>24</sup> Taunabunai ena hesiai taudia ese kariota amo e abia dobi, ma ena kariota iharuana amo e laohaia Ierusalem ai. Bena e mase; tubu tama edia gara ai e guria. Iuda bona Ierusalem idoinai ese Iosia taina e tai.

<sup>25</sup> Ieremlia ese Iosia e rohe-ahulaia, bona aneabi tataudia bona hahinedia ese danu Iosia e rohe-ahulaia, ema bona ina dina. Ini na edia kara ai e halaoa Israel ai; ġaudia bunu idia na Rohe-ahu Bukana lalonai e hetore.

<sup>26</sup> Iosia ena kara oredia, bona ena ġaukara namodia Iehova ena taravatu ai e tote heġereġeredia,

<sup>27</sup> bona e kara karadia, matamana ela dokona, a itaia, idia na Israel bona Iuda Pavapavadia Sisigadia Bukana ai e hetore.

## 36

### *King Iehoahasa*

<sup>1</sup> Tano taudia ese Iehoahasa, Iosia natuna, e abia, pavapava ai e halaoa Ierusalem ai, tamana gabuna ai.

<sup>2</sup> Iehoahasa ena mauri laġanidia na ruahui-toi, e lohia matama negana ai; ia na hua toi hona e lohiava Ierusalem ai.

<sup>3</sup> Bena Aigupto pavapavana ese ena dagi e abia oho Ierusalem ai, bona heaiva na tano taudia edia amo e gwauraia, *silver talent* sinahu-ta\* bona *gold talent* ta.

<sup>4</sup> Bena Aigupto pavapavana ese Iehoahasa tadina Eliakim na Iuda bona Ierusalem pavapavana ai e halaoa, bona ladana e ha-idaua Iehoiakim.

---

\* **36:3 Silver talents**sinahu-ta = 5 tonnes sisivana. **Gold talent**ta = 54 kilograms sisivana.

A Neko ese kakana Iehoahasa e abia, Aigupto e laohaia.

### *King Iehoiakim*

<sup>5</sup> Iehoiakim ena mauri lağanidia na ruahui-imā, e lohia matama negana ai; ena lohia lağanidia na gwauta-ta Ierusalem ai. Ia na Iehova, ena Dirava, vairanai e kara havara.

<sup>6</sup> Bena Nebukadnesara, Babulono pavapavana, ese e tuari henia, bona auri gadeadia ai e ġuia, Babulono baine laohaia totona.

<sup>7</sup> Nebukadnesara ese danu Iehova ena dubu kohudia haida na Babulono e laohai, iena ruma badana ai e atodia Babulono ai.

<sup>8</sup> Iehoiakim ena kara oredia, kara dikā-hereadia ia ese e kara, sivaraidia, bona hereva dikadia ia latanai e gwaurai, a itaia, idia na Israel bona Iuda Pavapavadia Sisigadia Bukana ai e hetore. Bena ia natuna Iehoiakini na e lohia, ia gabuna ai.

### *Iehoiakini na Babulono e laohaia*

<sup>9</sup> Iehoiakini ena mauri lağanidia na taurahani,<sup>†</sup> e lohia matama negana ai; ia na hua toi dina gwauta hona Ierusalem ai e lohiava. Ia na Iehova vairanai e kara havarava.

<sup>10</sup> Bena gara-kau negana ai, King Nebukadnesara e hesiai, bena Babulono e hakaua lao; Iehova ena dubu kohudia herea-daedia danu e laohai. Bena kakana Sedekia na Iuda bona Ierusalem pavapavana ai e halaoa.

### *King Sedekia*

---

<sup>†</sup> **36:9** “Taurahani”. 2 Hanua Pavapavadia Karoa 24, siri 8 lalonai e toreia “gwauta-taurahani”.

**11** Sedekia ena mauri lağanidia na ruahui-ta, e lohia matama negana ai; ena lohia lağanidia Ierusalem ai na gwauta-ta.

**12** Ia na Iehova, ena Dirava, vairanai e kara havara; bona peroveta tauna Ieremia, Iehova uduna herevadia e gwaurai tauna, vairanai se hahemanau.

**13** King Nebukadnesara ese e haduaia dainai ia na Dirava ladana ai vada e gwau hamata; to ia ese hari King Nebukadnesara e gwau edeede henia. Ia ese aiona e ha-aukaia bona lalona danu e ha-aukaia, Iehova, Israel Diravana, basine hağerea.

**14** Hahelağā taudia badadia bona hanua taudia danu e gwau edeede dikadika, bese idau-idaudia kara dika-hereadia iboudiai e tohotohodia; bona Iehova ena dubu Ierusalem ai, ia ese vada e hahelağāia ġauna, na idia ese e hamiroa.

**15** Iehova, senedia edia Dirava, ese hereva na ena gwaukau taudia ududia amo e siai havara-havara, badina be ia ese ena taunimanima bona ena noho gabuna e bogadia hisi.

**16** A vaia idia ese Dirava ena gwaukau taudia e ġonaġonalaidia, ena hereva e dadaraidia bona ena peroveta taudia e hevasehalaidia, ela bona Iehova ena badu e vara, ena bese taudia latadi, ela bona asi ihanamo-louna dalana.

### *Iuda iabi-maurina*

**17** Una dainai, ia ese Kaldea pavapavana e hakaua mai, idia ihadikadia totona. Ia ese edia eregabie taudia na dare amo e aladia mase, edia dubu ena helağā gabuna ai. Tauhau eiava hane-ulato, tau badana eiava tau burukana, se bogadia hisi; iboudiai na una tau imana ai e atodia.

**18** Bona Dirava ena dubu kohudia iboudiai, badadia bona maraġidia, bona Iehova ena dubu ġaudia herea-daedia, bona hanua pavapavana bona ena lohia taudia edia ġau herea-daedia, iboudiai ia ese Babulono e laohai.

**19** Dirava ena dubu e doua, bona Ierusalem maġuna e ġigja dobi, bona ena rumu badadia iboudiai na lahi amo e dou, bona ena kohu ġoevadaedia iboudiai e habuadria tari.

**20** Dare amo e roho mauri taudia na ia ese e abidia mauri, Babulono e laohaidia; bena idia ese ia bona ia natuna isiaidia e lao heniva ela bona Parasa basileiana e gini matama.

**21** Unuheto Iehova ena hereva Ieremia uduna amo e gwauraia na vada e hamomokania, ela bona tano ese ena dina helaġadia vada e moale-laidia. Una e haġaġaea dinadia iboudiai na e helaga, ela bona laġani hitu-ahui e ore.

### *Kurese ena Haheġani*

**22** Kurese, Parasa pavapavana, ena lohia laġanina gini-gunana ai, Iehova ena hereva Ieremia uduna amo e gwauraia na anina baine vara totona, Iehova ese Kurese, Parasa pavapavana, e rohea; bena ia ese haheġani ta e gwauraia ena basileia idoinai lalonai, bona e tore danu.

**23** Haheġani na binai. Kurese, Parasa pavapavana, ini e gwau tomamu: Iehova, guba Diravana, ese tanobada basileiadria iboudiai vada e henigu, bona vada e haġanigu, ena dubu auta baina haginia Ierusalem ai, Iuda tanona ai. Daika daika umui bogaragirnui ai na iena bese tauna, Iehova, ia ena Dirava, ese baine bamoa. Ia na baine dae lao.

**Buk Baibel long tokples Motu  
The Holy Bible in the Motu language of Papua New  
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

---

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca